



ИТВЫВ КОДЗУВ

5
МАЙ
1978



Том олөмөй, том гажөй...

Снимокыс В. Вежевлөн.



ЛИТЕРАТУРНО-
ХУДОЖЕСТВЕННОЙ
ДА ОБЩЕСТВЕННО-
ПОЛИТИЧЕСКОЙ
ЖУРНАЛ

ТАЙО НОМЕРЫН

Геннадий ЮШКОВ. Чугра (роман)	3
Серафим ПОПОВ. Виль кивбурьяс	30
Юрий ВАСЮТОВ. Сэтшөм морт (висьт)	31
Владимир ШАРКОВ. Век стройын (очерк)	37

Публицистика

Ф. С. РИМСКИХ. РСФСР-лөн виль Конституция	41
А. З. АНУФРИЕВ. Сөвман туйод	45
Г. Н. КУПРИЯНОВ. Войвылын войналөн бөрья луньясö	50

Серамбана гижөдьяс

Николай ДЪЯКОНОВ. Мөс вөра йөв (өти торья теш)	55
Евгений АФАНАСЬЕВ. Мирон дед писькөдис öшинь (висьт)	59

«Войвыв кодзувлөн» почта

А. РАКИН. Кык юкөна быдмөг нимьяс	61
Е. ИГУШЕВ. Мыйла шуам Донты	63

ЛЭДЗЁ КОМИ АССР-са
ПИСАТЕЛЬСЛӨН СОЮЗ

ПЕТӨ 1926 ВОСЯНЬ

5

МАЙ
1978

СЫКТЫВКАР

СЕВЕРНАЯ ЗВЕЗДА

*

ЕЖЕМЕСЯЧНЫЙ
ЛИТЕРАТУРНО-ХУДОЖЕСТВЕННЫЙ
И
ОБЩЕСТВЕННО-ПОЛИТИЧЕСКИЙ
ЖУРНАЛ

•

ОРГАН
СОЮЗА ПИСАТЕЛЕЙ
КОМИ АССР

Главный редактор *П. Шахов*

Редакционная коллегия:

*А. Ванеев, М. Игнатов, В. Попов, С. Попов,
С. Раевский, И. Торопов (зам. главного редактора),
Г. Юшков,*

Коми областной комсомольской организации съезд ВЛКСМ-л
XVIII съезд в составе делегатов.

Снимает В. Ячменев



Теннадий Юшков

ЧУГРА

Роман

I

Быттьо муыс воссылёма коркө тати, и пөсьыс ыльөбтөма ортсө да өдйө кынмөма швичкан кодзыд вылас. Сюра-пеля чугра, изья мылык, зумбырвидзө өнi гежөдик сус пуа нюр шөрын.

Сус пуясыс ойөстөмаөсь, вегыльтчөм вожьяөсь, гырыся косталөны, быттьо сибөдчөны чугра дiнас и йөжгылясьөны полөмысла. И быть пов быттьо налы: кымын сус пу нин эштөма чугра йылас, чегөма сувтса вывьсыс, ёсь дзавьяса руд мырьясыс налөн зарсвидзөны сука быдмысь, кортөм нин, сьөд леторос писыс.

Чугра йывланыс, из палак усьөмысь артмөм джаджъя горейын, вөрзвывтөг пукалө ыджыд энъ сюзь. Сьөдөн кузя ног пасйышталөм морөсыс сылөн кельөймөма. Гыжйөдзые пушыд кок гөныс төвсө тшын рөма, да быттьо сэтысь и петөма дзорыс, нырөдзые нин кайөма, орөстөма крукыля нырө. Но синьясыс зэв на гырдөсь, ырнялөны улiник шондi паныдыс, и кольквижөн быгөртөм пельясыс чим сьөдөсь на, лөсталөны.

Вугрөдлө энъ сюзьөс. Öнтай на, асья-войнас, тшапкис турунзьөм тыкөлаысь гөса ондатраөс, сьөкыда вайис да чөскыда забйис гөн сорнас. Пөт руыс небыдика кылө на кынөмсыс, ойбыр вайө. Кутшөма эськө узьыштис!

Но шондыс дөзмөдчө, синмас пырө. И эсийө повзьөдчө, нюрсунөм чужөма да вутш выв турун кодь

кузь да дзуг юрсиа мортыс: оз узь ни оз мун кытчөкө, а петөма чугра улысь, аслас пыдi гуысь, да кыйялө, кывзысьө сэтысь, кытчө ритнас шондыс пуксьылө.

Энъ сюзь кылө жө сэтысь, гылан ва моз джудждаммылысь да увланымылысь тшем вөр сайсыс, быттьо ыджыд гым локтө, кыз пөдөма муркнитлас да бара, сөмын оз чардав, некыт оз чашйы енэжсө.

Кольөм восянь нин тайө гөгөрвөтөм гымыс локтө, некутшөма оз оравлы, а пемыд войяснас сэн би чутьяс везьялөны, весиг өшалан кымөра дырйныс сэтi быттьо кодзулөссьылө.

Энъ сюзь пондылис нин велавны, кымыныськө лэбзьылис нин сэтчаньө, но чугра улын олысь морт кы-



мын водзё, сымын садьсё эз кут
тöдны: ыр-петас гусьыс, гораджыка
кö муркнитöмыс кывлас. А сылөн
полöмыс и энъ сюзьлы инмö, кöть
выльлаö овмöдчы тадзи майшасьöм
дорысь, да абу öд кокни бур оланін-
тö вежны.

А оланіныс энъ сюзьлөн и збыль-
ысь ошкана. Мусяныс сы дінö кав-
шасьöмөн восьöма, а лэбалысьсьыд
сійö и ачыс некодысь оз пов. Коркö
на еджыд бöжа кутш гозьяöс вöт-
ліс, татчö жö көсйылісны поздысьны
да.

И нюрыс нюжалö да паськалö,
муртса кыпöдчан — гөгөр зэв ылöдз
тыдалö, быд вутш кост и ляк бадь
ув. Дерт, пötöса кыйдöсыд татшöм-
инад абу жö, зэв нин шыр либö ля-
гуша, а мед чукчи койтсьöм бöрас
лыснысö татчö локтіс — гежöда ов-
лö.

Но сы вылö и энъ сюзьлөн сыв-
йысь на паськыд бордьясыс, мед
кытчö гажыс лэбзывны, сук парма-
сö войяснас вожмавлыны. Сэсся и
оз öти ю да ёль, тыкöла да кыскöд
костöдлыны сьöд вöрсö. Найö быт-
тьö тöдöмөн отсасьöны энъ сюзьлы,
улі лэбалан туйяс писькөдöны сылы.

Сюрывлö и тшыг пыкны энъ
сюзьлы, медся нин сэк, кор сійö пöж-
сьö либö ывлаыс дыр лёкалö. И ма-
тö сизимдас вонад эз нин этшаысь
ковмыв. Но мед вежны оланінсö,
энъ сюзь та могысь эз на корсьыс-
лы. Весиг этайö мортыс понда, коді
чугра улас овмöдчис, эз эновтчы та-
йö позсьыс.

Абу эськö долыд энъ сюзьлы, вер-
мис кö, важөн нин вöтліс содтöд
олысьсö, да оз вермы. Кия-кия, гу-
гу-гу, сэсся тай кыз гөрөктас, ас-
лас пельыс чунавлас. Мукöд мор-
тыс весьöпöрлöны энъ сюзьлөн та-
тшöм шыясьыс, эз нин öти турун
пуктысьсöс да чери кыйысьсöс садь-
тöг повзьöдлы войся лэбалігьясас,
а талы веськодь, велалöма нин,
быттьö узьö да оз и кыв.

А дырджык кö энъ сюзь оз öвсьы,
петас гусьыс да öлöдас:

— Ланьт, колöкö, а чергöда! — и
вылö лыяс. Быть сэки ланьт энъ
сюзьлы.

Нэмсö нин олö тані энъ сюзь. Эз
нин этша пиöс быдтыводдза айыс-

кöд и мöдыскöд. Но таво бара öтна-
сөн коли, весиг быдтынысö некодöс
лои. Эськö пуктыліс тулыснас гөг-
рöсінник кык еджыд кольк, да пöжи-
гас на уськөдіс öтисö айыс понда.

Войбыд ветліс айыс, кузь бöжа
винашыр сöмын вайис, öтчыд заб-
нитмөн. А энъ сюзьлөн сэтшöма сю-
маліс кынöмыс, некытчö эз и тöдчыв
винашырыд. Уськөдчис мудзöмысла
тырöм лола айыс вылö, мед лэбзы-
лас на кытчöкö, и вöрзьöдіс скöрмö-
мысла чорзьöдöм бöжнас пöжан
колькьяссö. Öти колькыйс гартов-
муні да коли поз нөптовас, а мöдыс
быгыльтчис, титшкысис улыс изйö.

Кольöм кольксö энъ сюзьлы дыр
на ковмис пöжны, öти сайын и тшыг
пыкны. Кузя мисьтöмаліс ывлаыс,
вöсни кöдзыд зэрөн везьяліс, сэсся
кижа кодь посни лымйөн пожнасис.
Татшöмнад ай сюзьлы аслыс мустöм
вöлі лэбавны, а кысь нин казявны
быд пöрйö кодöскö олысьсöс. И во-
лывліс тыртöг.

Тшыг пыкис и чугра улын гусьөн
олысьыс, нинöм эз шыблавлы аслас
гусьыс: лы ёг ни сюв коляс.

Ыргис-ыргис да ланьтіс жö сэсся
вой тöлыс, дзырыд сынöда лун пук-
сис, и сэки энъ сюзьлөн чужис бус-
сялöм гöна да синтöм пи. Бара он
коль сійöс öтнассö, турдöмысь да
усьöмысь видз. Вот кор быдмыштас
да потасны синьясыс, сэки позьö и
эновтлыны регыдик кежлö.

А ай сюзьлы öні кыкöс нин верд,
и дженьыд югыд войыс сöмын сы-
лөн. Луннас оз бура аддзы, гудырт-
чö лэбигас син водзас, да видзчысь-
ны на колö, этшаджык мыччасьны.
Казяласны быдсяма посни лэбачыс
да öтчукөрөн вöтлысьны кутасны,
чирзыны да сильгыны, кöть пöрöм
улö кöч моз дзебсьы.

Шондіыс эз на лэччы, а чужöм пи-
ыс, кылö, сёйны нин корö, чивöстлö
мам увсяныс. И мамыс гальскö
нырнас, ыджыда восьтылö вомсö,
быттьö пöдö. Сотчö нин сылөн пытш-
кöсыс ватöмысла да тшыгысла.
Пöсь вира сёян эськö öні сылы, ок
уна и забьяс.

Тырвийö рөмдöмсö ай сюзь эз и
виччысь, йөткыштчис да шыв-лэб-
зис ылö, луныв вöртас визьöбас
чукьялан кырталань. Көджысь кö-

джо усьласысь да изйо нойтчысь ляга бердын, лягаыслон ыджыд юо усянінсянь неуна катыдын, кыпало тайо кыртыс. Оти олан керка видзодо сэсянь асывыло, Урал мусюр выло, а мукодыс повьялом ошина либо джынвыйо косялома.

Энь сюзь колльодис айсо синьяс-нас чуто портодз да лонис, абутом-модис сьылис. Лача сылы воис, мый корко вой шор борас бара на потлас. Од кольом во на гожомнас, ачыс сэсь еджыд баляос вайлис.

Но войыс кольны кутис, асья кыа гордыс орьясис да биавижон воссялис, а ай сюзь некон на эз тыдав. Сэсся и шонди петис. Нюрвывса сус пуяслон йыв лыскыс руч гон рома лои. Энь сюзь быдон тиркмуни тасысь. Юковтис да визлалан дойо ыдждис кынём сюмаломыс. Ёсь гыжъя кокьясыс зэлалисны, лэбзьом водзылын моз сюркняммисны. Дзескодом пиыс чужйыштчис, вөршитчыны кутис. И энь сюзьос венис аслас кыйсян руыс, сатшкис гыжъяссө улысас кылан вира шоныдас.

Дугдис пиыс тигйысьны, да энь сюзь кыскис гыжъяссө, вешйыштитис да видзодлис ичотик гырды ёкмыль выло... и горша забнитис.

Они энь сюзьос мыйко эз нин кут позьяс, дай кынём сюмаломыс нботи на эз веськав. Вылын шондиодзыс сылы позис на кытшовтны матигогор вурсө. Паськодлис позялом бордыясө да коейылис нин лэбзыны, и кылис болскөм.

Энь сюзь ланьтөдчылис, сэсся збоймөдчис да ватликтис джадж дорышо, бергодис юрсө болскөм шы выло. Виччысьыштитис да адзис раконопья да пицала мортос, коди петис ройөссөм козья ворысь нюр дорөсө, асья шонди инманино, сулалыштитис сэни лапьялан синмон да вөрзис чугралань.

Дыр нин эз воны сийо татчо, тувовья чаромсяныс. И понтом тайо порйо. Сийон энь сюзь эз и пыдо борынтчы горсыяс, сайодчы локтыссыс, а чугра увсяныс тыдалан выйо на бурасис.

А понйыс ко воли, эсько кузь лунтыр энь сюзьлы узыны эз сет, эралис да вурзалис, сэсся тривксөдис нелло да гогыльтчис кутшомко вутш

выло, синьясыс куньсаось, а шоша гоныс мудерлон век сувтса.

Узьо на, колөко, воли да эз кывлы гуын олысь, мый сы динө локтоны. Мышкыра мыччысис югыд вылас, кор нин сийос чукөстисны.

Сэсся энь сюзь сюся кывзис чугра улын кык мортлысь сернисө, быд гораджыка шуомысь вөрзьөдлис пельнас.

— Куломыд али ловья? Ардальон!— сибөдчис локтысь гу вом дорө да чукөстис, ас кежас содтис:— Огради мя, господи!— и өдийджык пернапас чөвтис чургөдом кык чуньон.

Гуын олысь, кыло, ымөстис.

— Ловья на тай, от сна востав,— шешмуни локтысь да мездысис раконопсыс. Пуктылом пицальсө борлэптис, кой бедьос моз ствол помодыс кутис.

— Тэныд эсько мед... эг нин шыасылы!— мыччысис да вомалис Ардальон, эбөстөм вывсыс бауасыомон пуксис из выло.

— Спаси, господи, да ылөджык мед татшом грексыс.

— Вежа юрой, шу, усяс. А ме коть мед тшыглы кула. Гач кизьос нин ог вермы кизявны.

— Со тай вайи, жаявтөдз кыски. Нянь и, кос яй и, сакар и. Лук на тшотш, мед пиньыд оз гылав.

— А водзджык эн вермы? Медтө эсько йормодны, ог-ө, шу, мынлы.

— Ме тэно йормода? Эн ачид йормодчы, шыш-олөм вылас пет? Мун кытчо гажыд, да менам тшотш ковтом шогыс бырас, вот!— зяткис-воchauvidзис локтысь.

— Муна кытчөкө,— нерыштөмон сетчис Ардальон.

— Либо и чөв ов, видзө ко гоподыс.

— А мый дон нин ме тэныд кыйивийи, да тшыгйодны сэсся колө? Босьта ко эсько ловтө Гурейлысь!

— Лов босьтысь! Кызь во нин коскодзыд ош капканын, да жерьявны лысьтан? Косьышта вот ныр вужьяд, отка пуля сюя да, некод оз и төдлы. Тэ өд абу нин таладор югыдас!

Ардальон нетшкысьыштитис ыджыда лолалитырайи, ки мышнас чышкыштитис абутөм синвасө, нора шыасис:

— А мый эськө сы дыра эн волы?

— Эз нө лёкав? **Керкасыд көть** он пет вөлі. Эсіян сибалисны и. Ошинь увті трактор туй вөчисны.

— Оз на мунны?

— Мунасны, виччысь! Кодкөлун на кер мында труба налы вайисны. Но, вай ректы, нопсө ог коль.

— Мунан али мый нин?

— Менам кузь на туйыс,— шуис Гурей да ачыс копыртчис разны нопсө.— А тэ аскомысь Горва дінас петан, чегөм ниа дінас. Ме катны кута. Тывйыштам гоз-мөд йир.

— Час, верма кө,— нурбыльтіс Ардальон.

— Верма кө!— вежыньтіс чужөмсө Гурей.— Мед вөлін, кытөн шуөма. Ме сэсся уна ог төд.

Недыр мысти Гурей бөр нин болскис. Ардальон пукаліс мышкөн да лы йиран пон моз сөмын друг видзөдлывліс бөрвылас: поліс төдлытөг лыйөмысь.

Сэсся Ардальон пыртлысис да чөв усылі. Бөрынджык энъ сюзь кыліс сылысь сакар кажөдөм да кос яй гирскөм. Та вөсна нөшта нин мустөма коли энъ сюзьлөн тайө луныс.

Рытъя-войнас, еджговмис енежыс да, энъ сюзь петіс ортсө горссьыс, тапикасыштіс джадж дорышөдыс, шенасыштіс бордьяснас. Сэсся кыпөдчис сьөкыдапырысь да ылынылын рудалан кырталань жө нырвизьсө босьтіс.

Сынөдас сылы кокныдджык лои. Паныдакодь рытывлун төв гыөн-гыөн локтіс, да позис кузя өшөдчывны төвру вылас, качана исковтны. Эз сэтшөма и мудз, мыйда лэбис да.

Карта йылысь, керкаяс мышкысь, джуджыд козсө водз на казяліс энъ сюзь да кытшов вөчис бура ыджыдөс, мед коз сайөд улас жө и пуксыны козьяс. Но матө нин кутіс воны, и син улас уси ай сюзьыс: шевгөдөм бордьяса, лётмунөм юра, өшаліс сійө кока жытник пельөсө зурасысь потшөм весьтын, кык майөг костын.

Жытник улас, йөрсьыс ортсын, куйлісны ыжа-межа, тривкьялісны куим баля, мыччасьлісны эжа вылас. Со эськө и яйыд, но энъ сюзь эз вошты садьсө, шывнитіс коз бердөд бокшаног, эз весиг букөст аслас өт-

тшөтшья повзьөмысла да бара на тшыглы кольөмысла.

А ай сюзьлы колян войнас быть вөлі вошты садьсө. Ньоти шытөг эськө лэччис сійө жытник сигөр помө, но пон казяліс сылысь вуджөртөмсө. Ныр йылыс сөмын ортсын, аслас чомйын узьө вөлі понйыс, а вот тай казялөма, эргыны кутіс, сэсся и увтны.

Мышкөн нин сылы ай сюзь пуксис, гөнтөр оз вөрзышт, а пон оз өвсы. И жытник увсаыс сы понда весьөпөрины, гыөны, кылө, а оз петкөдчывны. Эськө өти баля көть мыччысьліс здук кежлө, тшапкис эськө сійөс ай сюзь, и мед сэсся понйыс мыйда көть увтө.

Лыйөм шысө ай сюзь усигас нин кыліс. Турбыльмуні жытникдорса эжа вылө да лют-лёт сөмын и вөчис.

Керкаысь, сарай өдзөсөдыс, петіс сэки дөрөм мыг кежысь пөрысь нывбаба, пицальсө киас на кутіс.

— Бара баля ковмис? Вот тэныд!— локтіс жытник дорө да шуис нывбаба. Сэсся лэптис кулөм ай сюзьөс да өшөдіс кык майөг костө.

Коркөя паськыд звөз пыдди керка сарайө өні катөдіс важ джодж плакаысь вөчөм тас-тшупөдьяса пос. Сэтчө, пос вылас, и чуймис нывбаба гортас бөр пыригөн нин.

Кыа быгөра югыд вой кывтіс парма весьтөд, и ылі нюр шөрын кыпалысь чугра быттьө өшаліс сынөдас лөзов тшынысь кыөм вөнь помын. Тайө и чуймөдіс нывбабаөс, видзөдліс сэтчань да.

Нывбаба шойччөдыштіс синьяссө да выльысь видзөдліс. Збыльысь, чуграсянь кайис тшын, вомөна потас моз водзө на визяліс йөвва рөма вылі енежас.

— Лызя кадө кө эськө... коді сэн?!— киргөмөн шуис нывбаба да кайис поскөд, зымкнитіс сарай өдзөснас, потшкаліс.

Но шань унмыс пөрысь нывбабалы тавой некутшөма нин эз волы. И гожөмбыд сэсся эз волы. Мый вөлі ныровмунлас кытчөкө, сійө и шедлас. Да нөшта — код юрөн кө усылас.

Энъ сюзьөс, көть и өтнас коли, гожөмыс эз жө лышкыдөд. Котра-лысьыс и лэбалысьыс, быдөн гожөм-

над быдтысьоны да зэв гусьон олоны. Весигтö чуқчыяс, кодъяс оз тöдны тайö тöждсö, дзесьсьомöн олоны. Қойтсьом бöрас найö вежоны тувсов гоннысö да медся лёкинсö корсьоны.

И көчьяслөн гожомнад суюслуныс тырмө, эськө найö быдөн жö медводз ас пондаыс олоны да. Оз пышйыны уськөдчыны, а öдийджык кытчөкө суйсьыны.

Қык вой öти көчөс энъ сюзь кыйöдiс. Удитiс көчыс вужля улö пырны да оз пет и оз пет, быттьö аддзö и кылö, мый энъ сюзь сийöс вужля пель йылас виччысьö.

Сöмын мөдөд войнас, асья вылыс, петiс көч вужля улысь да муртса исыштiс сынөдсö порота ныр-вомнас, бöрдана горөдöмыс эз нин кузя артмы: чуқля шыла кодъ гыжъяс кыкнан боксянныс сатшкысисны сёлөмас.

Арыс энъ сюзьöс тыр-бура нин могмөдiс. Со и талун кутөм ондатраыслысь кузь да нюдз бөжсö эз орйөдлы, а бөвийдлiс нырас да ковтöма уськөдiс чугра улö.

Ардальон буретш вöли петöма гусыс, да ондатра бөжыс усис сылы ныр улас.

— Мыдсалiс?— шуис Ардальон да чиршөдлыштiс энъ сюзьöс чуньнас. Сэсся ыджыда ышловзис:— Лөсьыд тэныд! Некод нинөм оз юав.

2

Посводз öшиньöд шондi дзирдасис.

Вешйöма, тыдалö, войнас йиджыс, и вой тöлыс лешмöма. А тöрыт рытнас сэтшöма ыргис, кымöрсö вöли ёкмылялö да пуркөдö, лым пычкө. Сэсся катша шыдөс петалiс, бөръя корьяссö кыз пуяслысь шырзис.

Бара Яков посводзын палялiс Ревекка: улысас йöра куысь шыръяноп, векни да кузьмөс, нортөн кыскалан, а вылысас важ ыж ку пась, юрувт пыддиыс Яковлөн вöралан гачыс.

Вөрзьөдчынысö дыш Ревеккалы. Пöжсьöмысла гөгөр рушмöма, валежник моз сьöктаммöма, весигтö юрсиыс ульсалöма. И юрыс быттьö уль сейысь.

Оз на тай быд шоныд лөсяв. Абу на аслад паччöрад, куш рузум вылад, дөрөм мыг кежысь узьöмыд. Паччöрад, сэн кос пөсь, лы-сьöмтö небзьөдö и кокньөдö, юртö вочасөн сөдзөдö. Садьман да көдзыд ва көш юан, и вылысь морт, көть ем пысалан.

Горш косьмөмыс и пальөдiс Ревеккаöс: нерөд моз доякылiс, шомакурыд кыскөдiс морөспань увсьыс. Горөдны эськө Яков гөтырыслы, Еленалы, мед юны вайис, да сылөн вомыс кысьыс и коксьыс перыд, бур пöт дөжналас, вöлись ва көштö мыччас.

«Юан да кодалан... Садьтö он нин төд... Ачид сизимдас вылö нин петöмыд-а...» Бара кутас лыддьөдлыны юр весьтас, сiдз нин шөгөдö-а.

Лөсьыд сылы, Еленалы, бур туяд пуксьыны, вина румкатö бөрыньтны да йөзтö төдны. А мед сылысь, Ревеккалысь, олөмсö овлiс, кодарö эськө сэк долис?

Да и пыдди на позьö пуктыны, кодi сэтшөм Ревеккаыс. Қымыныськө во гөгөрнад ышмылас, да торшөдлытөгыс быттьö оз нин позь, быттьö удждысьöмөн да дзайгысьöмөн юö, Ен мед видзас!

А кодi кык да куим норманас тыртлö, ветымын туланөдзыс кыйлö? Кодi эстөн медся вылын, гөрд пөв вылас? Бажукова Ревекка Ильинична! И он, буракö, вушты!

А скөрмас да пенсия вылö кө лэдзчысяс, локтö тай, майбыр? Чотикасяс сэки промхозыдлөн пушнина планыс! Но абу на туска синма, кыс-кокыс оз на тшөктөм виччысьны, и кань олөм вылад Ревекка оз на ышты.

Пармаыс и гажыс сылөн-а! Лунтыр собалас да чөскыд мудзьыс öтдор нинөм оз кывлы, весиг кынөм сюмалөмсö. Гырк пытшкөсыс быттьö абу. А нодья дорö кө войыс суас, нёнпом кага моз небыд лыс вылас сывкмунас-унмовсяс, некутшөм вөт оз аддзыв, некытчö вөтнас оз усьлы. А водз асывнас садьмас, да быттьö кулөма и медся югыд сисьсö енмыс сылы öзтöма: асья кыа кодзувыс орчча коз пу йылын ырнялö.

Пармаас эськө и кувны да!

Ывлаысь тшын көр кылiс, юмов

сора, быттьо кӧнкӧ матын дьӧгӧдь вийӧдисны. Дерт, Яков тайӧ мыйкӧ вӧчӧ, гашкӧ, капканъяссӧ сирваын пуӧ.

Чечӧдис асьсӧ Ревекка да кайлис сарайӧ, довъялигтыр петис ывлаӧ. Шондисьыс-ӧ, сӧстӧм сынӧдсьыс-ӧ гудырмылис юрыс, кильчӧ содсӧ муртса эз лыдды, сӧсса гудырыс юрсьыс бӧр зӧв ӧдийӧ сӧдзис, быттьо визув ваӧн мунис. Синъясыслы сӧмын сьӧкыд на вӧли, лапъялисны помала.

Сунтола туйӧд, кырта бердти, лӧччис Ревекка Ленва динӧ да медводз бур пӧт юис шондиӧ кодзыд васӧ, гашкӧ, содз вит, сӧсса пожъялис чужӧмсӧ, балябӧжсӧ, веськӧдчис, и синъясыс эз нин лапъявны.

Яков и вӧлӧм тшыӧдчӧ, аслас улыс кум динӧ кузьмӧс бипур пестӧма да додь сювъяс пӧжӧ. Кыйсьыны петны водз на, и Яковлы уджыд сюрӧ.

А сюсьлуныс Яковлӧн и сидз абу водзӧса, аслас тырмымӧн. Весът пасьта вома кӧрт трубаторъяс вайӧма, буритчысьяслыс ӧновтӧмсӧ, и на пытшкӧ сюялӧма кыз пуыс лӧсалӧм додь сювъяссӧ: оз ӧзйыны би вылас и бура шоналӧны. Майбыр, оз нин ков важ моз пачын пӧжны, мед ныр кусыньсӧ вӧчны.

Ревекка локтис бипур динӧ да копьртчылис, косьтысьыштис. Виччысис, мед Яков водзджык мыйкӧ шуас, а сийӧ чӧв олис. Аслыс Ревеккалы ковмис шыасьны:

— Эн дивит.

— Ог и дивит,— муртса и серӧктыштис Яков да сьӧмдылис.

— Тшӧтшьяӧсь, а ме ногӧ нин пӧрысь,— дӧжныштис Ревекка.— Серамыд нин оз артмы.

— А осколокыс?— лӧгасьлис Яков да инмӧдчылис морӧсас.— Скӧрмӧдчан сӧни!

— Кольӧма нин тӧа-меалӧн скӧрмӧдчан кадыс,— сьылыштис Ревекка.— Пасибӧ, бара на узьтӧдин.

— Посводзад узьтӧдӧмыд! Керкаӧ он пыр-а, чужьясян.

— Ёна кодалӧ?

— Быдӧнлы тай вӧли морӧсас кутчысян.

— А кучки эг... кодлыкӧ?

— Меным,— висьтасис Яков.

— Мыйыськӧ?

— Пыжад вӧли пуксян, мотортӧ нетшкан, гортӧ пӧ ката, а ме ог лӧдз, мися, путкыльтчан кытчӧкӧ, да сыысь.

— А тӧныд эськӧ кучкыны и колӧ да, кыкнан пель бокад на,— яндысьтӧг шуис Ревекка.

— Но?!— чуймис Яков да весиг бӧрынтьчыштис.

— А мед эн вӧрзьи Югид-Лягасьыс. Тӧ вылӧ видзӧдӧмӧн и мукӧдыс сӧсса. Ӧтнамӧс менӧ колинныд.

— Ме ӧд школа понда. Нӧльӧн менам сӧн велӧдчисны. Дерт, гажтӧм ӧни тӧныд сӧни. Кывтӧ шуны некодлы.

— Мый эськӧ гажтӧмыс да. Забеднӧыс-а. Быттьо некодлы нин ковтӧм. Кулан коркӧ, да оз и тӧдлыны.

— Лок жӧ татчӧ дай.

— Кодкӧ ордӧ?— вомалис Ревекка.

— Кылӧдны позьӧ керкатӧ. Отсасны косявны и лӧптыны. А то и тӧвся туйӧн на воас, тракторӧн. Эз нӧ коркӧ директорыд шулы?

— Косяла керка, эг аддзыв!

— Либӧ и пыид динӧ, кӧть тӧв кежлас. Ошйысян тай вӧли, патера пӧ Угдымысь сетӧмаӧсь.

— Ме бара некытчӧ ог вӧрзьи. Кытӧн чужӧма да олӧма, мед сӧтӧн и кула. Ме кильчӧ вылӧ пета, да пармаыс и Урал-изйыс син водзын. Ньӧти ном гожӧмбыдӧн оз курччыв.

— Быттьо ог тӧд,— нубыльтис Яков.

— А мый эськӧ эльтчан?— ыззис Ревекка да, мед лӧньӧдыштны асьсӧ, кытшовтис бипур гӧгӧр.— Аддзӧмыд оланін! Лолыштны ыджыдджыка он лысьт!

Сиктсайса пожӧма ягын, сувтса пӧвйысь вӧчӧм джуджыд потшӧса йӧрын, видзисны сьӧд ручьясӧс. Быд асьыс, идрасьӧм бӧрас, сӧтисны руч сӧтсӧ, и пасьтала разавлис мустӧм кӧрыс. Тайӧ мустӧм кӧрыс и воис буретш.

— Ньӧти ог эльтчы,— дорйыштчис Яков,— а пӧрысьӧ-нӧмӧ дыш нин бара вӧрзьины. Эськӧ бырлӧ жӧ гажӧй да. Кувны кута да, гашкӧ, Югид-Лягаӧ и тшӧкта дзешны. Вожа сус пу улас.

— Но-о,— бурасыштіс Ревекка.— Сэн жө өд тай коркө... быгыльтчылін ме дінө. Сэссия мый дыра менө эн лэдз... курчыны ковмис веськыд китө.

— Быдтор өд помнитө,— шыннылыштіс Яков да гормөдчан беддён дыр лөсьөдаліс бипурсьыс шомсө.

— Быть өд помнит,— виччысис да кывкөрталіс Ревекка.— Ыджыд луныс сэссия меным эз нин и волы да.

— Некод эськө тэнө эз тойлы... сэтшөм сан саяс. Эн нин ньоти вежөртөм вөв.

— Асьтө Еленалань шыбелитіс да!

— А мый нө, мед бара курччин? Йөз серам вөчин? Колө вөрө петны, а ме китөм.

— Кынды кадыс воис на, виччысьлөма кө вөлі. А комсомоллы, тэныд мед быдтор өти здукөн!

Яков лигышмунлі, мыжаөн тадзи асьсө петкөдліс. И мед көдзөдны Ревеккаөс кольөмаас водзө пырөдчөмысь, кежөдіс сёрнисө:

— Дышөй эськө панлалө нин, да бара на кымынкө додь сюв перйи. Мыйкө артмылас кө...

— Век өд асьсө омөльтө,— ылаліс Ревекка.— Быттьө вомдзалөмысь полө. Вөч меным выль норт, кузьджыкөс.

— Бара коркөя руыд босьтіс?

— Медбөръяысь!

— Йөйтав!— вомаліс Яков.

Кымынысь нин Ревеккаөс воштылісны. Ляпкыд лымйөн на мунас вөравны, да вошлас и эм быттьө, некысь ловъя юөр, лямба туй ни понкок туй весигтө. Коркө выль во бөрөдз эз лок. Вөлөмкө, Урал-мусюрсө вуджалөма, медся джудждыдінтіыс. И со бара мөдөдчө, кузьджык норт тшөктө вөчны. Век на важ эбөсаөн асьсө чайтө.

Өтитортө кыкысь шуны Яковлөн абу велалөма, но тайө пөрийө эз вермы кутчысьны:

— Йөйтав!— выльысь шуис.

— Өдйө өд повзяс,— кедзовтана серөктіс Ревекка.

— А мый нө... с-сэтчө... ку-кувнысө?— мыкталыштіс Яков.— Мед корсьны ковмис!

— Вөчан он кузь нортсө, сійөс тэ меным висьтав, а сэссия асьсыд шөгтө шогав,— велөдана дольыштіс Ре-

векка.

— Вөча, зэв кө тай!— лэчыда вочавидзис Яков, но эз на инась.— Мынлөма, тадзтө кө!

— Эн эськө урсась!— водзөс косөдіс Ревекка.— Ме тэныд кучкылысь лола на. Сөмын ог нин код юрөн, а садь юрөн.

— Дугды, көдзыд ва вылад бара на босьтөма. Лок, тшай юам. Пөсь чериняньөн.

— Некор.

— Буалас-буалас, сэссия некор!— чуткис Яков.

— Сійөн и некор. Пачөй ломтывтөм. Понйөй вердлытөм. Колөкө, авзө нин. Ыжъясөй век на жытник улынөсь. Сёркни кор мездор сөмын шыбитлі. Йөткышт, лок!

Ревекка пырис аслас пыжө да лэдзис моторсө ваө, кымыныськө посниа кыскыштіс көвйөдыс, сэссия вынөн да кузя, и моторыс равөстіс ю тырнас. Яков лэптис якөрсө, йөткыштіс пыжсө.

Бөж вылас сьөкыд пыжыд өдйө и бергөдчис, кывтыдө ныра лои. Ревеккалы эз и волы тайө юрас, мөдөдчис.

— Көні нө гортыд?— горөдіс Яков.

Ойдөм Ленва пасьтала нуис васө, да торъя визувин эз и төдчы. Сикт кывтыдпомса чукульөдз лэччыліс Ревекка, сәні вөлісь казяліс, мый Печора вылө петө да ньөжмөдлытөг и бергөдчис, катны кутіс.

Яков весьтө вотөдз Ревекка ньөжмөдіс, сетчыштіс береглянь, куткыртчыліс, быттьө вугыр сійөс босьтө, да бөр пыркнитчис кынмысь лэбач моз. Вазьылөм синъясыс югнитлісны:

— Ог висьтав!

— Мый он висьтав?— повзис нисьсө чуймис Яков.

Ревекка помөдз ыджөдіс моторсө да вылын ныра пыжөн чепөсийс Ленва катыд.

Виччысисны кынмалөм, а бара на вежон дорвыв зэрис. Ош нитшкыс бурөвөй гөгөрын ютшаліс да вольсыштчис, а лайковинъясас артмалісны пемыд дизьгун ва гуранъяс.

Удж эз джөмдыв: став колантор-йыс на тырмис. Вит дизель, өтсөр муралиг, лөсялана шыалисны гым-төм арся зэрыслы. Медтыкө сөмын бара авария оз ло.

Талун шондыс гождөмын моз оньодана сывтыръялис мусө. Ва гураньяс весьтын пондис веравны сынөдыс, отсалис тойтнысө выльөн чужөм геждодик номьяслы. Бөр югыдвемисны матыс козьяс, вөрышталисны да веськөдалисны топавлөм вожьяссө. Виж чышьяна пыстаяс лывкөдчисны на вылын.

Сөмын коньөр кызьяс, кодьяс быдмисны Горва дорөсын, эз нин долыдасыны: чөв усины кортөммөмысла. Вылөдз еджыдалисны налөн воссьөм пучерьясыс.

Павелөс дзугыльтөдыштіс таыс, весиг сувтовкерліс да ышловзис. Чусмысь би моз жө вөрзөдө коми морттө шогалысь вөрпуыд.

Асывнас, чеччөмөн тшөтш, ветліс Павел бурөвөй вылас да эз аддзы коланаөн быть лунйыны сэтөн аслыс. Мөвпыштіс кытшовтны матигөгөрсө пищальөн, пальөдчыштны. Манитчыштіс сөмын рация дінас: век медся бөрын сылысь юасьөны експедициясыныыс.

Горва ызөба муткыльтіс горув, быгльөдліс кось вылысь посни изьяссө орчча йирө. Уна вевсьөн гөвкьяліс йир пельсө, лөньтасө, чукөрмөм турун да пу кор. Ёсь ныра ичөтик сьөд шыр котраліс сәті да тшөтш лыбавліс-лөччывліс. Казяліс вылысас воөм Павелөс да тюрөдіс косө, воштысис шактар пытшкө.

Бытгө водзвыв төдөма, мый кодкө таті вуджысь лоө, кутшөмкө төв ныр важөн нин пөрөдөма кось вылысладорө ыджыд коз, буретш ю воmöныс и швачкөбтөма, бужөдсянь бужөдө. Сы кузя и вуджис Павел мөдарас, усьөм-доровтчөмсьыс чурвидзысь увьясас кутчысяліг. Улыс увьяссө козйыслысь ваыс чегьялөма, а сәсся и черөн на кодкө өтилаті босьтышталөма, пыжа туй вөчөма.

Павел кайис йөнөдас. Ройөссьөм пөрысь козьясыс пөдтісны тані дизельяслысь гора шысө. Налөн мура-лөмыс бырана «у-у»-өн нин кыліс, а муныштөм мысти и дзикөдз сайкаліс.

Виччысьтөг көнкө шыасис сьөла. Павел ньөжмөдіс, суйис вомас перна моз бовьялысь көрт чипсаян да воча «пи-пи» вөчис, сәсся, кывзысиг, лажыньтчис дінас лөсялөм коз улө.

Сьөла недыр кежлө ланьтөдчыліс: полис, буракө, сорассьөмысь, майшасис дона юрнас. Но, тыдалө, эз нин вермы инасыны — бара шыасис. Павел небыдджыка нин, ловсө кутыштөмөн, содтөд ызйөдіс. Та бөрын здукыс коли ли эз на, а мышланяс шпоркыліс.

Кутшөм пуө нө пуксис? Йывланыс али улөджык?

Павел бергөдчис шыч ни рач да пондис кыйкьявны. Сьылдзир мудзтөдзыс чатрасис, но некысь эз усь сьөлаыд син улас. Воськовтіс коз увсьыс ортсө, и сәк жө весьтассьыс моз «пить-пить» тэрыба кыліс, а сәсся и жбырмунөм.

Кутшөм кыйсысь эновтчас татшөм дэльөдөм бөрад? Октөм пишальөн Павел веськөдчис сылань, кодарө лөзовтіс-лэбис пөтка. Но бара на эз мойви Павеллы. Сьөла водзджык казяліс сійөс да жбырөбтіс, өвтчысь коз лап сөмын колис ас пыддыс.

Сөмын тайө пөрийө Павел вежөртіс нин сьөлаыддысь ас ногыс мудералөмсө: вөлөмкө, лэбас-лэбас да друг чукуыльтас пуксьытөдзыс на, мед пөрийөдлыны корсьысьсө.

Тайөс артыштөмөн, коймөдысдтө, Павел эз нин веськыда сибөдчы, а неуна шуйгавыв сетчыштіс. Шуд вылад, тшук сәсся и воис — ылысянькодь на гоньялысь юрсө казяліс. Локтыштіс мышкыртчөмөн, пөлыньтчыштіс сайөдсяныыс и гымөбтіс. Сьөла турбыльмуні пукалан вож кузяыс да шмоткысис муө. Вежлым моз гылаліс бөрсьыс чирйыссьөм лыскыс.

Павел суйис кыйдөссө плащ зептас да кокни сьөлөмөн мөдөдчис водзө.

Еджгов нитшка, вөрзөдлывтөм на сус вөр воис. Чунь кузя мугов лыска, паськыда шеныштчөм вожьяса пуяс тырөн нюжөдчисны енэжас. Та вөсна и эз вөв сәтшөм гулыд, көть эськө пучерьясыс и гырыся коставлісны.

Мустома, тшөкъялөмөн, горзисны перкьяс. Найо пыллысны воом сус кольяссө да чиркисны-вензисны пөтнытөмнысла.

Неылысь, мусыс вылысь, шур-шар кыліс да трачмунөм. Шуйга пельпомсө водзлань докнитөмөн, Павел уськөдіс воысавлөм пищальсө лөсьөдөм веськыд киас. «Гашкө, дозмөр?»— визьётис юрас чайтөм. Бөрйиг нитшкаджыкин, мед не кокшыгасыны, ньөжйөнник сибөдчис. И аддзис... юра лазья да лэптөм гөленя бакилөяса мортөс, коді сулаліс мышкөн да кузь зібйөн гылөдіс зэв ыджыд сус пуысь кольяссө. Дінас тыдаліс неуна нопья нин мешөк.

— У-ув!— эрыштіс пон моз да горөдіс Павел. Тадз жө коркө шмонитөмөн повзьөдлісны асьсө.

Коль вотысь ойөстіс да ляпмунлі повзьөмысла, а сөсся швырк-бергөдчис да ырыштчис зібнас:

— Ок эськө вот!

— Ме өд пищала,— серөктіс Павел.

— Мися, коді жө?— шай-паймуні мөдыс.

«Ныв кө-а?»— чуймис Павел, кыліс осьса небыд гөлөссө да. Видзөдліс сюсьджыка. Ныв и эм! Чегыштөм сьөд синкымьяса, дзебсьыштөм-вөйыштөм пемыдвез синьяса. Гожьялөм зэлыд бандзібьясыс төдчөдөны шөракостсыныс лөсьыда тшөтшмаммөм ичөтик нырсө. Вөм дорьясыс гөрдышталөны, быттьө сөмын на пывсянысь петөма.

— Ым!— төдлытөг яндысьтөма артмис Павеллөн.

— Видзөдсис?— парскыштіс сійөс ныв.— Чайтан, пола?

— Мый мөысь повнысө? Абу өд шыш.

— Но и мун, кытчө мөдін. Эн тан сулав.

— А ог на кө?

— Но-э?!— нерыштіс ныв.

Павел быдөн шөйөвошлі, сөсся көсйыліс нин вешйыны, но кодкө быттьө өлөдіс на.

— Кысь нө тэ? Горвадінсьыс?— юаліс Павел.

— Енма-муа костсыс,— ярскөба вочавидзис ныв.— Эн, мися, тан сулав!

— А ме татысь, бурөвөйсыс.

— Аддза нин: му тшыкөдлысь.

— Кутшөм му?

— Кутшөмөс розьөдланнуд. Мед эськө нинөм оз сюр!

— Сэки тэ сюран, тадзтө кө!— шпыньмуні Павел.

— Кытчө сюра?— падмыліс ныв.

— Меным, гөтыр вылө. Локта и корала.

— Воыс. Лыскоөс усьөда, да гачтөг колян.

Нывлөн татшөм кывьясьөмыс ньөти эз дөзмөд Павелөс, мөдарө — өзйөдіс. Мый нин эськө сылы, важөн гөтыралы, тадзсө кывнас печласыны, а вот тай артмө.

— Вай ме гылөдышта кольяссө.

— Тэтөг нин кызкө.

— Он өмөй пов өтнад?— вылысь пондөдчис Павел.— А ош кө локтас?

— Öткодь, кодөс зібьявнысө. Довгы, сійөс төд.

— Ог тэрмась.

— Он кө, и доймалан,— долыштіс ныв да чургөдіс зібсө, дась тувкыны.

Павел өдйө шамыртис зібсө чурвидзан помөдыс да вынысь кыскыштіс асланыс. Сы киө вуджис зібйыс. Ныв уськөдчыліс бөр мырддыны, но эз лысьт дінасьнысө, оськов вөтөдз джөм-сувтис.

— Вот тадзи,— нюм сорөн гарыштіс Павел.— Он кө висьтав нимтө, ог и сет.

— Пөдөра,— пыльсунлі ныв.— Вай зібсө.

— Ог на,— төдчөдіс Павел.— Ме кута гылөдны, а тэ өкты. Но?

Ныв эз вочавидз, сөмын вөрзыліс, быттьө сулалан мудзсө веськөдіс.

Павел оськовтіс сус улө, чатөрөн корсис тырадзык вож да пондіс шарскөдны сійөс дорала зіб йывнас. Мынөм кольясыс кышакылігтыр усялісны муө, а өти тітшнитис юр пыдөсас да чеччыштіс ныв кок улөдз.

Ныв чиктыліс, но эз копыртчыв лэптыны весиг сійөс, ныр увсасө.

Тайө падмөдліс Павелөс здук кежлө. Мөд здукас сійө бара нин уджаліс зібнас. Гылөдіс бөрйылөм вожсыс, сөсся орччаясыс. Недырөн гөгөр куштіс судзан вуйөдз, өтка-өтка кольяс сөмын тыдалісны.

А вылын, пу йывланяс, сярвидзис

коллыс, чукөрөн-чукөрөн ошаліс.

— Час, ме кайла,— мөвпыштөмөн тшөтш висьталіс Павел.

— Ме вөсна,— дөжныштіс ныв.

Ышмөм бөрад өні Павелөс нинөм нин эз көдзөд. Сувтөдіс пу бердө пищальсө да зібсө, чеччыштөмөн судзөдчис кыз вожйөдз, лыбөдчис сой выннас да чапыштіс кок пөвнас, мовкнитчөмөн вожалаасис-пуксис, быттьө турник вылө; сэсся лолыштіс да водзө кавшасис. Пу шөрвьяс воис да кватитчис, мый зібсө тшөтш колі катөдны: кийд өд лөка дженьыд. Копыртчыліс да синмаліс мусө, мед тшөктыны нывлы мыччыны зібсө, аслыс этшаджык бөрсө лэччывны. Но ныв некөн матын эз тыдав, эз тыдав и мешөкыс.

— Педөра!— шмонитөмөн чукөстіс Павел, чайтіг, мый ныв сайөдчис кытчөкө тешитчыштөм могысь.

— О-а,— вочавидзис йөлаыс.

Вөлісь Павел гөгөрвоис, мый бура и пөрьясис. Но ньөти эз дөзмы, сөмын ас вылас серамыс петіс. Эз на дзык пыр и лэччыссы пусыс.

А лэччис да босьтіс пищальсө да, кыйсьөмыс и вуні, эз мунсы кодарөкө. Туявны окота босьтіс, кытчө тайө мичаник ёмаыс дзевсис: өд, төдөмысь, эз на гортас пышйы, татчө вөрас на ланьтөдчис, мед тыртны мешөкөсө.

Но сук дженьыд нитшкыс, көть и ульсалөма жө вөлі, эз тыдөдав тальыштлөминьяссө. Сэсся өд эз кызь пудья йөра, а ныв котөртіс сы вывті.

Кысь өні сійөс корсян? Абу тай сетлөма енмыс ли код ли мортыдлы понлысь кодь ныристө, кутшөма эськө ковлө мукөд пөрийө да.

Өти сьөлаөн и локтіс Павел бурөвөяс. Воськавліс на Горвасө бөр вуджтөдз сьөла котыр вылө, но эз ышты вөтлысьнысө.

Колі жө тадзи лоны: быттьө лежнөгассис, шоныда чөсөдіс морөсас. И вөтөн быттьө усылі нылыс, чежмөдлан гусяторйө пөри.

Нөшта и яндысьнысө Павел өні эз төд мыйысь. Дерт, гөтырыскөд кө, Галинакөд, артмана вөлі олөмыс, колөкө, Павел эз и вывтіась ныв водзын, шмонитөмөдз сөмын ышмыліс. Мед тадзи, век на веж зонмөн, ась-

сө петкөдлыны, эз и лысьт дай эз и сяммы эськө.

Но эз пуксы Павеллөн Галинакөд олөмыс, да, тыдалө, оз нин и пуксы. Мый нө, быттьө оз гозья олөм овны, а пөв вылын чеччалөмысь ворсөны, кытчөдз кодныскө оз бокө усьны либө, дышөдас да, дугдыны.

А коль вотысь нывлөн чужөмыс ваысь лэптан чери моз өдийө кутіс төдсаөн лоны, коркө кыськө аддзывлөмаөн. Мөвпыс Павелөс вочасөн косөдіс ылө нин кольөм кадө, вайөдіс Ленвадінса школаө, көні сизимөд классө помаліс.

Ленвадінас восьтісны интернат, и уна ылыс сиктъясысь на воалісны сэтчө томуловыс водзө велөдчыны. Воліс и Горвадінса тайө нылыс, сэки, дерт, косіник, жебиник нывка на. Сэсся сійөс вөтлісны ли ачыс пышйис, код төдас, эз тай бөрынас тыдавлы-а.

Физкультура урок вөлөма. Нывкайдлөн сэки, копрасигас, сьылісьыс ыджыд ыргөн перна бовмунас. Аскинас став школа водзас сійөс быд ногыс видісны, быттьө гусясьөмысь судитісны. И мырддьөм пернанас ныр водзас өвтисны.

Быдөн виччысисны, мед нывка мыйкө шуас либө көть бөрддзас, а сійө сөмын тіркмунліс да вомсө дугдывтөг восьтавліс, быттьө мыйкө шөпкөдіс.

Өні на син водзас тайө Павеллөн. И нимсө нывкаыслысь эз вунөд: Ангелина Мартюшова.

4

«Долотоысь бурджык геологыс абу». Шмонитөм эськө сөмын и эм татшөм шуөмыс, да неджөг моз пуксьө лов вылад, сэсся вөтөн и вемөсөн курдөдө.

Лысьтан өмөй, мед көть тэ кыкысь геолог, веськыда шуны, кыв сетны, мый сэтөнтө эм нефть либө газ? Он лысьт. Эн өд ачыл пуктыв либө му пыткас пырав.

«Вермас лоны»,— медся ыджыд кывкөрталөмыд тэнад. А бөрья кывсө, суд приговор моз, водзвыв колян долотолы: мый сійө висьталас. Дерт, кывзыясны кө тэнсьыд да шуасны

писькөдлыны сәтi, кытчö тэ индан. Виччысь сәсся во кык-куим.

А сәтчöдз тэ, уна вылö, сöмын и тöдан: кымынътöм пыж кодь кузьмöс да джуджыд муткыр эм му пытшкöсас, мегыр вылö мегыр моз кодкö быттö зэвтöма му визьöбъяс-сö; сәтшöминас чукөрмылö нефть да газ, найö век вывланджык уськөдчöны, йиджтысьöны измöм лыа лякöдас.

Некутшöм прибор на оз петкөдлы, эм-ö сән збыль вылас нефтьыс да газыс. Колöкö, мыйдакö сöмын. А мыйдакö пондайд оз сулав буритны: энөвтöм вылö керка ләптöм кодь жö татшöм уджыд лоö.

Но зэв нин эскöдана казялöм муткырыс: и местанас (вöвлöм саридз улын), и ыджданас, и тэчасногнас. И со нин тэ öтилаын да мöдлаын кевмысян да видчан, кызд мый верман тэрмöдлан, мед эськö öдийджык инасис тэнад чайтöмыд.

Но оз быдөн тэ ног чайтны, сәсся и видзчысьöны на, оз тэ моз ырсыявны. Öнi весиг зонпосниöс он аддзыв, мед кöмтөг лым вывти котралисны, а тэ гырысыясöс чуксалан. Öд код тöдас на, кызди бергöдчас тэнад подуласьöмыд.

Вискö йөрмöм чери моз тэ петанiн корсян и, медбöрын, Москваöдз воан, министерствоöдз. Бара кевмысян да видчан, мед вынсьöдисны кöть öти скважина да сьöм лэдзисны сы вылö. И тэныд воча мунöны, пыдди пуктöны да могмöдöны дзайгöмтö.

И со нин сьöд вөр шöрын, тэнад индöминын, бурöвöй шыалö да югъялö. Позьö нимкодьясьны. А нимкодьлуныд тэнад öтка сартас моз трачкакылö-сотчö, сьöд шомөн гылалö, гөрдоват чутö пöрö.

Медся шуштöм мöвпыс топöдö тэнö: «А тыртöмалас кö писькöдан скважинаыс?»

Оз на ков енлы эскыны да сылөн страшнöй судысь повны. И му вылас овлö сәтшöм судыс!

Тайö шогыс и сёйс öнi Иван Самаринöс, Угдымса геологöс. Весиг мöвпышгiс нин, мый вöчас аскöдыс, тыртöмалас кö Чугра муткырö писькöдан скважинаыс.

Дерт, абу быть Самаринлы по-

мавны асьсö. Некутшöм суд ни прокуратура оз мыжды сийöс, весиг оз гарыштны, миллион-мöд пö лои видзöма, да, гашкö, вештан мыйдакö аслад зепсыд. Зэв нин шуасны сылы, бара пö пöръялин да водзö оз нин кутны лыддысьны сыкөд. Но и мед, шуасны, позьö на овны.

Сöмын ачыс аслыс син ёран му-стöм лоö Самарин. Коркö öти кыйсьысьöс налөн сиктысь кутöмаöсь вөр керка ректöмысь да зорйö көрталöмаöсь шевгöдöм княссö, мун пö сәсся гортад. А кызд на мунан сiдзтö вөрöдыд дай кызд на пыран сиктад, кöть, шуам, мырдөн сорөн и воан коркö? Абу ылö и мунöма сийö кыйсьысьыс, медводдза шор гуранас суйöма юрсö. Тырмылöма на, сiдзкö, яндзимыс.

И Самаринлы яндзим ковмас тöдны, мед сöмын нинöм оз сюрлы Чугра муткырсьыс!

Öд ловъя на кö лоö, корасны сийöс (Москваö, дерт, оз корны) да петкөдласны доклад нога гижöдсö, кодөн сийö волiс министерствоö. Сәсся аслыс жö и кутасны гораа лыддыны сэтысь:

«Наибольший интерес представляет собой Чугринский вал, расположенный в средней части Печорской впадины. Это складка длиной 80 км, шириной 6—8 км, амплитудой 1300 метров. Её происхождение объяснялось боковым сжатием горных пород с Урала, что соответствовало привычной геосинклинальной теории. В настоящее время на основании комплексных геолого-геофизических данных нами установлено, что Чугринский вал образовался в результате сдвига горных пород на глубине около четырёх километров. Это гравигенная складка, и при бурении будет встречено повторение слоёв, то есть будет вскрыта плоскость надвига, под которой имеются значительные положительные структуры.

В интересах нашего народного хозяйства мы считаем необходимым приступить здесь к поисковому бурению и с этой целью заложить ряд скважин проектной глубиной до 5500 метров, то есть до среднего девона включительно. В первую оче-

редь необходимо пробурить западное крыло Чугринского вала (район д. Горвадин), что видно из «Приложения», где нами дано более подробное и конкретное обоснование перспективности всей площади.

Мы не сомневаемся в том, что в глубоких горизонтах Чугры возможны огромные запасы полезного ископаемого, как не сомневаемся и в правильности взятого нами ранее направления поисков, несмотря на тяжелую неудачу с Жеб-Ёлем.

Мы сознаем, что расходимся со сторонниками принятого сейчас в республике направления геолого-поисковых работ («Мы — не Тюмень») и тем самым как бы только распыляем силы, но тем не менее настаиваем на своем, нисколько не слагая с себя высокой ответственности за Чугру.

Мы верим в Чугру!»

— Но вот! — нюркнитомён шуасны сэсся Самаринлы да бергөдчасны сысы, бытгё несйыны көсйёны.

Оз, татшөм янөдөмсө Самарин оз нин виччысь, мунас вөрө, пырас кутшөмкө вужля улө и пезьдодас кок чуньнас пищальсө. Мед шойсө весиг оз аддзыны.

Он мортыд чайтлы, ыштө сэтөн овны кутан да сэтшөмтө удж уджавны. Сиктса мортыд торйөн нин он сибөд ни пөж бокын олөмтө да төдтөм уджтө. Сэсся и — кутшөм кадө на быдман.

Иван Самарин сиктын чужис да быдмис, Эжва йылын, бөръя пиён батыслөн, медся коланаён. Сөмын эз нин аддзываетьсө.

Воас батыс важ германскөй выльсы, революция бөрын нин, да шуас мамыслы:

— Ловйөн коли, да өти пи лөсьөдла на! Гөрдөс!

— А тайө нө кодъяс? — индас мамыс воддза кык пиыс вылө.

— Найө сар дырсяөсь на.

— Но, сэсся и абу нин тэнадөсь?

— Менамөсь эськө да... Оні ме ачым нин мөд!

— Вирыд өд аслад на.

— Со кыті төлалөма! — кикарнас зутш-зутш вөчас батыс аслыс юрас.

Но виччысян пиыд пыдди ныв чужас, абу тай көсйөм серти.

Батыс, дерт, оз на инась. Регыд и ошйыяс комбедас, бара пө нин гөтыр сьөкыд. Выль кагаыд сэсся пи нин чужө. Батыслысь нимсө и пуктасны сэсся сылы.

А батыс оз нин ловйөн бергөдчы, мунас гөрд отрядкөд Печора вожө да. Бөрынаас мамыс пуксяс вөлі бөрдны да бурөн и лөкөн казытөдлас сйёс.

Баттөгыд да, дерт, дзескыда быдмис Иван, но мөдарө кө — и збойпырысь, вильышөн на вывтиджык. Мамыс вөлі видны кутас:

— Майөгйыв катшаыд тай эм. Төрыт гачсө дөмлі, бара нин чашнитөма. Ок! — ырыштчылас.

Но өтчыд мамыс воліс жө кинас. Колхозөн нин вөлі сэки олөны.

Колхозаныс зэв ыджыд уж карысь, госконюшняысь, вайөдісны. Правление дорө, потшөсө, вөлі домалөмаөсь. Чукөртчисны зонпосни сы дінө. Кодкө сэсся и чуйдіс уж кынөм увтыс котөртны, коді лысытас. А коді нө полысяд пуксян? Öти да мөд, тшөтш и Иван, котөртисны. Сьөлөмныс ыркмулө, а пырөны уж улад. Сэсся и вельмисны, эз нин сэтшөм өдйө кутны быйкнитны мөдарас. А ужыд дөзмис жө, курччыны нин кыйөдө, сөмын мед судзлас; гырөдөмаөсь синьясыс, скөрысь корсейөдлө. Но, домалөма да, нинөм оз вермы вөчны. Тайө нөшта нин ызьөдіс зонпоснитө. Öти детина весиг пуксылыс уж улад, дерт, здук кежлө. Сэсся Иван пырис, ляпкөдчис жө бокша, и сэк чапыштис сйёс ужыд шуйга водз кокнас буретш пельпомас...

Бур, мый сөмын гирснитны судзөма ужыд, эськө жугөдіс Иванлысь пельпомсө подкова кокнад.

Вируля сояөс, повзьөмысла век на сьөмдалысьөс, вайөдісны Иванөс гортас. Мамыс зэв өдйө пөрччөдіс сйёс да видзөдліс дойсө, абу-ө кыткө чегөма. Зонкаяс сэк кості висьталісны, кызди-мый лои. Мамыс ышловзис да кызд тай дөпнитис содтөд Иванлы мышсыс улө, и шуис:

— Сэсса юрөн нин мед вөлі олө-
ма!

Водзө мамыс эз нин скöрав, пыр-
тис посводзсыс, зиб вымысь, выльöн
песлалөм ки чышкөд да көрталіс сі-
йөн пиыслысь пельпомсö.

Öнi на Самаринлөн тöдчö веськыд
пельпомас тайö важ дой туйыс, ве-
сиг оз и гожъявлы сэтi. А юалас кө
кодкө, кор майка кежысь овлө, мый-
ся дой тайö сылөн вөлі, висьталас,
мый сотліс би дорын узигөн. Аслас
эськө сэк нюмыс чепсасьö, но кут-
чысьö восьсөн нюмьёвтөмсыс, весь-
кодя бергөдчылö.

Бура велөдчис Иван школаас. Ры-
тын гортас, задача вöчигьясö, дöz-
мөдлывліс мамсö: гораа лыддяс да
мамыслы юалөмсö веськөдас.

— Лешакыс кө төдö-а,— дöжнась-
ыштас мамыс.— Ачылд öмöй он сям-
мы?

— Сямма.

— Мый сэсса менсьым юасян?

— Сідз,— серөктас Иван.— Мися,
верман он?

— Вай тэ нин вермөдчы.

А öтчыд мамыс петалис «гөрд пе-
льöсö», кытчö вөлі чукөртлөмаөсь
велөдчысыяслысь бать-мамсö, да
локтис нимкодъ и жугыль.

— Мый нö?— юалис мамыслысь
Иванлөн ыджыд вокыс. Сійö кол-
хозын нин уджаліс да верстьö туйö
пуксис.

— Велалö пö тай.

— Велалö кө, и бур.

— Бур!— дözмөмпырысь кайтыш-
тис мамыс.— Ковмас öд водзö велөд-
ны, тадзтö кө.

— И велөдам. Колökö, учитель на
петас. Ме отсала, ог на гөтрась да.

Педтехникумö сэсса Иван и пы-
рис. И, колökö, учительөн и петіс.
Во джын нин сөмын и кольлі техни-
кумсö помавтөдзыс. Иванлөн дум
нин вөлі: вöйысьны асланыс сиктö,
Кывтыдпомса начальнöй школаö, от-
савны ыджыд вокыслы керка лэп-
тыны, а аслыс пон да пищаль лө-
сьөдны, гудök да пыж ещö.

Но корисны техникумсыс кымын-
кө зонмөс, тшөтш и Самаринөс, ком-
сомоллөн обкомö да шуисны:

— Мунанныд Ленинградö, Горнöй
институтö! И мед вөлі велөдчöма!
Коді пышьяс, сыкөд ми кутам мөд

ног сёрнитны. Кыдзи дезертиркөд!

Татшөм öлөдөмыс эз сэтшөма пов-
зьöд, кутшөма чуймөдіс Самаринөс.
«Со кытчö ыстөны велөдчыны, да
абу кө йöй, он жö пышйы?»— пыр и
мөвпыштсис сылөн. Но шыасылыны
эз лысьт.

А пышйысьыд бöрыннас и збыль-
ысь лои на пөвстысь. Кыкөн на. И
мукөдласыс воалөмыс эз быдөн öш-
йыны институтас. Сьökыд вөлі ве-
лөдчынысö, а коліс на грузчикавны
да мый да, содтөд нажөвитны сти-
пендия дінад, мед кынөмыд пөтліс
и паськөмнад серам эн петкөдлы.

Колö шуны, велөдысыясыс төд вы-
лө босьтлісны тайөс да эз и лөкавны.
Профессор Тихомировысь кындзи.
Сылысь татшөм личлунтö он вич-
чысь вөлі. Йöра бөрся вөтчысь моз
песан асьтö, мед эськө аски зачөттö
пуктас. Мөмьявны кө сылы кутан,
кыв шуны весиг оз убöлит, öдзөс-
лань юрсö пöлынтьлас.

Кодкө, тыдалö, ёна нин норасьö-
ма, коркө сэсса и видісны таысь Ти-
хомировсö. Тырыс йөз дырйи. Виді-
гас ыстысисны эз сөмын сылөн чо-
рыдлун вылө, тшөтш и сы вылө, мый
тані унджыкыс коркөя гөль крестья-
налөн пиян, и мед эськө эз артмы
найөс бара увтыртөм.

Видөмсö тадзи бергөдөмсыс уна-
өн вежыньмунлісны, быттьö пука-
лан мудзнысö öттшөтш веськөдісны.
Самаринлөн руасьліс жö син водзас
яндзимысла.

А Тихомиров некодног асьсö эз
петкөдлы. Весиг гөлөсыс, сувтіс да,
абу и ёсьмыштöма, көнкө ва моз
солькьякылö:

— Ме геологьясöс велөда держа-
валы, а ог гуасысыясöс. И меным
веськодъ, коді кытысь петöма. Спе-
кулируютны тайөн ог лэдз! Менам
ставыс,— и пуксис бөр.

Кадыс сэки желлясыяна на вөлі,
видчысьны на коліс быдсяма йöй
мыждөмсыс, и Тихомировлы, төдö-
мысь, мөрччытөг эз ов татшөм усь-
көдчылөмыд. Пытшкас, колökö, пуö-
мөн пуис сылөн, сөмын зумыд морт-
ылдөн эз чискы руөн ортсö.

Регыд мысти та бөрын бара зачөт
колö вөлі сдایتны Тихомировыслы.
Буретш сылөн радейтана Палеозой
кадколаст кузя, кодөс сійö нимтіс

му олõмас Возрождение эпохаõн.

Некод эз кõсйы медводдзаõн пырны сы динõ. Кодкõ весиг шуис:

— Мõд гõн сылы оз нин пет.

А Самаринлы колõ вõлõ морской портõ тэрмасьны. Збыльысь артельõ нин сийõс босьтисны, да сёрман кõ, оз и сибõдны. И Самарин пырис — мый лоан ло.

Тихомиров эз кут сылысь юасьны, видзõдлõс жаляддза да чуткана нюмъевтис õтар банбокнас, сэсся босьтис Самарин кийсь зачёткасõ, пасйис да кырымасис, бõр мыччис.

— А-а..?— киргыштис чуймõмысла Самарин.

— Ог кут сэсся увтыртны тиянõс.

— А-а... ме али мый сидзсõ шули? Меным аслым яндзим вõлõ.

— Но, аттьõ, сидзкõ.

— А тõ юалõй мыйкõ. Тадзи али мый ме муна?

— Но, висьталõй, инõ...— кыкнан банбокнас нин нюмъевтис Тихомиров.— Шуам, брахиоподъяс йылысь.

— А ми найõс асьным аддзывлõм,— пыр и збоймис Самарин, зэв тõданатор вылõ уси юалõмыс да.— Миян вõр ю эм, изъя кыркõтшьяса. Ми сэтысь ком вугралам. И вот мукõд кыркõтшас сәни быттьõ гырысь пань лопьяс кодкõ кынтõма. Ми вõлõ кавшасьлам да черõн чуктõдалам. Миян кульпаньõн найõс шуõны, сәтшõм измõм ракпаньяссõ.

Тихомиров, дерт, та вылõ эз на бурась, чужõмыс ырнявтõдз на пõсьõдлõс Самаринõс, сэсся пõt вылысь моз кызõктис да чуйдис:

— А ме эськõ верми гожõмнас босьтны тиянõс аслам экспедицияõ.

— А-а... аттьõ!— нимкодьясла нин чуймылис Самарин.

Кык пõлõс мудз, юрислы и ки-ко-кыслы, вичмис сийõ луннас, и портсьыс воõм бõрын Самаринõс õтырышья узьны нёровтис. Но вермõдчис да аскисõ эз нин виччысь, гижис гортас письмõ, мый оз волы гожся каникульяс вылас, а ветлас экспедицияõ, сõмын оз на тõд, кытчõ.

Тõдлытõг усьõм шудсõ Самарин сэсся лун и вой пõжис, экспедицияысь нин и аддзис асьсõ гожõмнас. И ывлаыс сылы кивыв мунис: войтваõн луннас тёпкõдчис, лым сёян кымõрõн вой улас пемдылис.

Но õти лунõ пõжнысõ нинõм лои: профессор Тихомировõс пõ пуксьõдõмаõсь.

Эз ков сёысь мõвпыштлыны да вõлись нин вежõртны помõдз тайõ шуштõмторсõ. Джодж улын шыр моз кылис та сайысь кодьяслõнкõ суклялõмыс. Дыш велõдчынытõ, медтõ эськõ вõрõ дась песла моз сõмын институтад ветлыны, вот и õзтисны морттõ, мед, колõкõ, вермас кõ, кусõдчõ.

Унаõн, тшõtш и Самарин, шуасявны пондылисны, мый тайõ нин гусьõн пурõм, но шуасьõмысь водзõ Тихомировõс дорйõмыс налõн эз гынмы.

Колõс нõшта воськов вõчны, и Самарин ыштис да кõсйылис нин ветлыны кытчõ колõ (сылы нинõмысь повны, гõльысь петõм, батыс Печора вожын юрсõ пунктис красной дор), но босьтис да гарыштис водзвыв та йылысь Варнаковлы, бура нин тõдса студентлы.

Варнаковыс ветлывлõс жõ грузчикавны, и кõtь эз мудзтõдчывлы сәтшõма, таысь сы вылõ некод эз дõзмыв: сылы и уджыд õдийõ аддзысяс, сылы и тырвийõ мынтысясны, мыйта кõсйысьлисны. Пõръясьõмыс и то сылõн эскана артмылис: шуас «эстчõ эськõ миянõс корисны, да татчõ тай нин локтõм-а».

Ставныс пыдди босьтõм сьõмсõ Варнаков эз соссьыс, юкклõгас некодõс эз чирклы. Бара жõ буртор.

Сийõн Самарин и висьтасис сылы. А Варнаков бокша видзõдлõс Самарин вылõ да ныр пырыс курыда серõктыштис.

— Кõсьян вõtчывны?— шуис сәсся.

Самарин вешйис копыра юрõн, быттьõ кõtасис нин зәр улын да оз и тэрмась.

5

Унджык коми сиктыс õткодя пукалõ: ыджыд юõ ичõtджык юлõн усянйын. Та вõсна и сикт нимьясыс õткодя помасьõны, «дин» вылõ ли «вом» вылõ, кõни нин кызди велалõмаõсь шуны.

Ыджыд юыс колõ йõзõ петавлõм вылõ, пыжõн ли вõла доддьõн кад

сертиыс, а ичӧтджык ю кузяыс по- зьӧ пармаас ылысьыс-ылӧ водзвыв катлысьны вӧр керкаад. Видз-мутӧ быть вӧч, сытӧг он бергӧдчы, а мед туй понда керасьны да мыр бертны — сэтшӧм йӧйыс абу на чужлӧма.

Мый кӧть и чукльӧдлӧны енмысӧн на лӧсьӧдлӧм ордымъясыс, да лӧгыд петлӧ мукӧд кӧдж вылас, а кытчӧ колӧ, сэтчӧ на и воан.

Сэсся и кыкнан юыс чериӧн на могмӧдӧны, турунтӧ заптыны отсалӧны, керка кертӧ кылӧдны, кыс кӧсьян.

Кутшӧм сиктӧ кодӧ медся водз овмӧдчис, эз на дышыс понда сэтчӧ инась, гӧгӧр на артыштіс: абу-ӧ куш лыа либӧ нильӧг сӧй, водз-ӧ пужъявлӧ, вылӧдз-ӧ тувсов ытваыс босьтлӧ да мыйсӧ на сӧмын эз пуктив тӧд вылас.

Горвадӧн сиктӧ кодкӧ вежӧра морт жӧ медся водзсӧ поздысьӧма. Горва кузяыс, кӧть и дзебсясьӧ юыс пармаас, Урал мусюрӧдз пыжнад лыбан. Косъяс вывтӧыс ляпкыд ваӧн кыскысьӧмтӧ он содты мудз дӧнад дай. Сы вылӧ и эм тэ, мед рудзалӧм сойӧн паньтӧ кутӧн.

Рытъя шондӧыс, гожӧмын кӧ быттьӧ, джуджыд нӧрысӧ пыжа моз югӧрнас курастьӧ, керка ӧшиньясьӧ дзирыд васӧ резӧ, сикт мыш вылысь веж йикиа идлысь дӧторъясьӧ виж гыӧн тыртлӧ. А сиктыс, быттьӧ дзӧдзӧг котыр, ӧтгырсяӧсь нин мамыскӧд пияныс, вой кежлас восьса ва вылӧ тапиктӧ.

Восьса ваыс абу и ылын: веркӧс вылас лыдтӧм гӧгыльяс гижталӧг, паськыда шлывгӧ Печора, вой саридзлань нетшкысьӧ. Урал мусюрысь жӧ ачыс сӧйӧ чужӧ да водзӧ тужас дыр на оз ылыстчы, уна вожӧнкывийӧн на мамсӧ нӧнялӧ.

Джуджыдӧсь да сӧстӧмӧсь изъя пыдӧса вомынъясыс Печоралӧн. Дерт, оз кӧ кутшӧмкӧ тулысӧ сэтшӧма ышмыв да ачыс жӧ ӧгӧсьт найӧс, сэсся каржаав содтӧд. А ӧгыс, майбыр, тырмылӧ сэки: лыскыд и турунды, ньӧрйыд и чагйыд, вужляыд и дзоньнас пуыд.

Тыртас Печора важ вомынсӧ, сэсся выльлатӧ кодйысьӧ, баддьӧсь сьӧртас нӧйтчӧ. И виччысь кымынкӧ

во, кор бара кыткӧ кузя джуджыдӧн пискӧдас.

Гортдор черитӧгыд Печора эськӧ некор оз коль, быдлаын мича рытъяснад гыбалӧ, да тӧдан: гожъялысь чери тайӧ, кельчна-ӧкыша. А яяыс, сылаыс, кӧдзыд тӧвсӧ вуджӧдысьыс, пыдӧ ваын сулалӧ.

Медся на бур ва усьӧм бӧрас ӧтвывтчӧмӧн весавны вомынъясьӧ. Но сэтчӧ ӧн гезъяс колӧны дай кодкӧ котыртысь на. А кодӧ нӧ котыртас, кор быдӧн ас пондаыс олӧны? Быттьӧ эськӧ и ен тӧдӧны, сӧ копыр ӧтчдысьынас вӧчӧны, а олӧм кутысьыд кӧ кулан выйын, чӧс туйсӧ нин сьылӧдӧмсьыс корӧны.

Сэсся и кадыд на оз вичмы: дженныдик гожӧмыд пуксьылас, да быдтор колӧ удитны, мед эз мӧдысь быдздукӧ мог су. Ок ӧд шуштӧм кодлыськӧ мыйкӧ водзӧсавлӧмыд да босьтлӧмыд, ошлысь яй корыштӧм кодъ жӧ. Вот и, видзӧдан да, кодӧ выль видз-му ректӧ, кодӧ, кокура ва-йӧма да, выль пыж камӧдӧ, кодӧ пач вартны кыськӧ сӧй перйӧ, кодӧ улыс керъясьӧ керкасыс вежӧ, сӧсьмӧмаӧсь нин да. Быдӧнлӧн юр вывтырыс кутшӧмкӧ тӧжд. Сӧмын турун пуктӧм ставнысӧ ӧтитор вылӧ усьӧдлас понъясьӧс моз. Бара колӧ мыркӧдчыны, лунсӧ дай югыд войсӧ на босьтны, мый верман, мед карта улыд тӧвнас эз тыртӧммы, ӧти баксысьӧн да гӧрдлысьӧн кӧть мед коли жӧ сэтчӧ.

А сӧнӧ и ар нин. Вӧр керкаыд, гашкӧ, тӧв шӧрсянныс видзӧдлытӧм, чӧсьясыд киссьӧмаӧсь, плакаясыс вежӧм виччысьӧны. Бара уськӧдчылан, морт туйӧ кӧ асьтӧ пуктая. А гортсыд сӧк коста идраласны, тулыснас ичӧтикатӧ гӧрлӧн-кӧдзлӧн да мыйкӧ артмыштіс кӧ.

Сӧла-тартӧ кыйӧмыд оз сэтшӧма кадтӧ катты. Сы вылӧ и чӧс туйыс, мед астӧгыд кыйыс октысьӧм бӧрад. Дасысла нин вой-мӧд-коймӧдӧн ветлан. Кодӧскӧ и гортсыд на нуӧдлан, содтӧд ноп кыскалысьӧс. Ӑти сайын и велӧдан сӧйӧс, кызни да мый, век он жӧ чӧв ов.

А ур кыйны водз на. Ӑтиӧс, шуам, видзӧдлӧм могысь лыйин, да некыт на лӧзыс оз тӧдчы. И низьӧс ли туланӧс, шуам, понйыд увтіс, да ваысь

петом кодъ на, төвся гоныс оз на и сувт.

Лым петавтөдз, кынмывтөдз ачыл на лун-войсө бөрьян, шоныд паччөрө на көть нюждчыман, но сэки буретш гөрд чери Печораөдыс кульмыны катө, кык пудья мукөдыс. И еджыд чериыс чукөра олө, кульмыны жө лөсьөдчө да.

Вермылін кө лөсьөдныгырысыс синма кулом ли сырп да пыж, сэсса некод оз и ков. Вөйт куломтө лөнджык джуджыдинө, көни, төдөмысь, бергөдчө чериыс, и аскинас кыскымөныд век нин лоө, нөшта нин, абу кө ас путшкөм шөртись, а нөбөм роч сунисысь куломьд.

Позьө и визув джуджыдинти кылөдчыны сырпнад, төдан кө, мый некытчө оз сибды, да верман кө вомөнног вөитны. Но вомөнногсө вөитныыс өдийөсьыс өдийө колө. Көрталан сырпыдлөн вылыс сюрөс помас неыджыд косіник вужля либө крестөн йитвежалөм кык дженьыдик пөв, бруткан ваас, и кутан сынны мый вермөмсьыд виджадөн ю катыдыс. Енмыс мед видзас каттысян сырпыдлөн дзугсьөмысь либө пыжак кытчөкө пысасьөмысь. Сэки — ставсө выльысь.

Но артмас кө вөйтөмыд, регыд и кылан кинад, кызди өн чери зутшкас сырпад да пессыны кутас, сэсса мөд сэтшөм вынөн жө зутшкас. И кевман, медтө эськө оз на помась джуджыдиныс.

Дерт, медся на бур көвтыштны черна джуджыдинсө, но кысь тэныд сө ветымын сывья тывйыс?

Сөмын и тайө на абу сьөлөмтө уськөданаыс. Öти да, мөд да, коймөд да — позьө на и йитчывны дженьыдик тывьяснад, курыштны сэсса вомынсө.

Сын и горттөм понлөн кодъ мында шогыс, мый өшинь улад эськө вомыныс, да он, буракө, куломтө ни тывтө сэтчө көтөдлы. И катыдса вомынас он лысьт ни кывтыдсаас, юрид кө дона.

Весалин тэ найөс? А Чердинса купеч воліс да медавліс тэ коддьөмсө донтөм донысь, весөдіс куимнан бур төнясө, видзысьөс коліс. Арнас бара волас да гумовтас өн тывнас бур черисө. Тэ жө и гумовтан сылы ас

коддьөмыдкөд: сьөмторйыд өд быдөнлы колыштө, няньтө он нин шу.

А аслыд вылө тэ кыськө мукөдлаысь нин кый: Печораас колины на джумьясыс. Либө Горваө пырав, сэтысь, веськавлө жө бур чериыс. Кыбны на сэтысь позьө и, нөбжмөдлө визувыс йирьясас да.

Но таво Чердинса купеч эз на петкөдчыв, да өдва кө нин и волас. Талыштісны, тыдалө, сылы бөж вылас. А, колөкө, и пыркөдісны на.

Пөкрөв бөрын коркө во нин сувтө олөмсө бертовтөмянь, бур вылө кө быттьө. Сөмын тай бурыс ылын на лэбалө. Ниа кыря ваын пуөдөм дөратор, вевья гөрд, бедьө көрталасны, да сыысь кынөмыд оз пөт.

Нянь колө! А няньсө буретш и оз вай Сөветыд, зэв эськө гөль дор сулалысьөн висьтасьө да. Быттьөкө оз аддзы, ыштө кач сөйөны да пыкталөны йөзыс.

Кор нө Печора вожас, да көть и дзоньнас Комисө босьтан, ас няньыс тырмыліс? Муртса арийны. А таво и сийө на эз артмы, лөкаліс гөжөмыс да.

Вот и ов, кызд кужан.

Вөлі кө ловья Виринеялөн вердысьыс, татшөм пөгибөдзыс, колөкө, эз на воны. Ветліс эськө ачыс Стакей динө да кызкө-мыйкө сөрнитчис ськөд, уджөн шуис вештысьны али прөмысөн. Водзөсөн Стакейлысь лым он корышт, а няньтө кысь нин.

Быри тай Виринеялөн вердысьыс. Кокора перйигөн синсьыс би петавтөдз зэлөдчылөма. Бауөн нин сэсса и пырис гортас, кынөмсө пөорйөдлө.

Аддзө нин, абу олысь верөсыс, да Виринея Стакей динө ветліс. А Стакейлы кулысьыд гөрд чери кодъ, шедөма нин быттьө: сьылөдөмсьыс чөс туйсө кутіс корны.

— Вывті жө кө-а? — падмыліс Виринея, мөд шогыд выласас уси да.

— Ог тай мөс ли вөв... — жермунлі Стакей.

— А чөс туйыс нө оз паньөдлы?

— Но, ачыл төдан.

Виринея өдийөджык петіс. Ывлаас нин ыджыда ышловзис да синва

пычкыртис. Сэки господьыс ли кодкө и чуйдис: уставыд эм, лыддыны ку-жан, ачыл и сьылөд, ёна тай.

Ачыс сэсся Вириная и сьылөдис верөссө. А таөдз пиыскөд мыскавны лэччөдлісны Печора динө. Перйисны пöлатьсыыс медпаськыд пөвсө, пуктисны сэтчө шойсө и лэччөдисны. Дыр Вириная кояліс ки пөвнас югыд да кодзыд васө верөсыс ылө. Кокьясыс аслас изөймитисны, да вөлись дугдис.

Но, дерт, ковмис на сылы могмөдчыны да видзтысыны: быдлаө ачыл он тырмы дай оз на и артмы аслад, и мөдарө на лёк, он кө вөч, кызди колө нэмтө кутасны дойдавны. А өні некод водзын Виринаялы куньтырасьнысө: гуалөма-колльөдөма верөссө, көрт тувтөм гортйын на дзебөма, срубьялөма гу вывсө, көкьямыс пома истинной крест сувтөдөма.

Няньыс тай уна муніс сідз нин этшасыд, да сійө-а. Пудовня джын пызь коли эня-пиалы, сэсся арыы көть төвйы сійөн. Быть лоө кач сораствө пуктыны, кык да куим мында на збыль пызь сертыс.

А видзөднысө өд небыд да пөжөм йөв кодь вытя качыл, эн көть и косьты да той, а уль вывсьыс някляв. Но абу өд ош, мед төв кежлас асьтө сирзьөдлыны. Сылөн пө тай сир ёкмыль сювьяс-а. Лёк горшөн пө тулыснас горзө, вөтлөдлө сир ёкмыльсө.

Код төдас, сөрөны эськө, колөкө, тешитөны ошсө, а тэныд вот асьтө лоө тешитны: косьтөмыд и тойөмыд эськө, бус кодьөс нин качсө пуктан, а аскинас шонділаньыс оз видзөдлысыы. Пасибө, вөлөгаыл мездө: дозмөртө пуан, черитө чепөльтан, мөс вөра йөвтө юыштан.

Бур, эз йөйтав Вириная. Көсийсис кө Стакейлы верөсыслысь чөс туйсө, кысь өні арнас сылы дозмөрыс? А ветлісны пиыскөд да октысисны, и өні быттьө кумө петавлөны вөрас, кык ноппён на вайөны. Ыджыд-ө эськө и пиыс, дас кык арөс тыртө, а «ог сэсся вермытө» он кывлы: нельвит дозмөр жө сылы пуктан дай куим сы мында сьөла на.

Сөсыс унджык нин сьөлаыс чукөрмис. Оз убөлит Вириная, абу кө шыр ли кеня тшыкөдөма, пуны сьө-

ласө, эськө медся на чөскыдөс шыдтө вөчө да. И яйыс еджыд, пинь улад киссьө, оз ков дозмөрыдлысь моз мудзтөдзыд мутшкыны. Друг да кодкө ньөбысь на лоө, нянь ылө вежысь ли. Водзті тай купечыл вөлі сьөла и юасьө, Питирөдз новлө. Сарлы да кодлы да. А Сөветыслөн нө мөд пөлөс вомыс, чөскыдсө оз кыв?

Сө майбыр на бур чөс туйыл! Мутө и видзтө, мөстө и вөвтө колана кадад вевтгяс. Абу өд сөмын ордым сійө — нюрыс и ягыс, лэбалысыыс и котралысыыс матігөграс тэнад. Ляampa туй ни чер туй он лысьт кольны йөз чөс туй ылө, кысь нин эськө лыйны мыйкө да. Воймөмысь гортад тэрмасын, весьтасалан кыткө, а воан да висьтасын кодлы колө, ме пө сэті муні, прөстит.

Кымын во Виринаялөн верөсыс тайө чөс туйсө писькөдис! Бөрыннас сюсьмис да тулыснас пондис шуркьявны чарөм вывті. Туктаыс гылалөма нин сэки, но лыска пуыс увлань вожа на, а корья пуыс өтпөлөса, и пасьтала гулыд вөрыс, ылөдз дзувтыдалө.

Вежыс петөма Стакейлөн бур чөс туй вылад! Көнкө, чайтис, повзьөм вывсьыс Вириная оз и гөгөрволы паныд шуны: верөстөм кольө, да нинөм нин абу жаль. А пиыс нө эз коль? Оз быдмы сійө да коркө крестьянин жө ло?

Чөс туй и кык кулөм на, ыджыд синма да посниа, видзис-кутис Вириная пиыслы ылө. Понья-пищала на дай. Дерт, эськө вердны колө понсө, пызь ки тыр на шыд колясад коркө пуктыштны, мед кок эбөссыс оз усь, но куш пищальөн өд он кольччы.

Нянь кө вөлі, либө көть надеяыс нянь вылас, эз эськө сетчы Вириная некутшөм шоглы, и Стакей динө мөдысь шыасьлөмөдз асьсө эз уськөд. А пөдтіс-пөдтіс коркөя курыдсө да бара на муніс. Сөмын и такөдис асьсө: гашкө, оз нин кут чөс туй корны, сэтшөма йөртны.

Пызан сайын пукаліс Стакейыс, тыра вомкөтша на. Гырыся няклясис рөмидзтысь мөс моз. А идравтөм пызан вывсө рузумөн өдйөпырысь вевттьөма, гөгрөс рудзөг нянь тупөсь рузум увсьыс тыдыштө.

— Ө-ө,— чөскыда ружтыштіс Стакей да поткөдіс тошсө.

— Ме эськө могөн да,— нормөдчыліс Виринея.— Зэв на и ыджыд могөн.

— Ачыл тай мужиктө сьылөдөмыд да,— пыдзыртис-казьтыліс Стакей.

— Ачым тай йөйыд, босьті да,— сетчана шеныштчыліс Виринея.

— А бара на вот ме дінө. Қолөкө, и няньла могөн?

— Воистину.

Стакей чукыртчыліс, дорласьыштіс:

— Асьным няньнас дзескыда олам да. Кумли тырөн курыштны оз нин шед пызь йөртөдсьыс.

— Купечыдлысь? Ыджыд жытныксьыд?

— Эз нө ачыс сетавлы прөмыс ылө?

— А ме ог жө и водзөсөн кор, прөмыс ылө жө. Көть эня-пиа, а петалам, лөзөдас урыс да.

— Абусө ог сет, кывйөй мед усьө.

— Уна мешөк на кольлі,— паныдаліс Виринея.

— Со ключыс, да видзөдлы!— скөрмис Стакей.— А менө эн грекө вөйт!

Сідзкө тай, збыль на вөлөма кодлөнкө аддзылөмыс, Стакей ая-пиа пө пемдандорыс кык сьөкыд пыжөн Горваөд катөмаөсь, а вой шөр гөгөрыс биөн нин кывтөмаөсь, быттьө кыбны ветлөмаөсь да шедтөмысла водз бергөдчөмаөсь.

Кывсьыліс таөдз, Эжва вожын пө гөлыс кутшөмкө комбедө өтвывтчөма да топөдө озырсө, тэчассьыс на няньсө мырддьө. А Стакей нө мый, жуйявны кутас, мед, инө, локтасны да комбедаласны жө сійөс? Асьтө на йөйнас чайт!

Но он, буракө, лөгтө петкөдлы.

— Ой-я да ой-я!— бөрдөдчыліс Виринея.— Кутшөма надейтчи-а. Сэсся нө код дорө муна, Стакей-батьшкө?

— Ме төда?— дузгысьөмөн на вочавидзис Стакей, но чужөмыс пыр и личавны кутіс, йөг кодь бандзибьясыс быттьө буждісны.— Господьыслөн шуөма, да кызкө отсавны қолө-а.

Батьшкөөн ыджөдлөмыс вина-

ысь на өдйө шонтіс Стакейөс. Горвадінын сійө уставщикалө, пыртө да сьылөдө, грекө вөйөмысь дөзбөритө, и Виринеялөн аснырасьөмыс, сідзкө, эштөма нин.

— Отсав, верман кө, отсав!— дөльыштіс Виринея да ыркмунлі— Мыйөн бергөднысө шуан-а?

— Эг өмөй нин шулы?— нурбыльтіс Стакей.

— Мый?— шөйөвоштысьыліс Виринея, быттьө эз на вежөрт.

— Чөс туй кө эськө, мися.

— Яндысь! Али чукөрта тасьтіө да вая синваөс, юан рөсов пыдди? Гажыд, видзөда, бырөма жө нин-а.

— Пач пөдан эськө тэныд вомад!— кыкнан кыис ылын, вувзысис Стакей.— Пет!

— Инмылас мед кыид!— пинь пырыс сысьяліс Виринея да кутчысис өдзөс вугйө.— Сьылі вундан гаг!

Стакей уськөдчыліс көтшасас, бара сувтіс джодж шөрас да кутіс юрбитны. Шуйга кнас сьлөн лестовка бовьяліс, шөрыс лөз нойысь, дорьясыс гөрдьысь, тшупөдьясыс катша шьдөс кодь бисерысь. Везьялан дулля вомнас Стакей шуаліс:

— Сподоби, Господи, в ден сей без греха сохранитися нам. Буди, Господи, милость твоя на нас, якоже уповахом на Тя.

Виринеяөс окота босьтліс нерыштны, но эз лысьт. Зымгис кокнас өдзөсө да петіс.

Небыд пуксис рытыс, пемыд-руд енэжа. Ситеч вонйө быттьө ланьтөдчис муыс дась югыдөн на.

Луннас, сёркни керигөн, Виринея казявліс сырчикөс: пуксьөма пужьялөм потшөс ылө да луйки-лайки вөчалө, быттьө усьөмысь полө.

Көдзыдысла емалөны вөлі Виринеялөн киясыс, а сырчикыд уси син улас, да шонавліс быдөн, кос мүдзөмсө весиг эз кывлы веськөдчигас. «Сідзкө тай, шондөдлас на»,— пыр и мөвпыштіс.

Сэсся регыд и сылі пужйыс, сьөдалөза лоины көтасьөм ылыса потшьясыс. А Печора бердса кулигаысь, көні сулалөны пыжьясыс, кодкө быттьө кураліс сөніка кеньсө.

Град помас кольыштіс на нетш-

кытём сёркниыс, пиыслы нин тшөк-
тіс сійөс эштөдны, а ачыс Виринея
лэччис пыж дінас.

Бара на бурён ковмис сылы сәні
казытышты шонъянһой верөссө. Во-
дзө олысь мортыдлөн и важ пыжыс
на вөлі веж петкөдлана, йөра сюр
кодь гөгөр топыд да зумыд. Мый чу-
көрмөма ваыс, ставыс вывсынь весь-
калөм.

Босьтліс Виринея пыдөс пөвьяссө
да кояліс чибльөгөн васө, косөдіс
джоджысь моз ветьөкөн и сувтліс
виччысьны, оз-ө йиджтысь кыткө.

Эз, пыжыс эз пөръясь.

Бөр вөрзис Виринея гортас и ад-
дзис кыр йылын сулалысь Гурейөс,
Стакейлысь писө: ас пөжалөм көлач
йирө.

— Кытчөкө мунанныд?— тыра
вомнас и юалис Гурей.

— Некутчө огө,— вочавидзис Ви-
ринея.— Видзөдлыны тай со лэччы-
лі.

— Онө тай!— ныр пырыс нускыш-
тіс Гурей.

— Но, мунам, мунам. Мед нин төд-
лас батыд.

— Ёна колө!

— А мый эськө юасян?

— Сідзи. Кытчөкө өд мунанныд
жө?

— Питирө!— скөрмис Виринея.—
Сөвтам эстысь дзимбыра изсө да ну-
ам, оз-ө кодкө ньөб.

— А кытчө?— бара на эз өвсы
Гурей, наяна векньөдліс синъяссө.

— Няньнытө корсьны!— крапкис
Виринея.

— Кутшөм нянь?— доровтчыліс
повзьөмысла Гурей, быттьө ыпнит-
лөм биысь.

— Кутшөмөс дзебинныд. Миянлы,
гашкө, сюри нин,— лэчыдасыштіс
Виринея да нюм на лэдзліс.— Ог и
соссы, вот!

— Но? Сэсся тиян лои?— ылаліс
да висьтасис Гурей.

— Босьтышта, дерт, мыйтакө. Му-
көдыслы мед кольө жө.

— Видлөй! Кытчө чергысянныд-а.

— А вот и шедінныд ая-пия!—
абутөм серамсө пычкис Виринея.—
Зэв эськө мудер сирьяс, да кос пу
ув сам вылө и ылалінныд.

Виринеялы быдөн долыджык
лои, быттьө нянь понда шогыс

усьыштіс нин. Эновтіс весьөпөрөм
Гурейөс, содтөд вылө сөмын бөрвыв
өвтыштіс кинас.

Пиыслөн нетшкыссьөма нин вөлі
сёркниыс, весалөма өтиөс да бара
вуштөмөн сөйө. Дерт, юомовыс сылы
ковтөг оз ов, батыс кулөмсянь са-
картор эз на аддзыв, медбөрьясө
лои сәки видзөма да. Но медтө бөр-
ти оз висьмы кынөмнас, а то рытсө
урсалас: төварыш ни отсөг.

— Тырмылас эськө, Ардальон,—
өлөдіс Виринея.

— Чөскыд да!— чуймис пиыс.

— Чөскыдыслөн кост овлө. Вись-
мыв сөмын, еджыд юрситө ки тырөн
и някырта. Он аддзы, лөньө ывлаыс?

— Ветлам кытчөкө?

— Кылөдчыны. Лэдз сарай сөр
вывсьыд гырысь синма кулөмсө да
вотйыны заводит. Ме, час, помала
нин тайөс да локта жө.

— Но,— шыбитіс Ардальон вуш-
тан сёркнисө да котөрөн сорөн пы-
рис гортас. Өдйөджыксө сылөн эз
котөртсы: кача сөчөныд тай көть
кодөс ньөжмөдө.

Виринея эз кут видчыны, ветліс
шыбитөм сёркниысла да пунктис сі-
йөс мөскыслы торйөдөм чукөрө, пот-
ласьөм-сьөдасысьөмьяс дінө. Сэсся
босьтчис коса пуртөн коляс нетш-
көм сёркнисө корсьыс да вужсьыс
тшөтшөдны. Эз и кывлы Стакей-
лысь потшөс сайөд матыстчөмсө.

— Господи поможе!

— Яко с нами!— велалөм вылысь
петіс Виринеялөн, бөрас нин көдзөд-
чис.— Мый нө? Кутшөм нин мог су-
ис!

— Му вылын на олам да...— лывк-
нитіс Стакей,— чукөстөм на Гос-
подьыслысь виччысям да... грекыд
тай вөтлысьө... ёсь пуртөн дявөлыс
сюяс! Сэсся войыд оз узьсьы. Мурт-
са на кунян синтө, Страшной суд вы-
лын нин.

— Сідзи, дерт,— кайтіс Виринея
да эз нин вермы кутчысьны:— Кыв-
йыд на усяс-а. «У-у-у» омлявны ку-
тан.

— А ковмас нин, тыдалө,— сюрт-
чис Стакей.— Он кө быттьө прөстит?

— А тэ менө жалитін?

— Сыысь и шогала. Тавой ачым
вая. Төвйымөныд.

— Мыйкө вылө?

— Сідзи, отсөг кузя.

— Мед сөмын некод оз төдлы?

— А мый нө, мустө зыртас? Нянь кё и.

— Кутшөма на зыртас!— гөрд-дзыштис Виринея.— Тшыглы кула, а вомө ог босьт өні ме тэнсьыд нянь-тө. И синмөн ог аддзы мед тэнө. Мун, а то коса пуртнас и торйода юртө да талаяла на кок улын. Ок!

Потшөс сайё мышкыртчөмөн Стакей өдий лывксьөдіс. Ылысмис да сувтовкерліс, мисьтөм чужөм вөчліс.

А Виринеялөн вир пузылөмыс и збыльыс кнас вуджис, шурсейөдлыны сөмын кутис коса пуртнас. Казяліс, мый оз тшөтшөдав, а дойдалө, тшытшлө сёркнисө, да вөлись лёкалан руыс петис.

Идралис сэсся Виринея град вывсө: бурджык сёркнисө сараяс пыртліс, лёкджыксө да дойдалөмсө мөскыслы лясниас гузгыс, корсө ыжъяслы шыбитис. Вөлыс бытьө пайтөм коли, да сылы Виринея бур турун мездор сетис, кыскасигкежлө видзансьыс.

Ардальонлөн абу на и содлөма кулөмсө вотйөмыс, быд дзугсьөмин кызмырдөн разьө, оз гөгөрво кык ки костас шамралыштны, косьмөм нуйтнас сибдөмсө мынтөдны.

Тулыснас, гудыр ванас, нуліс Виринеялөн верөсыс кытчөкө тайө кулөмсө и вайліс бур черисө, нинөм он шу. А мыйлакө вот абу жө пожъялыштөма косьтытөдзыс. Колөкө, пыр и нөйдас кулөмыс, мед веськавлас өнджык чери.

Татчө нин эз бурөн казътышт Виринея верөссө. Видліс кинас, зэлөдавліс выныс кытисюрө, падъялөмыс коли на: ён на жө эськө кыліс кулөмыс, да код төдас.

Но он өд кут сулавны, ыштөма кё нин. И Виринея тувчис кулөм лёдз вылас да кутис ветлөдлөмөн талаяны табсяныс кебөдөдзыс да мөдарө. Пыыс шемөса дзармөдліс синъяссө, сэсся вежөртис, мый мамыс тадзи косьмөм нуйтсө уськөдө: со тай кызди бусыс пуркнитлө кок увсьыс.

Та бөрын эня-пиа өдий и вотйисны кулөмсө. А рытыс сибөдчис нин. Пыралисны сөйыштны, шоньдджыка пасьтасьны: ва вылад көдзыд. Петигас Виринея босьтис верөссяныс ко-

льөм пистонка-пищальсө, коді зарада нин вөлі. Чөс туй вылас сийөс Виринея вөдитис, ош кё паныдасяс. Сьөла увтйид, көть юр весьтас пытькөдчө, веськодя мунліс: коркө ачыс шедас, да нинөмла и шысө вөчны ковтөг.

— Утка лыям, аддзам кё?— юалис Ардальон.

— Сідз, мед пыж нырын ветлас,— коса вочавидзис Виринея.

Аддзис понйыс пищальнад керкасьыс петөмсө да чеччыштөмөн быйкнитис узылан чомсьыс, гатшасьліс дженьыд домысла, лявксьыны-вөзйысьны кутис.

— Ланьт, огө вөрө!— гусьөникөн чырыштис Виринея.

Понйыс дзугыля пөлөстліс юрсө да мудзөм морт моз восьлөн бөр пырис чомьяс.

Лэччисны ва дорө, да Виринея ачыс пуксис сынны, а Ардальонлы тшөктис бөжавны.

Вөрзисны катыд. Ковмис шөрланыбөджык петны, кольны ньөжмыдджык дор визувсө. Содөма ваыс да ылөдчө сөмын: кыті джуджыд, кыті пелыс лоптыд оз саявлы, изйө зутшкыслө. Сэсся и пыж пыдөстө на изіныс сөйө. А өні Виринеялөн некөн на оз тыдав виль пыжыс.

Регыд Виринея и мудзис: няньтө-малөмыд тай косөдө на ассьыс, кыскө эбөстө, көть эськө вөлөгасьыд и он сэтшөма орлы. Рудзалисны сойясыс, позялісны, бытьө кер улын дыр видзис. Забеднө эськө, да он өд кодкө водзө коньөрө лэдзчысь. Топөдіс өпаснича помьяссө морөс бердас да катласьөмөн кутис сынны.

Дерт, пезис якөр лэдзлыны да лолыштны мыйкө дыра, но сэки нөшта нин өдий кутан жаявны, дзикөдз эбөстөмман. Пондыв кузь туй вылын мудзөмсьыд пуксьывлыны, ылөдз-ө воан. Бурджык на ньөжйөник мунны да мунны.

Аслыс Виринея шуөма: вомын юрө вотөдз оз шойччыв, көть мед мый. А сәні, пемдөмсө виччысигмоз, лолыштас. Сэсся өд бара на ковмас вөйтасигас мый вынсьыс сынны. Мед сөмын артмас вөйтөмыс-а: паськыд мегырөн вомөнног. Бөрас кокни нин лоө.

Господьыс кывлөма на Виринея-

лысь кевмөмсө: воисны эня-пиа во-
мын юрас пемыд усътөдзыс, и вöйтö-
мыс артмис. Виринея бара сынис,
виджадөн нин визувыслы, а Ардаль-
он пидзöсчанясьömөн чöвталис ку-
лөмсö.

Пондисны кылөдчыны, и Виринея
кывзысис кинас вылыс сюрöсöдыс.
Тигнитөм и зутшнитөм некымынысь
кывлис, да быд пöрийö пöсъявлис сьö-
лөмыс. Сэтшöма чайтсис да колис,
эськö чери жö мед, кебöс ли нельма,
а эз крукасьлы кытчöкö кулөмыс.

Пыжыс друг шöрланьö сетчис,
быттьö вабергачö веськалис. Эз гар-
товтöмөн кут, да зэлавлөмысла мы-
нис Виринея киясь сюрöсыс, швич-
кысис ваас ньöрийөн кучкөм моз:
öклучинаас на вöли сийöс кöрталö-
ма.

Виринея кутис öдийö курасьны
öпаснича пöлөн и Ардальонлы на
тшöктис, мед отсалас. Но пыжсö ба-
ра кодкö быттьö кыскыштитис, сьяльöб-
тöмөн вайöдис сы весьтö, кöни кулө-
мыслы нин колö лоны.

«Сибдис!»— ыркмунли Виринея.
Мед оз нёровт да пöрöд пыжсö зэла-
лөм сюрöснас, нюждöдчылис да бöр
киас босьтитис сюрöссö и казялис, мый
локтö кулөмыс, бура на локтö. Эз
нин сэтшöм ылын, но пыж весьтасас
на тыдалис кельыд вуджөрөн сьöд
ва вылас кос ньыв пу вужля, кытчö
кöрталöма сюрöс мöдар помсö.

Вомын бöжыс матысмис, со нин
ыджыд сус пуыс, сьöдвидзö сук ту-
ганнас енэжыслөн пемыдлöзас, быт-
тьö турун сэтчö кодкö юралöма. Ку-
лөмсö лэптöм вылö нин Виринея
каттыштитис сюрöссö и кылис чорыда
мовкнитöм, кызд тай овлö, кор вö-
лöс бöрсьыд нуöдан, а сийö не-
тшыштчылас лöдз курчöмысь.

«Сидзкö тай, чери на, абу на сиб-
дылöма кулөмыс!»— визнитис юрас
Виринеялөн.

Мый лоан ло, колö лэптыны ку-
лөмсö: регыд нин ляпкалас, да во-
дас джуджыд кулөмыд, став изсö и
лöпсö кöвтыштас, чашыйея муткы-
ля визув вылас. Чери ни ачыс сэки.

Кебöс-ö-нельма, видзöднысö тай
еджыд чери-а, он кут сэн маласьны,
локны пондис лэптан кулөмыскöд,
нöйтчыны пыж пыдöсас.

Джынсьыс унджык нин воис кулө-

мыс, кöдзыда шай-паймунли Виринея
— эз жö öд пöръяссьы?— и пыж
улас сэки суйис кулөмсö кодкö.

Виринея зэлöдчылис, лэдзчысис
пуклöс вывсьыс да таджгöдчылис
быдөн, но сетлöма на господьыс ве-
жөрсö, водзö эз нин йöйтав, нöрöви-
тöдис асьсö. Сöмын вöйысь моз сатш-
кысис пыж дорышö.

Вочасөн кулөмыс личали, и Виринея
ньöжйөнник заводитис бара лэп-
тыны. Пыжыскöд орччөн лыбис сыв
кузя чери, ваыс ыльöбтитис колода
кодь мышнас поткөдöмысь.

Ортсыладорсяньыс Виринея ма-
лыштитис мудзöм чериöс, сэсся кыкнан
кисö суйис кынөм улас. Чери видлис
вöйтчыны, сэсся бокша ылыстчыны,
но эз нин вермы ли эз на кöсйы сэт-
шöма, ваын на вöлис да.

Эз кö асьсö мыжавны ков, а ко-
дöскö мöдöс, ок и шуис жö эськö Ви-
ринея, мед виньдылис кодкö мöдыс.
Көнкö верöсыслөн вöли кöрт крук,
да позис жö сийöс босьтны. А öни код
тöдас на, тэнад абу тайö чериыс, со
эськö да.

— Эн усь!— горöдис Виринея пи-
ыслы, сэсся пöрöдчылөмөн нёрынть-
лис пыжсö да ызмунөм ваыскöд
тшöтш кыскыштитис мый вынсьыс че-
риöс.

Пыжад воис, да чери быттьöкö ри-
кöстис, сэсся тай кызд косыштитис
бöжнас да мегыртчылис, но Виринея
удитис усьны сы вылö, личкыны
пыжö.

Чери пескылясис, бöжсö мездöдис,
резис Виринеяöс чужöм тырнас, а
Виринея кинас и кокнас кызд-мый
вермис дзескöдис да личкис сийöс.

Медбöрын чери ланьтитис жö. По-
лөмпырысь на Виринея кыпöдчис да
пуксис пуклöс вылö, чышкыштитис
банбоксö сьлөссьöm кинас, личыда
ышловзис: пуд кыка сьöмга, абу кö
сьöкыдджык на, куйлис öни кокъяс
костас.

— Ардальон?— чукöстис Виринея.

— Мый?— шыасис пиыс.

— Нинөм. Эн кö усь и,— серöктис
Виринея. И кватитчис: кулөм помыс
öд лэптытöм на. Сэки жö кылис, код-
кö быттьö кыскö кок увсьыс господь-
ыслысь ыджыд козинсö.

Гөгөрвоис, сибдалö ляпкыдинас
кулөм помыс. Копыртчис да пондис

лэптыны, и ёкмыля нин локтіс кулөмыс, ратшкакылігтырйи. Но бара на кымынкө еджыд чери вайис, бытгьо косясьлөмсө вештіс.

Сэсса тангысис пыж бокө ньыв пу вужляыс. Виринея көсйыліс мынтөдны сійөс, мед кылалө, но эз лысьт, тшөтш лэптіс пыжас: колөкө, тайө вужляыс и медся шудаыс, а босьт жө да «мун» шу сылы.

Чөсөдан көдзыд шымыртіс Виринеяөс. Кывтөг эз ов эськө таөдз көтасьөмсө, но сайкаліс сьөлөм бурмөмсьыс, ньөжмыштіс вирыс, и өдийө тай ва паськөмыс сибдіс яй бердас.

— Пет нин, шыш!— горөдөм кыліс.

Виринея төдіс Стакейлысь гөлөсө. Кымынкө дзуз-би висьталісны сэтысь и сиктсө.

— Вердан өд черисө!

Би-ньөв юковтіс, бөрынджык нин гымөбтөмыс кыліс, сэсса пыж весьтөд бытгьо вөзьяс лэбисны шутьлясигтыр.

Виринея пуктіс өпасничаяссө өклучинаяс вылө да өтарө-мөдарө сыныштөмөн бергөдіс пыжсө, веськөдіс сэтчань, кытысянь лыйисны.

— Мамө, огө сэтчө!— повзьөмысла бөрдыштіс Ардальон.

— Кутам тай повны!— өлөдіс Виринея.

Збыльысь, сійө эз повззы: лөксө нин песө Стакей, эз сибав өнтай мудера бурасьөмнас да. Но, кутас купеч вылө ыстысьны, кысянькө өд колө пондыны, мый купечыслөн на кумнан вомыныс, а Виринеялы оз и сюр воча кывйыс? Кутшөма на сюрас! Дай ачыс на водзджык өвсяс Стакейыс, черитө катөдны отсалас и нянтө на ваяс, сөмын мед меліөдчылас Виринея. Но кывйыд Виринеялөн оз вожав. Мед, абу кө ньөти гректөм, но господьыс водзын асьсө оз пежав, өнтая шуөмсьыс улө асьсө оз сувтөд.

Гирснитіс берег дор ляпкыдас пыжыс да зурасис өдөб вывсьыс гыясөн лэптөм каржаас. Виринея муртса эз усь пуклөс вывсьыс, но өні некор вөлі сылы жуйявнысө, гатшөннас моз на и судзөдіс пыж нырсьыс пищальсө, воськовтіс ваө.

— Шедін, шышкөй?!— сьөд вуджөрөн зырөдіс сылань Стакей, бо-

кынджык вуджрасис Гурей пиыс.

— Волан кө эськө!— чургөдіс пищальсө Виринея.— Кынөмад и лэдза дявөл өбледьлы,— и тачкис-октіс куроқсө.

— А ми огө вермөй тэныд сөтана вөрлы? Йөз питшөгө китө сюян!

— Важ сола вылад мед оз юктав! Оні бөр ставнымлөн Печора-матушкаыс. Кузяла и пасьтала.

— Мися, быд гожөм на весавлін?— чиктыліс Стакей.

— Ме кө эг, вердысьыс менам весавліс. Гыж доньыс!— дөжныштіс Виринея.— А яй тушаыс купечлы да тэныд. Мун, личкыссяс!

— А вомыд эз вөв?— педзыштіс, кылө, Стакей каржа вылас.— Ме, колөкө, асьсым на кулөмөс сетлі, бур ногөн кө.

— Эштөма тэкөд менам бур сөрныис!— пищальнас өвтыштіс Виринея.— Мун, эн кымөд!

— А гадзтө кө, мед и Господьыс рөссудитас. Лый!— равөстіс Стакей.— Он кө, ачым лыя. Öти туйыс коднымлыкө!

Морт ловтө босьтны шунысө кокни, а кор сэтчөдз воан, кыид дугдө лудны, выльысь тшөктөм на виччысьө. Татшөм тшөктөмыс и эз тырмы некоднанныслы.

Но и сетчынысө, весигтө шыасьнысө некоднанныслөн нин эз бергөдчы кывйыс. Бурөн помасьны тадзикөн паныда сулалөмыс эз нин вермы. Кодкө коймөд кө эз во кыськө.

И коймөдыс тыдовтчис: кум биа пароход петіс Печоралөн катыд көджысь да, дышника тяпкөдчөмөн, кылөдчис пемыдас.

— Аски мый висьталан-а?— нимкодя шуис Стакей да бөрыньтчис.

— Чайтан, купечыд локтө?— нимкодя жө водзөс косөдіс Виринея.

Бурөн и лөкөн велөдіс Ревекка Павелөс, асьыс өтка писө. Колө Ленвадіно кывтны, пыжын нин нопйыс, а оз пуксы, оз весиг шедөдчы.

Коркө сус пуө кавшасис, да ог пө лэччы. Кевмысис да кевмысис Ревекка, сө кристостө кымыныськө шуліс, а сэсса петіс ку письыс да пищальла котөртліс:

— Лыя вир сьөдөдысьөс, он кө сэсь лэччы!

Ёна и тодмышкаліс сэки Ревекка,

мыйон шеді ки улас пыс. Аслас бөрүннас синваыс петіс.

Верстьо мортислы сьокыд да мустом йозад овны, а кок чышкан рос судта детинаислы кутшомджык? Гажтомыс да тшыг нисьо потыс сылы мөрччө оз? Корысьлы моз мыйкө эмыштсө пуктыштан нопьяс, да быттьо мынлөма коньорысь.

Мед нин эськө и энотчас школасыс кызмырдөн ветлөм дорысь. Аслыс на Ревеккалы бурджык, гортын олысь кө лоө, ветлысь-вайысь. Да отарсяныс сомын бурджык. Мөдысь, колөкө, пышйыны ковмас Павеллы гортсыс. Оні нин лимзалө-воливлө, бара кодкө дойдөма батынас, а сэсся нө бырө шуысьыс? Оз бара-й!

Кык олөм урсалис батыс, ассыс эськө тшыкөдіс нин да. Сы понда эня-пиалы көть кыз огырон подлась да кольмөдчы.

Оз, оз позь Павеллы кольччыны татчө. Мед помалас школасө да водзө на мыйкө велөдчас, ылын кутас овны, көні некод оз увтышт сийөс.

Сизимөд классас Павел велөдчис интернатын олөмөн нин: кыкысь лун вердоны, узьтөдлөны кровать вылын, позьо нин велөдчыны. Абу руыс! Волас гортас, да воддза мозыс тойлөмөн лоө ыстыны.

Оз нин кор Ревекка, ылө вөрө, шуас, муна да дыр ог лок, и то волас. Көдзыд керкаас и узяс.

Сэсся кутіс шуны, помала пө нин седьмойсө, зэв кө тэныд колө, но водзө некытчө ог мун, кыйсысьсөн лоа.

Буретш сийө воас бырөдісны матигөгорсыс посни колхозьяссө да на пыдди коопзверпромхоз восьтісны Ленвадинө канторанас. Вөралысьясыс, тшөтш и Ревекка, лоисны штатнойсөн, төдчымөн бурджыканы кутісны мынтысьны.

И Ревекка бурасьліс нин Павеллөн аснырасьом вылө, гуся надея сомын нин и кольліс: армияө ветлас да, гашкө, ачыс на гортсыс көдзас.

А тулыснас, джуджыд лымья на вөлі, Павелос быттьо вежисны, ур зарад пыдди сылы ош зарад гусьон пуктісны.

— Ухтаө, горной техникумө муна!— сөрөн нин рытын воис лызьон да пыр и висьтасис, порччысьнысө на эз удит.

— Мун, мун!— нимкодя дольыштіс Ревекка.— Оні, сө майбыр, отсала нин.

Телепит на эськө вөлі Ревеккалы юасыштны, да эз лысьт, мед оз шусы мыйкө. Сэсся эз на и вывті эскысьы, мый вежсис Павеллөн думыс. Вильлунө, водз асывнас, садьмөдны ковмас сийөс, да сэки тыдовтчас, збыль-ө сөрнитө.

Збыль и, вөлөм, сөрнитө. Отчид чуксалөмөн и чеччис Павел, мыссис да пасьтасис, сөйыштны пуксыліс, сэсся ыстытөг-кевмысьтөг лызясис да исковтіс Ленваланы.

Шөйөвошлі таысь Ревекка. Жөвьяліс джодж шөрөдыс, мыйлакө гөбөчас пырис, и сэки гөбөч джаджсыс адзис кык кузьмөс галет пачка да тетрадысь косялөм лист, кытчө веськыд гырысь букваьсөн вөлі гижөма: «Мамө, тайө тэныд. Босьт вөрад. Ковмас».

Школатө көть Ревекка эз төдлы, а лыддысьнытө велалис ичөт дырйыс на. Восьтас вөлі батыс пес кыза устав да велөдө, шуавны тшөктө бөрсыс: аз, буки, веди, глаголи, есть...

Мед, комион кө Павеллөн гижөма. Коми букваыс унджыкыс роч вылө жө мунө, а дзоньнас төдса кывтө вежөртны абу нин сэтшөм сьокыд.

Но кысь Павеллы галетыс? Ленвадинса лавкаас вайисны, да сэтысь ньобис? Ичөтика сьомыс вылө, кодөс гортсыс босьтліс? Али нө сетіс кодкө? Кутшөмкө геологьяс кывсьоны, кык ыджыд трактораөсь, да найө?

Мед эськө, найө кө быттьо, да код төдас, мыйся на йөз сэтшөмыс? Геологьясыс гожөмын Ленва кузя катлөны, а тайөяс төлын ветлөдлөны. Төвнад нө мый аддзан лым увсьыд?

Колөкө, абу и геологьяс? Ылөдлөны йөй детинкатө. Талун галет сетасны, а аски тшөктасны гортсыд мыйкө шышнитны.

Бөрья кыйдөс куясыс Ревеккалөн сдайттөмөсь на вөліны, да видзөдліс, ставыс-ө. Ставыс! Лөнныштіс

сьёлöмыс. Шунс виччысьлыны Павелöс да топöдлыны: локтан субöтаас каникул выlö сійöс лэдзасны.

Сэки Павел и висътасис, кысьмый сылы галетыс да мыйла Ухтаас көсйö мунны.

Бара Ревеккалөн чеччыны пондыліс сьёлöмыс, юрсиыс на, гашкö, сувтліс. Мый нö, муртса абу помалöмаöсь сылысь öтка писö. Қод понда эськö сэки сылы овнысö му вылас колис?

Вөлöмкö, Павел лызынас локтігөн весьтасалöма вөрöдыс, бара петöма туй выlö и аддзöма чунысь на кызджык сьод кабель, нюжалö пö и нюжалö, а костөн-костөн вожъяс кабельсянныс петöны да муö пырöны. Зыр судта пö кын мусö кодйöма да гырысь кансер банка кодьюс быд кодйöминö лэдзöма. Сувтлас Павел да видзöдлас кымынкöлаысь, водзö мөдöдчас, и сэк тай кызд гымыштас. Қыйыр торъясыс пö чишнитісны сөмын пель бокті. А юрас кө инмис?

Повзьöмысла Павел ляпкөдчылöма, оз-ö бара взрывитны, сэтчö сійöс и кутöмаöсь.

— Кытысь тэ усин татчö?— медводз юалöмаöсь.

— Вөрсьыс петі,— вочавидзис Павел.

Тökөтьö абу нөйтöмаöсь сэсся. Бөрынас нин шуöмаöсь, шуда на пö вөлöмыд. И нуөдöмаöсь тракторъяс дінас. Öти трактор доддяс пö пача керка, да узылöны сәні, а мөдас, чом коддын, быдсяма приборыс, бергөдчынытö дзескыд.

Гөгөр петкөдлöмаöсь Павеллы. Сэсся пуксьөдöмаöсь да вердöмаöсь пөттөдзыс, кампета тшайөн юктөдöмаöсь, кык галет пачка сетöмаöсь.

Начальникыс колльöдыштöма на Павелöс да шуöма:

— Ухтаын горнöй техникум эм. Помав школатö да пыр сэтчö. Бурөвöй мастерөн коркö лоан. И, нинөм он төд, татысь кыскö нефть ли газ аддзам тэа-меа. Но?

— Но,— көсйысьöма Павел.

Ревеккалөн личалис сьёлöмыс: бур йөз шөрö на веськавлöма пныс, да оз кө вомдзассы мыйöнкö, коркö, гашкö, мортö на петалас.

Но майшасьöмыс Ревеккалөн эз на помась. Ачыс öтчид катөдіс Лен-

ва кузя нывбаба геологöс да кыртаысь кыртаö и новлөдліс сійöс. А тайöяс...

— Сідзсö нö, взрывайтöмнас, сюрö жö мыйкö?— юалис пныслысь.

— Оз,— төдысь моз вочадзис Павел. Ачыс эськö тадзи жö сэксö юалис геофизикъяслысь. И водзö тешкодья юасыліс. А найö сылы кызди позьö кокныда висътавлісны.

— Мыйла нö эськö сэсся гымгöны?

— Му пытшкөссö төдмалöны. Взрывсьыс гы артмө, пыралö му пытшкас да бөр локтö.

— Қутшөм гы? Абу өд ваысь муыс?

— Тыдавтөм гы. Абу синмөн аддзана!

— Сэсся мый, бөр локтас да?

— Петкөдлас, пыкөса абу муыс.

— Висьö али мый? Мусö шуа.

— Коркö висьлöма, уна сө миллион во сайын.

— Сэсся ор петас, писькөдасны да? Мун, дыш кывзынысö.

— А вот и петас! Қыс нö эськө либө нефтьыс? Оз муысь сійöс перйыны?

— Но вот и велөдчы сэтшөм уджас!— лөсыда гартыштіс Ревекка.

Мед оз өтнас ло Ухтаас, Павел ышөдіс кызд мый кужис кык зонмөс на. Öтлаын сэсся и ытісны документъяссö. И босьтан экзаменъяссö сдایتны өтлаын мунісны. Но найö, кыксö, эз босьтны техникумас. Эз нин сэтшөм сьökыд и вөв задачаыс, а мыйлакö абу вермөмаöсь стöча вöчны.

И коли Павел Ухтаö, а өртъясыс бөр мунісны. Сэтшөм гажтөм шымыртіс зонмөс, синсö вөлі унмовсьытөдзыс оз лысьт куньлыны: пыр и гортсö аддзас.

Гижис мамыслы, мый бөр жö локтас да кыйсьысьөн лоас, кызди коркö тай шуліс. А мамыс абу жö нюжмасьöма воча кывнас, кодлыкö пыр и гижөдöма: он пö лысьт вөрзыны, мунін кө, и велөдчы, отсөгтөг огколь, а тані менö сідз нин тэ понда пинялісны, нинөмла пö вөлі миянлысь пиянсö сэтчö кыскыны, деньга весьшөрö видзны.

Бытьö татшөм письмөыс и коліс, Павеллы долыдджык лон: оз нин

ков яндысьны, локтас төвнас каникул выло да.

Сөмын тай велөдчөмыс Павеллөн пуксис төдтөм вөрөд ветлөдлөм кодь, быттьо мунас-мунас да пөрөмө зурасьлас. Черчение понда тадзсө. Шуам, квайт пельөса гайка эськө и колө чертитны, водзянь да вывзянь видзөдлөмөн, да оз на тай лючки артмы. А велөдысьыс, сiм гоб рөма чужөма пөль, оз зэв мелiась, кыйкнитлас мышку сайсяныыд да кыз сьөд карандашөн вомөн визьйөдлас, кытi абуджык сiдз. Сэсся думайт, мыйла абу сiдз. Вуштан да выльысь вөчан, ваян петкөдлыны урок помад, да сысь и пов, мед бөр оз бергөд. Видзөдлас тэ вылө жаляддза да муртса «3» убөлитас, чертөж улад ыджыда «грязно» гижас, быттьо эз ачыс öнтай кыз карандашнас визьйөдлы.

Ёна и мустөмтiс сийөс Павел. Коркө висьталiсны, висьмөма пө, да быдөн нимкодь лолi зонлы.

А сэсся öти здукөн жö и кусi-чисмунi мустөммөмыс. Видзөдлiс пөльö водзас пунктөм чертөж вылө, тотшкөдыштiс пызанö кос чуныаснас да эз нин лөз карандашсө морөс зепсьыс перйы, а сөйрөмөс, и пасйис «4».

Павеллөн төдлытөг нюмыс петiс. Пөльö казялiс тайөс да ассьыс нырбордьяссө öтар и мөдар зырыштiс-малыштiс. Татшөм нин сылөн модаыс вөли, кор нимкодь жö сылы волiс.

Öддзис та бөрын велөдчыны да бурьяс лыдын на помалiс Павел техникумсө. Тöлысь куим на уджавны удитiс и: армияö сэсся босьтiсны.

Водзджыксө, военкоматас, артиллерияö сийөс шуисны. Но сборнöй пунктас, көнi выльысь став комиссиясө прöйдитiсны, воис капитан-лейтенант да индалiс веськыда стройсьыс, кодi сылы колö.

— Босьта... босьта жö... — шуалiс сийö. Водзвыв нин, буракö, төдмалөма документьяс сертиыс, кутшөмджык зоньяс тан эмөсь, да öнi сөмын синнас нин мурталiс бөрйөмьяссө.

Сувтiс Павел весьтö, чөв уси. Шырөм еджыд юрси подъя, ортсыасян

ыджыд пельяса да войтыштан ныра Павеллөн, эз видзөдсьы збойлун ни зумыдлун. Тайö, төдөмысь, и падмөдiс морякөс.

Лөгасьөмысла Павел ыджыда лолыштiс, пинжак морөс зепсьыс авторучкаыс весиг петыштiс, а лэдзөм синкымъяснас дзебыштөм лөз синьясыс гырдөдiсны, быттьо кымөрö шондi инмис увсянь.

— Босьта! — шпыньмунi моряк.

Тадзи Павел веськалiс флотö, подводнöй лодка вылө.

Дерт, велөдiсны и тренируйтiсны таөдз. Унаөс эз на и босьтны, берегö колисны. Вөли бергөдласны центрифуга вылын, сэсся врач тэныд тшөкталö: чеччы, лок ме вылө, коктö лэптив, мөдсө, княстö шамырт. И кывзысян, вөчалан. А мукөдыс оз вермыны, гылалöны, кыснясьöны, видзөднысö мустөм, эськө төдан, мый абу быд морт öткодь да.

Налөн корабльыс эз öтчыдысь петав быгыльтчысь гыа вой саридзö, эз öти сюрс верст уй, ставсö кө артавны, сэтчөс кыз йи увтiыс.

Лун кольö, мөд... вежон кольö, а гөгöрыд сап пемыд ва, сөмын би югөр улын вижөдлө, и он төд, кор нин и адзылан ывла югыдсө.

Ва улас гажтөмчөмыс, вөлөмкө, медся на сьökыд венантор. Кутшөмкө аслыспөлөс мудз да шог шымыртас, дыш и сёрнитнытö, весиг мөвпавнытö дыш, öти мөвп сөмын юрад и нөйтчö, дыр-ö на нюжалас тайö походыс.

А командатö сетасны, да мед эськө эн жуйвидз, ставсö öдйö вöчин, кымынкö здукөн, и некутшөма эн сорассы.

Гортсьыс ичөтөн йөзö петөмыс-ö, гортас овлiгьясö кыйсигөн да вуграсигөн көнкө öткөн узыльвлөмыс-ö, важөнся коми вирыс-ö (тöлысьясөн тай пармасьыд оз волыны, көть мамсö босьтам) — код төдас, мый отсалiс, но мукөд зоньяс сертныс Павел öдйөджык венiс ва улас шөгсьөмсö.

Мөд поход бөрас сийөс гортас лэдзлiсны, кузь туй вылас содтөд дас лун на сетiсны. Сэки и төдмасис Павел Галинакөд. Ухтаын тайö лои, служба вылас бөр мунигөн.

Гортас Павел регыд и олiс. Мед-

воддза асылас жö, петис пищальöн кытчöкö ветлыны да, шуштöм сийöс босьтис: сизим керка нин сöмын тшынассис налöн Югид-Лягаын, мукöд керка динас весиг кок туйыс эз тöдчы войся нöбöдöмысла.

Дышпырысь сэсся Павел и лызясис да öтчыдысь лунтырöн öддзöд-лис, кор вурдöс казалис: вомöналö вöли Югид-Лягаыслысь кöдж, лымсö пызийö-поткöдö, вегылясьö, кокъясыс дженъыдöсь да.

Шеді кö вурдыс лыйны сэки, кыйсян руыс Павеллы, колöкö, воліс на да ышмöдліс дырджык кежлö, но удитис вурдыс дзумгысьны сөнिकासсылöм рыö: тöдö на тай, вöлöм, кытöн сылöн мездысяніныс.

Яндзим вöли мамсяныс и йöзсяныс, позис на пö слыштны гортас, да вот тай, уна-ö öнія пияныдлысь босьтан, шутöг оз овны, и Павел ытисис сы вылö, мый Ухтаысь тöдса бурмастер, код дінын армияöдзыс уджалыштис, быть корис сувтлыны. Ыджыда ылöдчöмыс, веськыда кö шуны, тани эз и вöв: Ухтаас сувтлан думыс водз на воліс, кор отпускас шуисны лэдзлыны. Кодъяскöдкö öтлаын велöдчöма, кодъяскöдкö уджалыштöма, шойччыны петавлöма бурöвöйсьыс да ресторанын на пукавлöма — пырав Геологическöй Управлениелöн гостиницаö, и век нин кодöскö тöдсаöс аддзан, и местасö сетасны.

Ленвадинöдз мамыс вöлөн колльöд-діс (пöрысиник вöв видзисны на Югид-Лягаын öтвывтчöмөн, промхозыслысь киритöмсö), сэсянь бара «ЯК-12» самолётон (сöмын öні мöдарö нин) лэбзис Павел райцентрöдз, а водзö, Ухтаöдз, ветліс автобус.

Райцентрсянь верст ветымын ылнаысь, Жеб-Ёль дорысь, аддзöмаöсь уна газ, «Правда» газетын весиг гижлісны, и öдийö тай артмöма бур туйыд. Выль кар лэптöм йылысь нин быдлаын сёрнитисны. Сэтчö, Печора катыдас.

Оз тай ков вöтасьны да сэсся висьтасьны, йöзсö тшöтш чуймöдны, вöтöй пö регыд и иніс. Вöлöмкö, и вемöсөн сідз мыйкö шуöмыд инлö вöт моз. Бытьö сюзь байдөгöс вöйшöдлö, райцентрса аэродром вылö

«ЯК-12»-кöд орччöн вувзъысис-пуксис «МИ-4» вертолёт, и сэтысь петысьяс пöвстысь Павел аддзис Шабановöс, бурöвöй мастерöс, код дінын уджалыштис армияöдзыс.

Чолöм да здорово, кытысь да кытчö... Сус коль моз жö киллысьö бур сёрниид.

Вöлöмкö, Шабанов локтö Жеб-Ёльысь, мунö Ухтаö: аски сэні мастерлөн Лун, сэсся актив, сэсся колö бурскладö пыравны, öттор-мöдтор сэсь пычкыны... Но и семьясö, дерт, аддзöдлыны: квартира Ухтаысь сетöмаöсь.

— Ме ордö и сувтлан, тöрам,— гарыштис Шабанов да гыррдзанас на зургис, быттьöкö кытчöкö гусяинö нуöдö. Уль сөйысь вартöм кодъ Шабановыс, латшкöс да сьökыд, и виччысьтөг зургöмсьыс Павел быдөн доровмунлі.— Лок!

— А ті мыйöн тасянь?— юалис Павел.

— Со нö асланым автобус!

— Кöні?

— Со нö!— чирöстліс быдөн Шабанов.

Сідз шусяна аэровокзал да нöшта кымынкö керка сулалісны аэродром бокин, и на сайысь нинöм, дерт, эз тыдав. Но Шабанов, кыз шуасны, век на сэтшöм вöлі: чайтöмыс сылөн збыльсьыс ёна водзын век мунö.

Автобусыс абу на и волöма. Кодкö мöд кö татшöма пöръясьсöм бöрад кöть дузмунлі, а Шабановлы тайö некытчö эз и тöдчыв, сöмын ки пöвсö лэптыштліс:

— Но, локтас! Со восьтісны!— довкнитис юрнас столöвöйлань.

Пызан сайын Шабанов лöньліс, сийö быттьö эз сөй, а помалис кутшöмкö эновтлöм удж. Тэрмасьтөг, думыштчылöмөн. Та вöсна Павеллы вичмис кадыс казтыштлыны бурöвöйын слыштöмсö.

Медводдза удждонсьыс Павел ньöбис часі, кык лун нимкодясис, а коймöд луннас часіыс ас ки помсьыс лэбзис бульдозёрон йötкалöм лöп да ёг чукөрö. Быть вöлі Павеллы тадзисö вöч: кодлы абу дыш, сийö и кутис дöзмöдчыны:—«Ноко, петкöдлы выль часитö!»

А лон со мый. Павел вахта вылын вöлі. Сылы тшöктисны весавны

пожъя конвеер помö чукöрмöm шламсö. Абу, дерт, ошйысяна удж, но бурильщиклөн отсасысьыдлы, кызд шуасны, буретш. И Павел весалис. Локтис нывбаба-коллектор босьтыштны шламсö анализ вылö да шмонитыштис весиг:

— Меным эн и кольышт?

— Со на тэныд ки тыр шламид,— вочавидзис Павел да öдйöджык усйысис. Полис сийö тайö нывбабасыс: котлопунктын көть көни сы динö и пуксьö, аслас кага нин-а.

Но вахта вылын, да он öд узьныли доминоасыны мун. И мед юавны, мый сэсся вöчны, Павел петис бурильщик динö, восьтылис шланг да мыськалис жвучкыс вана сапöгъ-яссö, сувтис видзöдыштны.

Индикаторлөн стрелкаыс шыблассис öтарö-мöдарö, но мыйöн волис «59»-ыс улöджык (подйöдлис бурильщикыс колоннасö), инструментсö пондылис лёкыс нöйтны, весиг топöдан тувъясыс лыбавлисны. Бурильщиклөн первой отсасысьыс кувалдаөн и сулалис, бөр найöс тышкалис.

— Мый нö сидз нöйтö?— юалис Павел бурильщиклыс.

— Мед нöйтö,— веськодя вочавидзис сийö.— Тани öд абу книга серти.

Эз нин öтчыдыс коньöрö пуксьöдлыны тадзи Павелöс. И со бара: зэв эськö техникум помалöмид, да нинöм на он гөгөрво.

Локтис Шабанов. Павел и сылы шуис:

— Со кызд нöйтö. Бытьöкö огö турбобурөн, а киссьöм роторөн буритам.

— А мый, тэнад уджыд абу?— вомалис Шабанов.— Босьт зыр да писькöд эсти, мед шорас ваыс лэччас.

— Писькöда,— лабутнöя вочавидзис Павел да лэччис звöз кодь поскöд.

Кывзысьöмыс-ö Павеллөн чуймöдис Шабановöс али шуöмыс парекис, но недыр мысти Шабанов лэччис Павел динö да тырöм лолөн юалис:

— Тöдан, кызд сэн пластыс куй-

лö? Велöдлисны техникумад?— пöлöса, вывсянь улö, вундыштис сындöсö кинас.

— Та вöсна, шуам, öтарнасджык долотоыс кучкысьö породаас?— пановтис Павел.

— Но!— шыньмунли Шабанов.

— Чеччалö нин инструментыд!— шпыннялöмөн жö водзöсалис Павел да бергöдчыштис на.

— Уна тэ тöдан!— дöжныштис Шабанов да бөр кайис поскöд. Корзьöм брезент плащыс сылөн клопкакылис.

А мыйкö дыра мысти Павелöс чукöстисны. Видзöдлис да, вышка гөгөр гартчыс содйöд котөрөн кайис «вылысса», тэрмасис аслас «потанö». Сэки жö равöстисны дизельяс, пуркнитисны сьöд тшынөн. Вөрзис вывлань талевöй блок... Кад сертиыс кө, долотосö эз на ков вежны. Сидзкö, дугдыны ковмöма буритнысö...

Медся мустöм уджыс инструменттö лэптöмид, мудзыс и няйтыс юр вывтырыд сюрö: сёсыс унджык көрт сись колö лыбöдны, разьны да сувтöдны. Но Павелöс тайö пöрийö йöй-талан нимкодъ ру шымыртис, дась вöли көть кум вахта дорыв сулавны, мед сöмын адззывны, кутшöмöс перъясны долотосö, мед сийö здукас лоны сэн.

Лэптысьны кутисны, да нимкодъ руис, дерт, öдйö и тöлалис. Сэтчö жö Павелöс резыштис сёй лятиөн, водзджык петис «юбка» сайыс да. Ас вылас сэки чöскыда серöктисны, тшöтш и Шабанов.

Рытъя и войся вахтаыслы на тырмöма лэптысьöмыс, весиг кольыш тöма на. И Павеллы эз нин ковмы быть лöсьöдчыны долотосö перйингкежлö: бара вахта вылö петис.

Некодлы лёкöс Павел, дерт, эз көсий, но оні сылы сэтшöма колис, мед эськö мыйкö вöли лöма долотоыскöд. И кор тыдовтчис скважинасыс долотоыс, чайтöм збыльмöмысла Павел чуймылис, а сэсся лигышмунлис: öти шарошка эз вöв, чегöма дзоньнас «лапанас».

ПАРМА ШОР ДОРЫН

Мелі музыкалөн гор
шыалыштө вöрын.
Муса жö тэ, эзысь шор,
ёна мудзём бöрын.
Нопйöс чöвта пырысь-пыр,
кодöс дыр нин нуа,
сэссия чибльöг помысь дыр
кöдзыд васö юа.

Вöвлытём на ыджыд вын
кыин-кокын содас
туйлысь сьöкыдджык мöд джын
бара вуджны подөн.
Меным отсöг вылö сэк
весиг төвру петас...
Мый нö месö ставсьыс,—
эк!—
вөр-ва, тэныд сета?

ТУВСОВ ВОЙÖ

Веж кызд пуöс вөр дi шöрысь
ме аддзылі, муса нывъяс,
кызд окаліс тувсов төлыс
да лелькуйтiс мелі сывъяс.

Дерт, кызд пулы любö вöлі,
мый татшöм шуд сылы усис:
нэр коръяснас öдва вöрис
да вашкöдiс мыйкö гусьөн...

Сэк жаль меным сійö лоис,
збыль муслун эз төдлы кодi,
а тувсов төв вой шөр войын
веж кызд дiнас узыны водiс.

Ой, тувсов вой, лöсьыд жö нин
и тэнад тшöтш мелі сывыд!
Мед тэ кодь жö муса жöник
пыр веськалас быд том нывлы.

КОДЗУВЪЯС

Кодзувъяс, кодзувъяс,
менö тi кыланныд?
Мыйла тi, кыа кор мыччысяс,
сыланныд?
Ачыс тшöтш енэжыс
гажтöмчö тiянтöг,
зарниён мелiа вашъялысь
пиянтöг.
Ичöтсянь тiянкöд
сёрнитны велалi,
пармаысь ордымъяс
корсьтöг кор келалi,

юксьывлі пыр
аслам шогөн и радлунөн...
Öдйö тай мортыдлөн
олан дыр кад мунö!
Сöмын на чужас,
а видзöдан — пöрысь нин,
жебиник лоас
да ньöжйöник вöрысьён.
Тi жö пыр кутанныд
вашъявны-öзйыны,
выль йöзлы шудлунсö
енэжсянь вöзйыны.

ПОЛИКАРП СЕМЕНОВИЧ ОЖЕГОВ, а сиктса ногөн кө, Семö Полюк, гажмас да тувсовья ытвa моз быгзьö:

— Ме абу сэтшöм морт, мед баба ме вылын командуйтис. Шуöма гöтырлы: ша!— кыв оз вудж.

Семö Полюклөн гöтырыс, Магдалина Порфирьевна, сиктса ногөн кө, Пор Магдаль, верöсыслы паныд ёна оз и мун. Корас кө пывсян бöрын штоптö, оз пыксыны мöд. Но сыын и лёкыс, мый мöдыс оз кор. А кодi нö кортöг сетас?

Со кутшöм серпас позьö аддзывлыны. Воас көзяин пывсянысь, чужöмыс öзийö, горшыс косьмö, сьöлöмыс телепит. Пукяс пызан сайö, ырнитас гöтырыслөн мыччöм чашкаысь пöсь чай да быттö оз кылöд сийöс, сiдз и пукалö вомас кутöмөн, сöвгö-видзöдö öшиньö, сöмын син бöжсö чöвтлас Магдаль вылас. А мöдыс быттö вильён чужöм мегö, нинöм оз гөгөрво, ырскö-юö руа чай да сакар торсö вомас тэпнитлiгтыр висьталö верöсыслы, кодкöд талун пывсис, кодi мышсö зыралiс мочалкаөн, кодкöд орсисны öти корöсьөн.

Со и талун весиг чай чашкасö эз помав Семö Полюк, уши-пушиөн вештiс улöссö, петiс вежöсö, öзтiс телевизор да шыбитчис небыд диван вылö, думнас Магдальöс быд ногыс видiс.

А Магдаль быттö кылöма сылысь видчöмсö, матöдчис диван дорö, пуксис бокас, сывйыштiс дона көзяинсö небыдик сойнас, матöдiс вый тупыль кодь чужöмсö Семö Полюклөн тошсялыштöм бан боклань, öзтiс көзяинлысь став лы-сьöмсö.

— Поликарпушко, лёгкöй парөн! Мудзöмыд тай нö. Öти чашка эн вермы юны. Лок, чеччы, гажтöм меным öтнамлы. Юышт штоп быдса, гашкö, и кокниджык лöб.

— Гашкö, и кокниджык,— сöгласитчис Семö Полюк, а пытшкöсас пуö на: «А-а, көч юр, казялiн, кор шыдсö азялiн... А вот ог чеччы дай ставыс».

СЭТШÖМ МОРТ

ВИСЬТ

Но кызди он чеччы. Кызь сайö во нин олöны гозья. Кад нин гөгөрвоны öта-мöднысö. Пуд совтö нин сөйисны öтлаын, куим челядьöс быдтiсны. Кыкыс нин со карын велöдчöны, а коймöдыс, мамей пи, вильыш Коля, витöд классö нин котралö да асьнысö, ай-мамсö английскöйөн велöдö: а ю ду ю ду — дучкы пö да ю.

Полюклы тайö век усьлö дум вылас, кор гöтырыс штоп мыччас...

А пукалöны талун гозья — öта-мöд выланыс оз видзöдны. Сыргöны-юöны пöсь чай. Öтикыслөн чайсö кизьöртыштöма «экстраөн», мöдыслөн «экстрасö» кизьöртыштöма чайөн. Кыкнанныс зэв норöсь, шогöсь, быттö пöрысьмыштöмаöсь.

— Нюра нылыдлөн пальтоыс абу тöv кежлö. Тöдан, он?— недыр мысти нурбыльтö вом горулас Магдаль.

— Кывли,— шуыштас Полюк.

— Марина нылыд гижö, көмыс пö абу мода серти,— водзö нуöдö гöтырыс.

— Мода, мода... дона-ö?— небзыштö бать сьöлöм.

— Сизимдас.

— Сизим дас... Дас куимöд удж дон... Ньöб...

— Чери сьöм вылö кө а. Көпейка ни руб зептын абу. Мыйла нö этша ваян?

— Чаг пыдди тай көпейкаөн да рубөн пельöссьыс оз чеччы.

— Порсьсö кө видзам...

— Ме жö шуи: ша!— Семö Полюк скöрысь вештö чай чашкасö.— Ме абу сэтшöм морт, мед...— И эз помав Семö Полюк. Гöтырыс жаль. Абу окота Магдальсö öбöдитны. Öд и аслас сьöлöмыс зэв жö көсийö, мед ньöбны öти нылыслы виль пальто,

мод нылыслы мода серти сапожки, а Коля пиис на и коньки тшөктө лөсьодны да мед ещө и ботинкинас тшөтш. А сийө, Семө Полюк, көть и абу омөль плөтник, но уджалө РСУ-ын, веськыдджыка кө, ремонтно-строительной участокын, көн сөмын важсө дөмлөны. А коді нө дөмас пуктөмысь бур дон сетас. Йөйтавлөма жө эськө да. Но өні гыррдзатө он курччы. Стаж. Северной. Петан кө и вошас. Магдаль көть и зоотехник, но райцентрын скөт дорө эз мун, сберкассаө пырис. Уна деньга дорын эськө, а гортас сысы на этша вайө... Но порсь... порсь видзны сэся Семө Полюк оз көсий. Оз көсий и ставыс, чорзис сьөлөмыс Семө Полюклөн тайө пемөсыс вылө.

Делөыс сыын, мый порсьпитө судзөдө Магдаль, лыддысьсө, мый сийө дөзьөритө порсь бөрся, но, збыль вылас, ёнджыкасө верөслы вичмө тайө уджыс.

Со мый вөсна и дөзмылас Семө Полюк этайө мустөм пемөсыс вылө, оз көсий сэся видзны. Но быдтасны порсьсө во чөж, сдайтасны мясомолпромө, босьтасны кык төлысьсө удждон мында деньга өтпырысьсөн, лөсьодасны сы вылө бур добра, бара и вунас ставыс, гылалас сьөлөмысь став лөкыс. Бара порсьпи судзөдасны.

Но сы бөрын, мый вөлі неважөн, нинөм вылө оз кутчысь порсь дінас Семө Полюк.

А лонс со мый.

Лэччис сэки Семө Полюк гидө вердчыны, а порсьыд оз сөй. Сюйлас нырсө ворйө, чушкө, резө-койө васө, а оз ю, оз сөй. Полюк чукөстис гөтырсө. Сийө видзөдліс да и аддзис, мый Васюклөн сьылыс гөрд чутъяса. Ветеринарөс корис.

Ветеринарной фельдшер Михей Иванович Чиреев видзөдліс да шуис: рожа пө. Сэтшөм пө висьом эм порсьяслөн. Мазь сетис. А мазьыс сэтшөм дука, төдтөм мортөс метра сайсянь пөрөдас. Мавт пө, Магдалина Порфирьевна, тушасө ставнас да гыжъяв шөткаөн, мед быд гөн сі костө пырас мазьыс. Раз-мөдысь, и бурдас.

— А мед нөшта на өдйөджыка бурдас, инъекция вөчам,— шуис ве-

теринар да перйис укол вөчан ем.— А тэ, Поликарп Семенович, гыжъяв тварсө, мед куйлө. (Магдаль удитөма нин вөлі петны гидсьыс да пырөма гортас мазь мавтан шөтка корсьны). Гыжйыштіс Полюк чошөс, сийө и жботкысис-водіс, куйлө, ружтө, любөсьыс синъяссө куньөма. Но сөмын на ветеринар Чиреевыд инмөдчис пемөслы бокас укол вөчан емнас, кызд тай сийө чирөстас, чепөсьяс, паськөдас көин кодь клыкъяса вомсө да зырөдас ветеринар вылө. Гашкө, и төдіс, коньөр, мый тайө жө мортыс коркө ичөтнас на ёна и дойдліс сийөс, кодзис да. Тадз ли абу тадз, но Чиреевыд ушлөй вөлөма, пуля моз лэбзыштіс гидысь. Эз и вөвлы быттьө. А гид өдзөсыд подлассис. Сап пемыд лонс. Семө Полюк көть и плөтник ачыс, но гидтө временнойсө вөчліс, весиг өшиньтор эз писькөд. Сідз пө олыштас. Оні и жалитіс та йылысь. Но киссьөм ватө он курышт. Сэтшөм друг шуштөм лонс Полюклы, көть пернапас чөвт. Сөмын на думыштіс, мый со татшөм жө пемыд лоө, кор тэнө сюясны кыз му улө, кызди гатшөн лэбзыштіс гид стенлань, дойдіс юрсө да көлачөн тупыльтчис куйөда джодж вылө. Сэтшөма кутіс доймыны кок вож костыс. «Курчис өд, лешакыд!»— сөмын и кужис думыштны, кызд бара лэбзыштіс, но люкачис буретш өдзөсас да сийө воссис. Нель киа-подаөн вирдыштіс-петіс вощьом розьод да сэтшөм жө тэрыба пыкис мышнас өдзөсө, мед эз пет гидсьыс дявөлө пөрөм чошөыс.

Сідз и суис сийөс Магдаль, кор петіс керкасьыс, мед вөчны висьом порсьылы ветеринарной процедура.

— Эн мавт,— шуис гөтырыслы, пыраліс гортас, петкөдіс пищаль да лыйис порсьсө. Сэся черөн жуглис порсь гид джынсө. Көдзальыштіс ачыс да кулис кучиксө порсьлысь. Яйсө сдایتіс сельпоө, муссө тшөктіс жаритны гөтырыслы.

— Ша! Порсь сэся ог видз,— шуис плөтник ёртъясыслы. Весиг бригадырыс экис, жалитіс Полюкөс, мый содтөд сьөмысь өткажитчис.

— Кызд көсьян, Поликарп, он кө и эн,— эз ёна кут вензыны и гөтырыс. Абу шумитысь Магдаль, шань

ны вбаба. Юрсисö эз кут нетшкыны порсь вöсна.

Тöвбыд олісны гозъя порсьтөг. И сэтшöм кокни вöлі Полюклөн сёлөм вылын. Оз ков гөтырсьыс водз чеччыны да вуджны сы вомөн, ломтыны кухняысь плитаа пач, пусьыны порсьлы.

Кутшöм лөсьыд вөлөм овны порсьтөг! Дивья, коклөн тайö тöждлуныс абу. Тайöс бура гөгөрвоис Семö Полюк, кор дзонь кузь тöвбыд гидыс вöлі жугалöма да тыртöм.

Но воис öтчыд гортас, гримкнитис-пуктис черсö посводзö, восьтис керка öдзөссö, а джодж кузя китшикотшиөн вирдыштис крöвать увлань еджыд мач кодь чошö. Полюк весиг джөмдіс öдзөс порог дорас, кокъясыс лайкмунлісны, сёлөмыс ыпнитліс да став туша кузяыс пöся-көдзыдаөн исковтис-разалис вирус.

— Эт-тайö нöшта мый?— некодöс на эз аддзы порсьпиысь кындзи, но юалис стрөг гөлөсөн Семö Полюк.

— Чушка-Чушенька-Чушок, папö,— кыськө петіс Коля пныс.

— Ноко, Николай, пыртлы папыслыс лэчыд черсö...

А Магдаль сывьялö нин верөссö.

— Поликарпушко, шудыс миянлы! Гортөдз вайисны. И дзик прöста. Комын шайт. Дон мөй тайö öні? Ветымынысь нин вузалöны. Но ме доз вылö сеті жö. Бутканысь вайисны, рочьяс. А видзöд, видзöд, кутшöм тэрыб! Морöсыс — корöль... Ме со и тэныд на доз босьті...

Семö Полюкөс нö коді оз тöд, көзяин на сійö гортас. Доз көть абу доз, дозтö и ачыс на, колөкө, вермас ньöбны, көсьяс кө. А гортын лөö сідз, кызд көсьяс көзяин. Но дыр-кодь нинöм оз шу көзяин. Чöла пөрчысьö, мысьö. А чошөпи быттьö оз аддзы көзяинöс, вирдалö-котралö лакируйтöм джодж кузя, усьлö да бара чеччö. А со и Полюкы кок дорас матөдчис, йирыштис сапөгсö. Көсийс чужыны сійöс Полюк, мед лэбзяс вöсьса öшиньöд. Но жалыс петіс: эт-татшöм ичөтик на да, еджыднік быг кодь.

— Абу места сылы краситöм джодж вылын котравны,— скöра-кодь сэсся шуис көзяин да пуксис ужнайтны.

— Öні югыд на, петалам да вöчам гидсö,— сёянтор лөсьöдігмоз шуö Магдалина.

— Сөйтөгыс али мый?— дөзмö Полюк.

— Бöрас, дерт, мый тэ.

— Ачыд кө дөзьöритны кутан, петала.

— Да öд ог жö Колялы тшөкты? Дерт жö ачым. А öтчыд кө петкөдан ведрасö, кынд оз на ор, кокыд оз на чашкав.

Ужын бöрын Семö Полюк петалис дзоньтавны джынвийö жуглөм гидсö да весиг öшинь сэтчö вöчис. Колö жö öд кывзысьны коркө гөтырыдысь.

И бара заводитчис...

Ставыс эськө лючки-ладнö муніс Ожегов гозьялөн: порсь быдмис, челядь велөдчисны, Коля весиг «двойкаяс» эз кут ваявны. Ставыс вöлі бур. Но кор воис порсьпиөс кодзан кад да Магдаль шуис верөсыслы, нуөдлы пö сійöс ветеринар дорö, да Полюк босьтис порсьпиөс морөс бердас, казялісны гозья, порсьпиыд абу Васюк вөлöма, а Машук.

Энь порсь, энь порсь и эм. Быдмыштас тöлысь вит, сійöс ай порсь дорö кутас кыскыны. Весиг сөйны дугдö, а сөйтөгыс кытысь гөсыс лөö. Асьныс Ожеговьяс порсь яй оз сөйны, абу велалöма коркөя вöравлысь мортлөн порсь яад. А сдایتны мясомолпромö татшöм ичөтикөс — йөз серам сөмын. Быть ай порсь дорö колö нуөдлыны. Дерт, дон вылö. Дзонь вит шайт Машуклөн «капризыс» сулалö. Да и кодзтöм ай порсьыс оз туй вылын туплясь. Оль вылын, кытөн олөны Ожеговьяс, сөмын кыклөн и эм, Көнэй Сандырлөн да Ванька Машейлөн. Ванька Машей дорö Полюкөс неуна вежөгтö гөтырыс, коркө том дырйныс нылазонмаасьöмаөсь öти сиктын быдмигөн, а Көнэй Сандыркөд Полюк оз лөсяв ачыс, Магдальыс сійöс ошкө кызд бур көзяинöс да. Тэ пö гортад локтан да сөмын ныжмөм чертö ваян, а Көнэй Сандырөс аддзылін-ö коркө куш киөн гортас локтөмөн, пыр мыйкө киняулас жмитыштöма: то пөв тор, то рейка, то турун рөч — абу пö тэ кодь пролетарист. Сысыс

и оз радейт сійос Полюк, кулак рөдысь быттьо Сандырыс да.

Думайтчо та йылысь Семö Полюк, а сы кості Машка порсь оло да маитчö, нинöмсö оз сей, зыртчö-ниртчö гид стен бердлань, мурзö-руксö, йирö вердчан ворсö. А Ожегов гозьялы веськодь.

Машук сэки ачыс водзмöстчис. Кыдзкö-мыйкö петис аслас йöрысь. Делöйс вöлі картупель пуктан кадö. Öшинь ув йöръяс восьсөн на видзисны. Öти кывйөн кө, вöля. Руксигтыр уськөдчöма Көнэй Сандырлы гид дорас, кытөн видзö сійö кодзтöм ай порсьсö. Кык вылысь найö кыпöдасны ныръясананыс потша-майöга йөртö да и öтлаасясны. Кор казялас Көнэй Сандыр, вöлöма нин сёр, кык порсь куйлöмаöсь нин орччөн да пöt рушкуа попа-попаддя моз куньралöмаöсь векни потаса синъяснысö.

Машкалы, дерт, весасьны ковмас Сандырлөн зоръялöм бöрын, но гортас котöртигөн бара на тшапнитас Ванька Машейлысь кыр порсьсö. Кор Полюк воис удж вылысь, найö куйлисны нин кыкөн йöрын да любöысла ружтисны.

Та бöрын Машка раммис. Кутис сёйны да гөссявны. Көнэй Сандыр кыкысь шыödчыліс Семö Полюк дорö, мед сійö мынтысис удж вöчöмысь, а гöтырыслы казтылöма та йылысь жö и Ванька Машей. Но Семö Полюк абу сэтшöм морт, мед шыбласьны вит шайтъясөн. Йöзлөн оз ков, но и асьыс оз кой. Да и он тöд, кодлы мынтысьны. «Мынтыся ме Машейлы,— думайтö Полюк,— а Сандыр асьыс кутас корны, аддзылöмаöсь йöзыс, мый сэні первой вöлöма. А мынтыся Сандырлы, Машей оз прöстит. А сійö öд суседка. А ог жö öд кыкнанныслы мынтысь». Сідз и эз мынтысь некодыслы.

Та вöсна нöшта на торксис Сандыра-Полюка костын дружба, а Магдаля-Машея видзöдны кутисны öта-мöд выланыс синкым пырныс.

Мед чушъялöны. Оз помась светыс Сандырөн да Машейөн. Но татчö жö мöд шог инасис, Машка порсьлы вайсьыны колö, а Полюклысь гöтырсö, Магдальöс, больничаö водтöдисны операция вылö. И эз кызди

бур войтырлы, райцентрын вöчны операциясö, а карö нуödöмаöсь. Докторыс пö, хирургыс, татысь отпускö петöма да чери кыйны ю йылö кайöма.

—Частöджык синйив порсьтö, эн вунöd,— велöдис верöссö Магдалина, кор водтöдисны больничаö.— Победа праздник бöрын делöйс вöлі. Со и лыдды: куим тöлысь, куим вежон, куим лун. Сентябрь коймöд лунъясын кымын буждан кадыс. Босьт сөстöм рузум... А бурджык, суседкатö чукöст.

— Ванька Машейöс?

— Мыйкö и тöдас тэнад Ванька Машейыд, ай порсьяс кындзи. Ира бабöс чукöст, абу öмöй сійö медсяматыс суседкаыс,— дöзмö Магдаль. Да тайөн и помасьсö Полюкөс велöдöмыс.

Сентябрь öтикөд лунö Полюклөн дырджык узьсьöма да öдва удитис чайтор пузьöдлыны электрочайникөн Коля пиыслы. Сэсся ськөд тшöтш ачыс школаö кайис.

Медводдза звöнок сетöм бöрын Семö Полюк довгис гортас. Лэччис порсьсö вердны, а сійö куйлö да ружтö, сьыліыс гөрд.

«Рожа,— повзис Полюк.— А öд лун-мöд мысти колö вайсьыны». И сэки, кор сöмын на та йылысь думыштіс Полюк, порсьöс кутис тарзьöдны, кокъясыс бриня-бринякывны кутисны, быттьö чеччыны көсйö порсьыс кокъяс вылас, а оз вермы. Сэсся лэптыштіс юрсö да сідзи ружöктис, быттьö кырисны сійöс. Полюклөн весиг сьölöмыс дрөгмунліс жалысла. Көсйис нин петны гидсьыс, котöртны ветамбулаторияö, кызд пельясöдз воис кутшöмкö шы, быттьö ваысь кодкö петис. Видзöдö Полюк, а порсьпи куйлö мамыс дорын. Гөгөрвоис Полюк, мый вöчсьö Машкакөд. Водзджык артмис делöыд гöтырысөн урчитöм кад серти. «Но мыйла нö сійö кулöмöс вайис?»— öдийöджык перйис зепсьыс носөвöй чышъянсö, малыштіс сійөн порсьпиöс нырöдыс, сійö и ловзис. Полюк котөрөн пыраліс гортас, нешыштіс мыссян доз дорысь ки чышкөд да бөр гидö. А сэн быттьö конвейерысь петалöны... квайт, сизим... көкъямыс... Ичөтикöсь, зумыд-

о́сь, пессо́ны, руксо́ны-чилзо́ны, сю-
йо́ны быдлао́ нырнысо́. «Мый нако́д
во́чны?»— оз го́гөрво Полюк. А мам
порсь век на куйло́ да ружто́, быттьо́
эз на помась вайсьо́мыс. И збыль,
бара заводитчис. Окмысо́д... дасо́д..
дас о́тикодо́... дас кыко́д.

Токо́тьо́ эз йоймы Семо́ Полюк,
кор та мындаыс сы го́гөр кутисны
котравны. О́тикос питшо́гас сюяс,
мо́дос зептас, коймо́дос чышкало́-ко-
со́до ки чышко́днас, ко́дос о́дзос са-
йо́ шыбитас, ко́дос мамыс дорё йот-
ко́...

Сэсса порсьыд лонис. Бура кутис
лолавны, весиг сувтліс. Но Полюк
гыжъялыштис да бо́р водто́дис, а пи-
янсо́ нёнъяс дорас йоткало́. Ота-мо́д
выло́ кавшасьомо́н ставо́н кутисны
чупкыны-нёнясьны. Но мый тайо́?
Колис нин сы мында кад, а неко́ди
оз по́т. Видзо́дліс Полюк порсь мам-
о́с, а сыло́н чупьясысь йо́лыс оз лок.
Чайтис быро́ма нин, но бо́рынджык
казяліс, мый мамыдло́н йо́лыс абу и
во́влёма. Со́мын кык чупысь неуна
локтышто́ йо́лыс, а мукодо́ чупьясыс
тыртмо́сь. Весиг юрсиыс сувтліс
Полюкло́н. Мыйо́н но кутас вердны
та мындасо́? Мо́с ни ко́за о́д абу.
«А, гашко́, и эм аслас йо́лыс да оз
сет, со́тананызыыд?» Полюк котор-
тис Ира баб дорё, но сыло́н таса кер-
каыс. Зыро́дис Ванька Машей ордо́,
ки по́лодыс и кыкис порсь гидо́, но
и Машей нинмо́н эз вермы отсав-
ны, ко́ть и корко́, колхозын на оли-
го́н, порсь видзысьо́н во́влёма. Со́-
мын, кор аддзис та мында чошо́пи-
янсо́, клопнитис княснас лядвейясас
да гораа ышловзис:

— О! Деньгаыс Магдальлы.

«Збыль о́д,— дивуйтчис ас вылас
и Полюк, мый о́но́дз на эз куж та
йылысь думыштчывны.— Комын
шайто́н ко́ — куимсе́ (кыксо́ аслы-
ным колям), да асьсо́ мамсо́ сдай-
там — витсе́... Ого-го...»

— Меным выло́ быть о́тикос ко-
лян, а, гашко́ и, дон босьттог на,
уджйозао́сь на асьныд,— шуис Ма-
шей да муніс гортас. Полюкыс ков-
мис бара ветеринар дорё котортны.

— Вермас лоны,— го́гөрвоис ло-
омторсо́ Михей Иванович Чиреев.—
Тыдало́, важ микробьясыс кольо́ма-
о́сь, со и висьмис, сы во́сна и водз-

джык тожо́.— И порсьлы бара укол
во́чис. Но тайо́ абу ко́дзо́м ай порсь-
ыд, весиг эз кывлы быттьо́. «Му-
жикьяс по́ ёнджыка жо́ поло́ны
уколсьыд»,— дум вылас усис По-
люкыс.

Семо́ Полюк пыртоди́с гортас став
польо́писо́, кум лун чо́ж на лэчодо́-
ліс найо́с очередьо́н, мед нёняласны
мамныслысь кык ловья́ чупсо́, а нё-
льо́д луннас эз нин ков лэчодо́лыны.
Восьтис о́дзоссо́ гидысь, а порсьыд
пласьт куйло́, ко́дзалёма. Токо́тьо́
сьоло́мыс эз чеччы мороссьыс По-
люкло́н. Весиг чужине скормо́мысла
порсьлы кын бокас. «Эт-татшо́м скө-
тина!— видчыны заводитис По-
люк.— Ачyd кулі́н да-й мено́ мука
выло́ колин. Дас кыксо́ но кыззи
вердны ме кута!»

Сідз и гуавны ковмис мам порсь-
о́с яйнас и кунас.

— Дас кык чошо́пи котралісны
о́ти жырйысь мо́д жырйо́ вильыд
джодж кузя. О́ти усьо́, мо́д чеччо́,
коймо́д зурго́, нёльо́д...

Полюк медпервой се́рнитчис дет-
ско́й кухняса по́варко́д, ко́дко́д во́лі
неуна то́дсако́дъ, да сэтысь кутис
ваявны йо́в. О́тикос нёньодас ичотик
бутылкаысь резина нёньо́н, ко́робо́
шыбитас, мо́дос босьтас... Кор ста-
во́н по́тасны, о́тчукоро́ водасны да
ло́нясны. Со́мын на удитас унмовсь-
ны Полюк, а дас кык польо́пи чечча-
ло́мао́сь нин ко́робысь да джодж
кузя котралёны-вирдалёны, руксо́-
ны, тшыгьяло́мао́сь.

Коймо́д луннас на и босьтис став-
нысо́ мыт. Со́мын на юасны йо́всо́,
бо́р нин пето́.

Полюк ветфельдшер дорё. Чиреев
ас мортон нин лоис Полюкыс, быт-
тьо́ вокко́д сыко́д се́рнито́. А Чиреев
век важ ко́дъ. Сетис лекарство, пени-
цилин, пукты по́ сийо́с йо́лас да и
юктав. Тшо́ктис тадз да и муніс. Но
и таысь некутшо́м польза эз ло. И
дум вылас усис Полюкыс, мый сийо́
кос чо́дийо́н да кос льомийо́н таысь
весько́дчывло́. По́жис кос льом, васо́
кисьтис порсь пияно́с вердан йо́ло.
Кажитчо́ бурджык лоис. Но асывнас
о́тик эз сувт кок вылас. Ковмис пет-
ко́дны да гуавны муо́. Рыгнас мо́д
көйдис. Полюк дугдис вердны льомья
вао́н. Со́мын детско́й кухняысь ва-

йом бур йёлөн кутіс вердны. Но өти-
көн-өтикөн порсьпиян кутісны энов-
тавны Семё Полюкльыс керкасё.

— Кызди олан, сусед?— пырис өт-
чыд Ванька Машей..— О госпо-
дьёй!— клопнитіс лядвейясас.— Ву-
залін нин?!

Полюк висьталіс аслас шоглун
йылысь.

— Кыкёс ме босьта. Быдта. Абу
мужик делё тайё. Сет, Поликарп Се-
менович,— кевмысис Машей. Но
Полюк и сёрнитны оз кёйы.

Полюк эскис, мый мукёдыс сёсся
оз кувны. Но эз сы ног ло. Дас лун-
ён пёрис стёч дас польёпи. Сёмын
кыкён медводдза чужёмъясыс, кодъ-
яслы удайтчис медпервой нёня-
лыштны мамныслысь йёвсё, эз вись-
мыны. Быдмисны вильышсёс.

Кор Магдалина воис больничаясь
да Полюк ставсё висьталіс, кызд сі-
йё нёйтчис, кымын вой узьтөг колис,

семьялы кутшём урон лоис, Магда-
лина сёмын и шуис:

— Ковмас кыксё сёсся быдтыны...

Сэтчө и лёзөдіс чужёмыс Полюк-
лөн:

— Со босьта да косьобта тыртём
кымёсад этайё кулакнас, гашкё,
сямвыв сёки усян!

— Йёймин кё тэ а...

— Йёйман... Ог кут видзны и всё!
Ша!

— Меным али мый колё...

Чөв пукалёны Полюк гозья пы-
зан сайын да кизьөртёны чайсё «эк-
страён». Гортын сёсся некоді абу.
Жальыс петё верёслөн гётыр вылас,
сьөдөдыштёма больницаас мича
Магдальыс, но воддза кодъ на мелі.

— Но, дзоньвидзаён тэнё, Магда-
лина Порфирьевна,— торкё чөвлун-
сё Полюк.— Этайё порсьпиян пон-
да... А гидсё выльёс ковмас вёчны,
ыджыдджыкёс.

Век стройын

ОЧЕРК

Во-мөд сайын өти ёрткөд өтлаын ми вөлим Москваын, СССР-са ДОСААФ-лөн Центральной Комитетын, көс-йим аддзысьлыны генерал Одинцовкөд. Воим сэтчө индөм кадысь дас минутон водэджык. И друг ми аддзам, кызди коридор кузя локтөны кык ыджыд военной морт, кодьяслөн гачьясас гөрд лампасьяс. Накөд паныдасьясьяс пөся чолөмасысны, өткымынъяс сувтлсны «смирно».

Кор найө матысмисны, ми аддим Великой Отечественной войнадырся нималысь лётчик, Советской Союзас куймысь Герой, авиацияса маршал Александр Иванович Покрышкинөс да миянлысь земляк генерал-полковник Александр Иванович Одинцовөс — СССР-са ДОСААФ-лөн ЦК-са председатель да сылөн первой вежысь.

Ми аддзысьлим генерал А. И. Одинцовкөд, дыр сёрнитим ськөд.

Но ме заводита тайө гижөдсө куйм восайса вөвлөмторсянь.

Вөвлытөм уна йөз локтисны военно-технической велөдчан Сыктывкарса керкаө. Татчө чукөртчисны областной конференция вылө миян республикаса ДОСААФ став организациясысь представительяс. А кор патриотической обществолөн обкомса юралысь Н. Х. Валитов юөртис, мый конференция вылө локтис генерал-лейтенант



А. И. Одинцов, став делегатьяс дыр да пөся аплодируйтисны. На пиясь унджыкыс төдисны нин, мый Великой Отечественной война дырйи нималысь тайө мортъс налөн земляк. Медся радөсь вөліны, дерт, Усть-Вымской районса делегатьяс. Од генерал Одинцов чужлис налөн районса Семуково сиктын. 1937 воын, Ленинградса военно-политической училищеө пыртөдз, уджавлөма комсомоллөн Усть-Вымской райкомын.

И уна делегатьяс көсийсны бурджыка төдмасыны асланыс земляккөд, сёрнитыштны ськөд, юасыштны, кызди воюйтлис генерал.

Ме ачым аддзыли, кутшөм интересөн да радпырысь видзөдисны досаафовской школаса том курсантъяс гене-

ральской кительыввса орденъяслөн да медальяслөн квайт орчча колодкаяс вылө.

— Ленин орден! Өти, кык, куйм, нель боевой Красной Знамя орден, Красной Звезда орден, уна лыда медальяс,— висьтавлис конференция вылын ёртыслы Койгородокса бытөвой обслуживание объединениесьс электрик Саша Маранин Койгородской леспромхозса слесарь Владимир Тороповлы.

Оз ло лишнойөн, шуныкө, мый конференцияыввса унджык участникьяс көсийсны төдны асланыс землякысь боевой биографиясө. Тайө вөли эз прөстө любопытство. Быдөнлөн вөли земляк вөсна гордость, көсийөм лоны сэтшөмөн, кутшөм

А. И. Одинцов.

— Мыйсянь и заводитны? — думайгыштөм бёрын юалис Александр Иванович. — Служити нин Сöветскöй Армияын комын көкъямыс во. Тайö вöліны сьöкыд уджалан да велöдчан вояс. Военно-политическöй училище помалöм бёрын менö индiсны ротаса политрукöн. А регыд ковмис участвуйтны финскöй событиясыч. Позьö казтыштны, мый öти кось дырйи меным ковмис вежны батальонса пöгибнитысь комиссарöс. Сэсся и ачым сьöкыда ранитчи. Госпитальын нин мен воис рад юөр — меным вöлі сетöма медводдза боевöй награда — Краснöй Знамя орден.

Эз дыр кыссы мирнöй кад. Миян Рöдина вылö зверьяс моз уськöдчисны фашистскöй ордаяс. Великöй Отечественнöй война заводитчöм суис менö Смоленскын, көнi ме вöлі велöдча пропагандистьяслөн высшöй курсьяс вылын. 1941-öд вося июль тöлысь заводитчигөн менö, мукöд офицерьяскöд öтлаын, корисны Рытыввыса фронтлөн штабö. Сэни тöдмалi, мый менö индöны Сöветскöй Армиялөн медводдза диверсионно-разведывательнöй отрядö комиссарöн. Буретш куим во, пöшти тысяча сё лун, ме вöлі враглөн тылын. Война помасьöм бёрын нин помалi М. В. Фрунзе нима Военнöй академия, а сэсся и Генеральнöй штаблысь Академия. Меным воис сьöлөм вылö военнöй служба, сетi сылы став олөмöс. Вöлі ответственнöй команднöй да штабнöй уджьяс вылын, уджалi Генеральнöй штабын, веськöдлi СССР-са Оборона Министерстволөн главнöй управлениясысь öтиөн. Öнi, со, нёл воысь дырджык нин уджала ДОСААФ-лөн Центральнöй Комитетын.

Пöшти нелямын во сайын сувтiс Сöветскöй Армиялөн боевöй стрöйö Александр Иванович Одинцов, көнi сiйö мунис ыджыд туй кур-

сантянь генералöдз. И став тайö кузь да сьöкыд армейскöй туй муномсö сiйö висьталiс сэтшөм скупа, мый и газетын оз ло нелямын строкаысь унджык. Юалим: мөвпалö-ö сiйö гижны война йылысь казтылөмьяс, сьөн веськöдлан диверсионно-разведывательнöй отряд йылысь мемуарьяс?

Александр Иванович вочавидзис тадзи:

— Мемуарьясыд, дерт, буртор. Но эмöсь на Великöй Отечественнöй войнакадся ещö ярьюгыдджык да тöдчанаджык лист бокьяс, кодьясöс вермасны гижны ветераньяс...

Тайö воча кывьяс ещö öтчид петкöдчис заслуженнöй мортлөн скромностьыс. А миян земляклы эськö эм мый йылысь висьтавын.

— Рация пыр воис приказ Рытывыв фронтса командующöй, армияса генерал Жуковьянь: пырысьтөм-пыр петны враглөн тылысь. 1941 вося декабрь 11 лунö воим Московскöй областьяса Перхушково көрт туй станцияö, көнi вöлі сэки фронтлөн штабыс. Доложитiм командующöйлы рейдөн ветлөм йылысь. Сiйö аттьöалис мянöс, сетiс наградаяс...

Кутшöма ставыс прöстöя да шылыда. Но партизаньяс-салдатьяс, кодьяс воюйтiсны Одинцов веськöдлөм улын, асланыс казтылөмьясын висьталiсны, кутшөм сьöкыдлуньяскöд паныдасис отряд враглөн тылын рейд нуöдан первой луньясö жö.

РККА-лөн первой диверсионно-разведывательнöй отряд, кодөн командуйтiс старшöй лейтенант Александр Шевченко (öни генерал-лейтенант, Сöветскöй Союзса Герой, пыр на служитö армияын), а комиссарнас вöлі миян земляк, öтувтiс 100 добровольцöс — Москва коммунистьясöс да комсомолецьясöс. Сылы вöлі сувтöдöма мог: нуöдны разведка, тöдмавын вражескöй войскалысь дислокацияяс, вöчны диверсияяс,

кутны партизанскöй отрядьяскöд йитöд да сетны налы отсөг. Öтшöтш вöлі формируйтöма ещö куим татшөм жö отряд. Сэтчö пырисны смел воиньяс-доброволецьяс пöшти став миян союзнöй республикаясысь.

Со кызди гижö сiйö сьöкыд луньясся событияс йывсыс генерал-лейтенант А. Шевченко: «1941 вося июльын ми петiм окружениеысь батальон колясъясöн, кодөн ме командуйтлi. Менö корисны кадрьяс отделö. Полковник Белянин шуис:

— Кöсьян веськöдлыны отрядөн, кодi кутас действующитны прöтивниклөн тылыны? Уджыс зэв кывкутана, боевöй.

Ме немтор эг вочавидз — вывти ёна волнуйтчи. Дум вылö усис Денис Давыдов, код йылысь лыддылы водзынджык. Тайö вöлі менам радейтана герой. И, со, öни аслым колö мөдöдчыны отрядөн враглөн тылö.

— Мый чöv олан? — юалö Белянин. — Мунан?

— Дерт жö!

Тадзи ме лон отрядса командирөн.

Сiйö жö лунас тöдмаси отрядса комиссар, политрук Александр Иванович Одинцовкöд. Сiйö воюйтлöма нин, наградитöма Краснöй Знамя орденөн.

Сэсся мянöс нуöдiсны маршал С. К. Тимошенко дiнö. Сёрниысь лонс гөгөрвоана, мый тайö сылөн мөвпыс, мед котыртны боевöй отрядьяс, кодьяс кутасны дзугны враглысь коммуникацияяс, вöчны диверсияяс, паськöдны прöтивниклөн тылын паника, судзöдны миян командованиелы разведывательнöй даннöйяс. Семен Константинович дыр сёрнитiс мянкöд, юасис бойяс йылысь, гитлеровецьяслөн тактика йылысь, сөветуйтiс, кодьясöс босьтны отрядö, кызди вооружитны сiйöс, кызди действующитны сiйö либö мөд обстановка дырйи, кутшөм даннöйяс чукöртны

командованиелы, кызди юортны найос.

Кык вежонён ми эштөдём отряд формируйтём, и Смоленской му вылын, Белой кар районын пырим наступайтысь фашистской войскалы тылө».

Торйөн ёна петкөдліс асысё Шевченколөн да Одинцовлөн отряд 1941 вося августын, кор жугөдіс ыджыд карательной фашистской отряд. Немецьяс веськалісны засадао, и найос ставнысё вөлі бырөдөма. Салдатской книжкаяс лыд серти 120 мортос. А ставыс куим төлысь чөжөн отрядын чукөрмис 600 гөгөр книжка. Артмис, мый отрядса быд воин виис квайт гитлеровецс.

А вуджаліс отрядыс фронтлысь линия 1941 вося июльын сәні, көні сулаліс генерал Доваторлөн корпус. Нималысь генерал воддза луннас дыр сёрнитіс отрядөн веськөдлысьяскөд, сетіс советьяс, кызди дейстуйтны, сиис налы бур туй.

Отряд меститчис сук вөрын. Асывнас петісны вөр дорас. Эрд вылысь аддзисны гитлеровецьясөс, кодьяс вөлі кодйоны окопьяс.

Примитоны решение: босьтны пленнойос.

— Коді мунас сыла?— шыөдчис командир.

Чукөстчисны сөмын кык морт. Мукөдыс — нюзма-сьоны. Шевченкоос тайө скөрмөдіс. Сійө гөгөрвотөма видзөдіс боецьяслөн строй вылө.

— Сідзкө, мунам ме да комиссар,— ясыда да гораа шуис командир.

И сәки водзланьө воськовтісны ставөн — быдөн вөлі дасы мунны задание вылө.

Но Шевченко эз веж асыс кывсө.

Некымын час чөж кыссис нель отважной воинлөн медводдза операция и эз ло весьшөрө. Лун шөра луно найө вайөдісны зөв ён нель фашистс. Кыкыслөн вөліны повтөмлунысь крестьяс.

Командирлөн да комиссар-

лөн личной примерыс ышөдіс воиньясөс, век кежлө бырөдіс налысь полөмлун. Боецьяс аддзисны асланыс синьясөн, мый фашистьяс-ынд абу нин сәтшөм вына воякаяс.

Пленнойясөс допроситөм бөрын войнас радист юөртіс командованиелы медводдза разведданнойяс. Тадзи заводитчис сё советской боецлөн враглөн тылын олөм. Отряд вөчаліс диверсияс шоссейной да көрт туйяс вылын, усьласис обозьяс вылө, гитлеровецьяслөн негырысь отрядьяс вылө.

Отряд вөлі прөтивниклөн тылын кык төлысь, муніс косьясөн витсё километр, бырөдіс боеприпасьяс тыра некымын дас машина, уна сё гитлеровецс, юөрталіс фронтса командованиелы колана даннойяс.

Но бергөдчылам сыө, кызди война дырйи А. И. Одинцовлы сетісны медводдза награда.

— 1941 вося ноябрын,— казтылө Александр Иванович,— тайө кадас Рытыввыв фронтөн веськөдліс армияса генерал Жуков, сійө корис миянөс ас дінас. Миян вөліны фашистской командованиелөн важной документьяс. Петны тылысь эз вөв кокни. Войся өти бой дырйи миян усины дас морт. Дасөн. Отрядлөн дасөд юкөныс. Дас судьба, дас несчастной семья. Миян медводдза воштөм. Но фашистьясөс ми вольсалім унджык. Вөчим сідз, мый войнад найө эз сяммыны гөгөрвоны, коді кытысянь уськөдчис. Та вөсна заводитчис паника, и найө лыйлісны өта-мөднысө.

Кор ми, медбөрын, вермим петны тылысь, вөлім ставным прамөй тешкодь-өсь: трофейной автоматьяс, трофейной пулеметьяс, трофейной сапөгьяс. Но генерал Жуков дінө ми воим советской воиньяслөн обмундированиеөн. Докладывайтім кыкөн: Шевченко да ме. Фронтөн командуйтысь да Военной

Советса член юалісны: мый-өн вермам докажитны, мый збылысь вөчим сійө уджсө, код йылысь висьталам. Сәки ми гузьнитім приёмнойын джджас став салдатской книжкаяссө, штабной бумагаяс, фашистской наградаяс, кодьясөс ковмис сәтшөм дыр кыскавны сьөрсьыным.

Командующой чукөстис миянөс кабинетас да сетіс Шевченколы да мен Ленин орденьяс (сәки вөлі татшөм правочы фронтса Военной Советлөн). Мөд луннас сетісны наградаяс и мукөд офицерьяслы да салдатьяслы.

Кор советской войска заводитісны наступайтны Москва дорын, миянөс корисны фронтса командной пунктө, командующой сетіс выль боевой задание. Миянлы колө вөлі дейстуйтны Волоколамской шоссе вылын, коді мунө Клин карсянь. Сәні фашистьясөс советской войска кытшалісны куим бөксянь и колө вөлі дзугны налысь бөрынтьчөмсө, бырөдны найос. И тайө могсө ми бура пөртім олөмө.

Да, сьөкыд панны сёрни Александр Ивановичкөд бойясын сылөн личнөя участвуйтөм йылысь. Сійө зильө унджык висьтавны аслас ёртьяс да другьяс йылысь, висьтавлө налөн геройство йылысь, на йылысь, кодьяслы эз удайтчы овны Победа лунөдз.

Кыпид лоис генераллөн чужөмыс, кор пансис сёрни ДОСААФ-лөн удж йылысь. Одинцов нимкодпырысь висьтавліс, кызди содө тайө обществолөн рольыс уджалысь йөзөс, торйөн нин том йөзөс, военно-патриотической воспитайтөмын.

— Бөрья воясө ДОСААФ-лөн организацияяс,— пасийс генерал,— төдчымөн содтісны армиялы да флотлы специалистьясөс дасьтөм, бурмөдісны велөдөмсө. Призывникьяс лыдысь быд коймөдыслөн эм военной специальность, кодөс босьтісны миян краснознаменной общество-

лөн школаясын да клубьясын.

Абу этша колана удж вöчöма и Коми АССР-са досаафовецьясöн. Но меным кажитчö, мый обществоса организацияяс унаысь на оз тырвийö используйтны сийöгырысь позянлунъяссö, кодьяс эмöсь Сыктывкарын, Воркутаын, Ухтаын да торйöннин сиктса местаясын. Миян, комынöд вояся комсомолец-осоавиахимовецьяслөн вöлины бур традицияяс. И мен кöсийысьсö, мед сизимдасöд вояся комсомолец-

досаафовецьяс озырмöдисны найöс да петкöдисны ДОСААФ-лысь Коми областной организацияöс Россияса медбур организацияяс лыдö.

Колис куим во сийö кадсянь, кор Александр Иванович воліс ас чужан муö. Абу на дыр кад. Но мыйта вежсьöмъяс лоисны олöмас. Александр Ивановичлөн зарни погон вылын содіс ещё öти звезда. Оні сийö генерал-полковник, миян землякьяс лыдын медся ыджыд чина

морт. Кольöм воын, СССР-са ДОСААФ-лөн кöкъямысöд съезд вылын сийöс выльысь бöрйисны обществоса председательöс первой вежысьöн.

И сы вылö видзöдтöг, мый Александр Ивановичлөн унагырысь да колана уджьяс, сийö бура тöдö, мый вöчсьö миян республикаын. Сылөн пызан выльысь позьö аддзыны и выльöн петöм коми книгаяс, газетьяс. Сийö век радпырысь аддзысьлö аслас землякьяскöд. Татшöм сийö генерал Одинцов.

Ф. С. РИМСКИХ,

КПСС Коми обкомлөн пропаганда да агитация
отделсь секторса заведующий

РСФСР-лөн выль Конституция

1978 вося апрель 12 лунö РСФСР-са Верховной Совет öтсöгласöн вынсьöдiс Российской Советской Федеративной Социалистической Республикальсь Конституция (Основной Закон).

РСФСР-лөн выль Конституция подулö пунктöма идеяс да принципяс союзной Конституцияльсь, кöни петкöдлысьö став советской народлөн öтувьяс кöсийöм, кöни эм советской йöзлөн некымын поколениеса исторической опыт да коллективной вежөр.

Великой Октябрьской социалистической революция, кодöс Коммунистической партия веськöдлöм улын, В. И. Ленин юрнуöдöмөн вöчисны Россияса рабочийяс да крестьяна, путкыльтiс капиталистьяслысь да помещикьяслысь власть, лöсьöдiс пролетариат диктатура да котыртiс Советской государство — революционной шедöдöмторьяс дорьян, социализм да коммунизм стрöитан главной орудие.

Советской власть сетiс Россияса став народьяслы öткодь правояс да торйöдчöм вылö свобода, сетiс уджалысь йöзлы збыльсь демократической правояс да свободаяс. РСФСР котыртöм сетiс роч народлы Российской Федерацияса став нацияслы да народностьяслы бур позянлуньяс быд боксян экономической, социальной да культурной сöвмöм вылö, советской народностьяслөн братской семьяын налысь национальной торьялöмьяссö арталöмөн.

РСФСР-öс мукöд советской республикаяскöд ССР Союзö öтутвöм ёна содтiс странаса народьяслысь выньяссö да позянлуньяссö зэв гырьсь социально-экономической вежсьöмьяс олöмö пöртöмын.

Советской народлөн мудзлытöм уджөн Коммунистической партия веськöдлöм улын СССР-ын стрöитöма сöвмöм социалистической общество — збыльсь свободной уджалысь йöзлөн общество, кöни лöсьöдöма вынйöра производительной выньяс, дугдывтöг бурмö народлөн олöм да кыптö культура, ёнмö рабочей класслөн, колхозной крестьянстволөн да народной интеллигенциялөн торкны позьтöм союз.

Российской Советской Федеративной Социалистической Республика — öткодь правояса республика Советской Социалистической Республикаяс Союзын, кодi петкöдлö советской народлысь государственной öтувьясун, йитö став нациясöс да народностьясöс коммунизм öтвылысь стрöитöм вылö.

Öткодь правояса республикаяслөн семьяын РСФСР босьтö медводдза места — и население серти, и территория серти, и природной озырлуньяс серти, и экономической да научно-технической позянлуньяс серти. РСФСР-са фабрикаяс да заводьяс, электростанцияяс да нефтепромысельяс вылын и шахтаясын вöчöны став электроэнергияльсь 62 процентсö, прокатысь — 56, стальной трубаяслысь — 75, автомобильяслысь — 86, тканьяслысь — 72, перйöны нефтьлысь 86 процент да из шом-

лысь — 55 процентсö. Республикаса промышленность öнi тöлысь джын-йöн сетö сы мында жö продукция, мыйта сетлис 1937 во чöжөн. Россияса муяс вылын быдтöны странаса став няньлысь джынсьыс унджыксö.

Миян обществолысь экономика сöвмөдöм сетис позянлун тöдчымөн бурмөдны сöветскöй йöзлысь олөм. Бөрья 40 во чöжөн квайтысь унджык пöв содисны быд морт вылö арталөмөн реальнöй доходьяс. РСФСР-ын рабочöйяслөн да служащöйяслөн тöлысья удждон войнаöдза вояс серти содис пöшти вит пöв да 1977 воын лоис 163 шайтысь унджык.

1977 воын 1940 во серти Российскöй Федерацияын государственнöй да кооперативнöй торговлялөн товарооборот содис көкъямыс пöв, а паськөм да белльö вузалөм — 11 пöв, трикотажиной көлуй вузалөм — 22 пöв, кучик көмкөт вузалөм — 9,5 пöв. Магазиныасын öнi медся колана төварьяс — телевизорьяс, автомашинаяс, мотоцикляс. Республикаса быд сё семьяысь 82 семьяын öнi эм телевизор, 88 семьяын — радиоприёмник либö радиола, 68 семьяын — холодильник, 73 семьяын — пясасян машина. Сöмын öкмысöд пятилетка воясö РСФСР-са уджалысь йöзлы вузалөма 1,3 миллион легкөвöй автомобиль.

Кызди и союзной Конституцияын, РСФСР-са Конституцияын тöдчөдсö, мый став политическöй системалөн ядроөн лөб Сöветскöй Союзса Коммунистическöй партия. Обществоса руководящöй да наравляющöй вынлысь положениесö сийö шедöдис народлы мудзлытөг служитөмөн.

Марксистско-ленинскöй учениеөн вооружитчөм Коммунистическöй партия индö обществолы водзö сöвмөм вылö генеральнöй туй визь. веськөдлө сöветскöй народлөн зөв ыджыд уджөн, коммунизмлөн победа вöсна сысь тышсö подулалö научнöя.

Сэк жö партия оз веж государственнöй органьясöс да общественнöй организациясöс, нуөдö ассьыс политикасö, медводз, наын уджалысь коммунствяс пыр. Став партийнöй организацияяс уджалöны СССР-са Конституция подув вылын.

Миян народовластиелөн системаын главнöй тöдчанлунсö босьтöны Сöветьяс — уджалысь йöзлөн медся представительнöй организацияяс. Конституцияын висьтавсьö: РСФСР-ын став властыс народ кийн. Государственнöй властысö народ пöртö олөмө народнöй депутатьяслөн Сöветьяс пыр, кодьяс лöбны РСФСР-лөн политическöй подулөн.

Сöветскöй обществолысь политическöй система ёнмөдан главнöй туй визьөн лөб социалистическöй демократия водзö сöвмөдөм. РСФСР-са Конституцияын индысьсö пыр паськыдджыка участвуйтны гражданы госуларстволөн да обществолөн делөясөн веськөдлөмын, государственнöй аппарат бурмөдөмын, общественнöй организацияслысь активность кыпөдөмын, государственнöй да общественнöй олөмлысь правовöй подувьяс ёнмөдөмын, паськөдны гласность, пыр кутны төд вылын общественнöй мөвп.

Странаса Основнöй Закон серти РСФСР-са Конституцияын вынсьөдсöны социалистическöй стройлөн торкны позьтөм положенияс: производство средствояс — уджалысьяс кийн, увтыртöмысь мездөм удж, овмөс план серти нуөдөм. Тöдчөдсö, мый Российскöй Федерациялөн экономическöй подулыс — производство средствояс вылö социалистическöй собственность.

Российскöй Федерацияса Конституцияын висьтавсьö, мый РСФСР-са граждана лöбны и великöй Сöветскöй Союзса гражданаөн. Налөн эмөс став социально-экономическöй, политическöй да личнöй правояс да свободаяс, кодьясöс йөзөдөма СССР-са Конституцияөн да сетöма социалистическöй стройөн, миян страналөн став шедөдөмторьясөн.

Уна сикас правояс да свободаяс, налөн содержание да бур гарантияс, кодьясöс вынсьөдөма сöветскöй Конституциясөн, зөв бура пет-

көдлөны, мый социализм сетө личностылы збыльысь свобода, кутшөм абу да оз вермы лоны классөвөй неравенстволөн да увтыртөмлөн мирын.

Социально-экономическөй правояс, торйөн кө, удж вылө, шойччөм вылө, материальнөй обеспечение вылө правояс паськөдөма да озырмөдөма сөвмөм социализмлөн позянлуньясөн. СССР-са Конституциякөд лөсялөмөн РСФСР-са Конституция йөзөдө вель уна вель конституционнөй правояс: гражданалысь здоровье видзөм вылө, оланін вылө, культуралөн шедөдөмторьясөн пөльзуйтчөм вылө правояс.

Основнөй правояс да свободаяс йөзөдөмкөд тшөтш Конституцияын урчитөма, мый правояс да свободаяс оз позь торйөдны гражданоён асыныныс обязанностьяс олөмө пөртөмысь. И тайө гөгөрвоана. Обязанностьяс олөмө пөртөм, законьяс да социалистическөй общежитиелысь правилөяс пыдди пунктөм эм сэтшөм жө колана юкөн социалистическөй демократиялөн, кызди и правоясөн да свободаясөн пөльзуйтчөм.

Босьтам көть удж вылө право да обязанность йылысь вопрос. Удж вылө право йылысь зөв ясыда висьталөма РСФСР-са Конституциялөн 38-өд статьяын. А 58-өд статьяын висьтавсьө, мый РСФСР-са уджавны вермысь быд гражданинлөн обязанность да чөстя делө — сөвөсть серти уджавны сэтшөм общественно-пөлезнөй юкөнны, кодөс сийө бөрийс ачыс, соблюдайтны удж дисциплина. Общественно-пөлезнөй уджысь өтдортчөм оз лөсяв социалистическөй обществоса принциплы.

Тані колө пасйыны, мый удж вылө право да обязанность йылысь вопросын «Войвыв кодзув» журналлөн 12-өд номерын (1977 во) лэдзөма серьезнөй өшыбка. «Миян олөмлөн вын» статьяын журнал гижө: «Коркө олөмлөн лозунгөн вөлі революционнөй принцип: «Коді оз уджав, сийө оз сөй». Социализмлөн победа бөрын, кор быдөнөс лон кыскөма общественно-пөлезнөй уджө, татшөм лозунгыс эз нин кут ковны». Кызди тайөс гөгөрвоны? Мый өні, сөвмөм социализм дырйи, позьө не уджавны да сөйны? Көть жаль, но өткымынлаын татшөм йөзыс өнөдз на эмөсь, и миянлы, став сөветскөй йөзлы, общественнөй организацияслы колө чорзьөдны тыш дисциплина торкалысьяскөд, тунеядецьяскөд, вина юысьяскөд.

РСФСР составө пырөны 16 автономнөй республика, 5 автономнөй область да 10 автономнөй округ. Российскөй Федерацияө роч народкөд өгүвтчөм, уна лыда нацияслөн да народностьяслөн өта-мөдлы эскөм, сотрудничайтөм да өта-мөдлы өтсөг сетөм ярьюгыда висьталөны ленинскөй национальнөй политикалөн шедөдөмторьяс йылысь. Та вөсна Сөветскөй Россияса став народьяс сөвмисны быд боксянь.

Та йылысь зөв бура висьталө Коми АССР-са народнөй өвмөслөн өдйө сөвмөм. Сөветскөй власть воясө миян республикаын промышленнөй производство содіс 145 пөв. Öдйө сөвмө из шом, нефть да природнөй газ перйөм, электроэнергия, бумага вөчөм, вөр лэдзөм да промышленностьлөн уна мукөд юкөньяс. Чужисны да быдмисны гырысь карьяс: Воркута, Ухта, Печора, Инта. Öдйө быдмө да мичаммө республикалөн столица Сыктывкар. Республикаын сөвмө социалистическөй культура да искусство. Уджалөны университет да институтьяс, техникумьяс, театрьяс, музейяс, культура керкаяс, клубьяс да библиотекаяс. Лэдзсьөны 25 газет да уна книгаяс, коми кыв вылын сөрнитө радио да телевидение.

1977 вося СССР-са Конституция примитөм лон сөветскөй автономияяслысь формаяс сөвмөдөмын да правояс паськөдөмын вель воськолөн. Российскөй Федерацияса Конституция стөчмөдө союзнөй Конституциялысь колана положениеяс, паськөдө государственнөй да хозяйственнөй делөяс олөмө пөртөмын автономнөй республикаяслысь да автономнөй областьяслысь полномочиеяс.

Сэк, кор несоциалистическөй мирса уна районьясын национальнөй торьялөмыс вуджө ёсь да ставсө жуглысь вензьөмө, ми, сөветскөй йөз,

ог вермөй не тӱдчӱдны асланым союзной государство вӱсна торья
ыджыд нимкодълун. Ленинлӱн гений, Коммунистическӱй партиалӱн по-
литика сетисны позянлун сӱдзи решитны национальной вопросӱ, код дыр-
йи быд народлӱн, быд республикалӱн интересьясыс топыда йитчӱны ве-
ликой Сӱветской Союзлӱн жугӱдны позьтӱм ӱтувьялункӱд да вынӱӱркӱд.

РСФСР-са Конституциялысь проект вӱли йӱзӱдӱма став народлӱн об-
суждайтӱм вылӱ. Собраниеяс вылын, трудӱвӱй коллективьясын уна мил-
лион йӱз зӱв пыдӱа тӱдмасисны проектлӱн положениеясӱн да ошкисны
сӱйӱс. Проект видлалӱгӱн вӱли сетӱма дас тысяча гӱгӱр предложениеяс
да вежӱмьяс. На пиысь уна предложение вӱли примитӱма да гижӱма
выль Конституцияӱ. Мукӱд предложениеясын сӱветской йӱз критикуйтӱ-
ны нелюккияс, кодьяс эмӱсь на предприятияяс, учреждениеяс, организа-
цияяс, местной Сӱветьяс уджын, индӱны найӱс бырӱдан туйяс, сетӱны
Сӱветьяслы наказьяс. Тайӱ наказьяссӱ колӱ быть пӱртны олӱмӱ.

Российской Сӱветской Федеративной Социалистической Респуб-
ликалӱн Конституция (Основной Закон) лоис вынсьӱдӱма да пырис миян
олӱмӱ. Позьӱ смела шуны, мый Сӱветской Россияса да Коми респуб-
ликаса уджалысь йӱз пасьясны РСФСР олӱмын тайӱ исторической лоӱм-
торсӱ Коммунистической партия гӱгӱр, сылӱн ленинской Центральной
Комитет гӱгӱр да Политбюро гӱгӱр, кодӱн веськӱдлӱ зӱв тӱдчана поли-
тической да государственной деятель, мир да социальной прогресс вӱсна
мудзлытӱм борец Леонид Ильич Брежнев ӱрт,— ещӱ ӱнджыка ӱтутчӱ-
мӱн, ленинской партиалӱн XXV-ӱд съездлысь исторической решениеяс
олӱмӱ пӱртӱмын выль вермӱмьясӱн.

Сөвман туйод

Нель во сайын, 1974 вося мартын, КПСС-лөн Центральнйй комитет да СССР-са Министръяслөн Совет примитисны «РСФСР-са Нечерноземнйй зонаын видз-му овмөс водзö сөвмөдөм кузя мераяс йылысь» постановление. Тайö ыджыд төдчанлуна документас ярьюгыда петкөдчис Советскöй Союз-са Коммунистическöй партиалөн аграрнйй политикаыс. Сэни индöма, кутшöм туйод водзö кыпöдны видз-му производство, ещö ёнджыка бурмөдны йöзлысь оласногсö да кыпöдны культурасö странаса тайö зэв ыджыд районас.

А кызди тайö индөм программаыс пöртсö оломö Коми республикаын, та йылысь висътавсö журналист Александр Ануфриевлөн пасйöдъясын.



Россияса Нечерноземье... Думыштлыны сöмын, кутшöм сийö паськыд — Балтийскöй моресянь Уральскöй гöраясöдз, шöр Россиясянь Войвывса йиа океанöдз. Кызöкмыс область да автономнйй республика пырöны Нечерноземьеö. Российскöй федерацияын чукöртан став нянысь витöд юкöныс сийö дас тысяча колхозыслөн да совхозыслөн, кодъяс пырöны тайö зонаас. Став сдایتан картофельысь джынсьыс унджыкыс — налөн жö, сетöны найö матö джын овощисö, 30 процент мында яй, 39 процент мында йöв, сы мында жö чипан кольк дауна мукöд продукция. Шабдi быдмö налөн жö.

Народнйй овмöсын тайö зоналысь ыджыд төдчанлунсö пасйöмөн, Л. И. Брежнев ёрт шулис: «РСФСР-лөн Нечерноземье — зэв ыджыд позянулунъяса район, но сийö позянулунъясыс öни используйтсöны оз на колана ногөн. Ошйысьтөг позьö шуны, мый видз-му овмөс интенсифицируйтöм сетас позянулун төдчымөн содтыны тайö зоналысь производительнйй вынъяссö, кызды быттьö лэптыны выль эжа Советскöй Союзса европейскöй юкöнын».

Партия лыддис коланаөн лöсьöдны — страналөн содöм экономическöй вынйöр вылö мыджсьöмөн — Нечерноземье öдийö сөвмөдан программа дыр кад кежлö. Буретш сийö могъяссö да найöс оломö пöртан туйяссö индöма КПСС ЦК-лөн да СССР-са Министръяс Советлөн постановлениеын, кодöс примитöма 1974 вося мартын. Индöма сэни вöчны зэв гырысь воськовьяс. Тырмымөн висътавны, мый 1990 воёдз шуöма видз-му продукция содтыны кык — кык да джын пöв. Торъялана тайö программаыс и сийөн, мый сикт водзын сулалысь проблемаясыс кутасны пöртсыны оломö комплекснöя, лö лöсьöдöма та вылö экономическöй подувьяс, видз-му овмöслысь зумыд материально-техническöй база и, дерт жö, лö нуöдöма уна социальнйй мероприятияс сиктса уджалысьяслысь оласногсö водзö бурмөдөм могысь.

Постановление петöмсянь колис нель во. Öни тыдалöны нин төдчана вежсьöмъяс. Төдчö, кутшöм кыпыда босьтчисны сиктса труженикъяс пöртны оломö партиалөн индөм программасö, кутшöм ыджыд водзмöст-

чөм петкөдлөны овмөсьясса быд юкөны уджалысьяс. Средствояссө материално-технической база ёнмөдөм вылө государство сетис эз нин этша. Вайёдам некымын лыдпас. Республикаын видз-му овмөс сөвмөдөм вылө көкъямысөд пятилеткаын кө вөлі сетөма 80 миллион шайт, өкмысөд пятилеткаын содіс 203 миллион шайтөдз; 1976—1977 воясын видзөма 117 миллион шайт, а дасөд пятилеткаын ставсө шуөма видзны 360 миллион шайт.

Қор волан сиктъясө, шыбитчөны синмө сійө гырысь вежсьөмъясыс. Уна выль гырысь стрөйбаяс кыпөдөма сиктъясын.

Зеленечын коймөд во нин сетө продукциясө порсь видзан комплекс. Вөр шөрын кыптисны эз сөмын производственной корпусьяс, но и карын кодь гырысь олан керкаяс, культурно-бытөвөй учреждениеяс. Комплекс кыпөдөм вылө (а тшөгөдөны сәні вонас 24 тысяча порсь) видзөма 12 миллион шайт. Рөскодыс абу ичөт, но сійө вочасөн өдийө вештысьсө, кольөм воын чистой прибылыс лои 1,8 миллион шайт.

Нималөны Лөзымын йөла скөтөс видзан комплекс, Тентюковоын тепличной комбинат, механизируйтөм гырысь мастерскойяс стрөйтөма «Сельхозтехникалөн» объединениеөн. Кыпөдсьө йөла скөт видзан комплекс Печораын. Эжва посёлокын лоас фабрика, көні кутасны видзны 270 тысяча курөг. Вөчөма нин проектъяс: Ыбын йөла скөт видзан комплекс да Пыёлдиноын том скөтөс быдтан комплекс, Печораын тепличной комбинат кыпөдөм вылө.

Ёнмө подулыс «Комисельстрой» трестлөн, коді медсясө и кыпөдө сиктъясын стрөйбаяссө. Сылөн эм железобетонной изделиеяс вөчан ыджыд завод, кольөм воын Визинын сувтөдөма стрөйө пуа көлуй вөчан завод.

Видз-му овмөсө пыр унджык вөөния техника. Сөмын бөръя куим вөөн видз-му овмөс министерствоса совхозьяслы сетөма 1400 выль трактор. А мыйтөм ещө прицепной машинасыс да орудиеясыс.

Видз-му уджъяс пыр өтарө ёнджыка механизируйтсьөны. Тывы-

йө механизируйтөма гөрөм, картупель пуктөм, минеральной удобрениеяс разөдөм. Кызвын уджсө вөчөны механизмьяс отсөгөн пуктас вөдитысьяс, турун пуктысьяс. Ёна чинис кипом уджыс скөт видзысьяслөн, содіс лыдыс фермаяслөн, көні пыртөма комплексной механизация.

Ыджыд отсөг виччысьөны му вөдитысьяс мелнираторьясянь. И вильмөдөм муыс содө и содө. Бөръя куим вөөн совхозьясын косьтөма дас өти тысяча гектарысь унджык, кызь тысяча гектар вылын нуөдөма культуртехнической уджъяс. А вильмөдөм муясыдлөн и козиныс озырджык, уна овмөсьясын косьтөм муясыс вылын идралөны картофелсьө 200—270 центнерөн да овощи куимсө центнерөн гектар вылысь. А водохозяйственной организацияслөн вынийорыс водзө содө. Мелиорация кузя министерстволөн уна механизируйтөм колоннаяслы стрөйтсьөны производственной базаяс. Сыктывкар бердын кыптө Главнечерноземводстройлөн ыджыд база.

Урожайяс содтыны ёна отсалө химизация. Пыр унджык вөоны сиктө минеральной удобрениеяс. Химияён жө пөльзуйтчөны скөт видзысьяс көрымьяс дасыгөн, озырмөдөны скөтлысь рацион микроэлементьясөн.

Совхозьясянь пыр унджык виччысьөны картофель, овощи. И тайө культураяс вөдитөмын лоисны ыджыд вежсьөмъяс, буретш Нечерноземье кузя постановление петөм бөрын. Вөлі вөчөма да пөртсьө олөмө картофель вөдитөм сөвмөдөм кузя агротехнической да организационной мероприятияслысь научной подулалөм комплекс. Тайө и сетис позянлун вевтыртны дасөд пятилетка кежлө сетөм заданиеяс. Кольөм юбилейной воын быдтөма 126 тысяча тонна картофель, либө 35 процентөн унджык 1976 воын серти, а өткодявны кө 1970 вөкөд, содөмыс лои 72 процент.

Содис тайө зэв төдчана культураыслөн урожайыс. Министерствоса совхозьясын кольөм воын идралөма 187 центнерөн гектар вылысь. Республика та кузя Российской федерацияын мөд местаын. Примерсө мян республикаын петкөдлөны

«Пригородной», СССР-лы 50 во нима, «Сторожевской», «Межадорской», «Сысольской», «Усть-Куломской» да «Сыктывкарской» совхозьяс. Корткеросской районын, коні картопель улö торйöдöма сизимсё гектарысь унджык, быд гектар вылысь шөркодь урожайсö босьтисны 241 центнерөн, Сысольской районын 215 центнерөн. Ордйысьöмын водзмöстчысьяс лыдын Межадорысь Николай Александрович Оплеснинлөн звено, кодi кольöм воын идралис картопельсö 322 центнерөн гектар вылысь. Быд во шедöдö бур урожайяс «Сторожевской» совхозысь Валерьян Иванович Макаровлөн звено. Эз вöв ёна лöсялана поводьяс 1976 воын, но удайтчис идравны 251 центнерөн, а кольöм воын шедис 320 центнерөн. И оз сöмын центнер лыд вöсна мун тышыс. Колö öд тöждысьны и сы вöсна, медым продукцияс шедис донтöмджыка. Быд центнер вылö тайö звеноас видзисны 1,9 морта час (нормаыс — 2,8) да планын индöм серти быд центнер сувтис 1 шайт 44 көпейкаөн донтöмджык.

Вермöмьяссö картопель вöдитöмын шедöдöма сы вöсна, мый содис му вöдитан культураыс. Ыджыд организаторской удж нуöдисны партийной, советской да видз-му овмөсса органьяс. И, дерт жö, тöдчис производсö специализируйтöмыс, концентрируйтöмыс. Кольöм кык воён содисны тайö культура улын муясыс Корткеросской, Прилузской да Сысольской районьясын, быд овмөсын сэнi 174—188 гектарөн. Нуöдсьö специализацияс и овмөс пытшкас, юкöны сийöс этшаджык отделениесö. Сетöны сийö специализируйтöм овмөсьясыслы содтöд минеральной удобренияяс, техника. Пöльзаыс таысь тыдовтчис öдйö: индöм куим районса совхозьяс сдайтисны кольöм воын государствалы 26.650 тонна картопель либö видз-му овмөс министерствоса став совхозьясөн сдайтöм картопельысь джынсьыс унджык.

Водзмöстчысь овмөсьяс индöны производство интенсифицируйтан туйяс. Босьтны кöть татшöмтор. Водзти картопель вöдитысь уна овмөсьясын гектар вылас быдмылис

сöмын 25—35 тысяча позтыр. Гөрöны-пуктысьöны вынсьöдöм му вылö, дöзöбитöны кодзаяссö став правилöяс серти, а урожайыс чукөрмылис этша. Вөлöмкö, зэв бура позьö быд гектар вылын быдтыны 60—65 тысяча позтыр, а семенной участокьяс вылын ещö на унджык — 70—90 тысячаöдз. Абу сьöкыд артыштны кутшöм ёна тайö отсалис содтыны урожайсö.

Выгöдайтисны сийö овмөсьясын, конi тöждысисны механизируйтöм звенояс ёнмöдöм вöсна, конi механизаторьяслы мынтысисны сы серти, уна-ö шедöдöма урожайсö. Первойысь звенояссö котыртлисны 1963—1964 воясын. А öни кежлö сэтшöм звеноясыс эмöсь нин быдлаын. Партийной организацияяс, видз-му овмөсса органьяс петкөдлöны быд лунья тöждысьöм звеноясөн веськөдлысьясöс быдтöм, воспитайтöм вöсна. Унджык звеньевöйясыс уджалöны вит воысь дырджык нин. Эмöсь ветераньяс — веськөдлöны звенояснас найöс котыртан лунсянь. Сидз, «Сысольской» совхозын Сергей Александрович Вешняков звеньевöялö нин 14 во. Сийö первой класса тракторист, эз нин öтчид участвуитлы ВДНХ вылын, конi наградитлисны зарни, эзысь да бронза медальясөн.

Озыр опыт чöжсис звенолөн, кодөн веськөдлö Социалистической Уджыввса Герой Александр Николаевич Плешев. Сы дорö, «Сысольской» совхозö, воывлöны велöдчыны механизаторьяс уна вожсянь. И эм мыйö велöдчыны: öд öкмысöд пятилеткаын картопельлөн шөркодь урожайыс тайö звеноас вöли 292 центнер, дасöд пятилеткаын кык вося шөркодь урожайыс 286 центнер.

Бурланьö пыр вежсьö картопель вöдитан технологияыс. Кольöм воын лон ещö öти выльтор: уна совхозьясын вöли котыртöма урожай идралан кадö торья механизируйтöм отрядьяс. Тыдовтчис, мый тадзи позьö ёна бурджыка уджöдны техникасö, дженьдöдны идралан срокьяс. Сидз, «Мутницкой» совхозын поточной метод пыртöмөн удайтчис пöшти став картопельсö (93 процентсö) идравны комбайньясөн.

Көкъямыс лунон вөлі идралөма 170 гектар. Таво сідз шусяна уборочно-транспортной отрядъяс да звенояс шуөма котыртны став совхозъясын.

Мый вермө сетны специализация да концентрация кужомон пыртөм, зэв бура тыдовтчис овмөсьяслөн мод төдчана юкөнын — пуктасъяс вөдитөмын. Кольөм воын карбердса овмөсьяс — «Сыктывкарской» да «Пажгинской» совхозъяс — вузалисны государстволы 10.700 тонна овощи. Тайө лоө 48 процентъяс сийө овощись, кодөс сдایتисны министерствоса став совхозъяс. Концентрация сетис позянулун паськыдджыка механизируйтны уджъяссө. Оні тайө овмөсьясас он нин аддзы рөсдатө киөн пуктысьясөс, тайөс зэв дженъыд кадөн вөчөны пуктысян машинаяс. А өд некымын во сайын на вөлі паськалөма мөвп: машинаяснад пө пуктысьны войвывса муяс вылад он вермы.

Зэв ышөдана примеръяс «Көрткерөсской» совхозысь Маджаса отделениелөн. Сёрниъяс морков вөдитөм йылысь. Тайө культураыс водзти медся уна вын да кад босьтліс да лыддывлісны, мый гоз-мөд гектарысь унджык вөдитны сийөс он вермы. А эсся друг лонс таdzi: өти отделение торйөдіс морков улө 35 гектар. Вөвлытөмтор! Унаөн эз эскыны сэки прамөй урожай вылө, шуасисны, мый омөль му вылад пө нинөм оз быдмы, ставыс тырас ёг турунөн, оз тырмы колана техника да и идравнысө некодлы лоө. Но сюрисны сәні сюсь йөзыс, энтузиастъясъяс, сяммисны лөсьөдны и колана техникатө, медым мездъясны кипом уджъясъяс. Вөлі котыртөма торъя механизируйтөм звено, көні веськөдлысьнас вөлі опытной механизатор Николай Гольке. И со: быд гектар вылысь морковсө идралісны 320 центнерөн, государстволы сдایتисны 580 тонна план дырйи 1.154 тонна. И шеді сийө төдчымөн донтөмджыка сы серти, мый вөлі индөма планын.

Нечерноземье кузя постановление востіс паськыд туй совхозъяслысь экономика ёнмөдөм вылө. Көні сямөны корсыны да аддзыны позянулунъяссө, сәні и водзө мунан воськовъясыс гырысьджыкөсь. Босьтам

көть «Сыктывкарской» совхозөс. Ыджыд специализируйтөм овмөсөн сийө лон. Фермаясас гырысь скөтыс 3160 душ, сы лыдын 1260 мөс. Пятилеткаса кык воон татчөс скөт видзысьяс сдایتисны заданиеысь вывти 270 тонна йөв да 140 тонна яй. Бур слава мунө му вөдитысьяс йылысь. Специализацияыс налөн — овощи быдтөм. И сийө став овощись, кодөс сдایتөны министерствоса совхозъяс, нельөд юкөныс — налөн.

Кольөм воын заготовительяслы сдایتисны 1490 тонна картофель да 5.355 тонна овощи. Тайө овмөсыс петкөдлө пример сылысь, кызди колө мунны интенсификация туйөд: 1970 воын быд сө гектар видз-му угоддьө вылө продукциясө вөлі вөчөма 17 тысяча шайт дон, а кольөм воын содіс нин нелямын тысячаысь унджык шайтөдз.

Совхозса коллективлөн творческой уджыс эз коль пасйитөг. Дас воысь дырджык нин совхоз участвуйтө ВДНХ вылын, эмөсь первой да мод степень дипломъяс, эм и Почёт Диплом. Совхозлөн знамя вылын дзирдалө Рөдиналөн медся ыджыд награда — Ленин орден, а СССР-са орденъясөн да медальясөн наградитөма 80 мортөс. Быдмисны тані Социалистической Уджывса Героияс Виталий Евгеньевич Шишкин, совхозса вөвлөм директор, Пелагея Федоровна Любименко, коді кызь воысь дырджык вөлі фермаын бригадирөн, Октябрина Михайловна Вежова — овощи вөдитысьяслөн бригадир.

Совхоз босьтө пыр ыджыдджык рубежъяс КПСС XXV съездлысь решениеяс олөмө пөртөм вөсна тышын. Мод во нин дорыв сийө Всесоюзной Социалистической ордйысьөмын вермысьяс лыдын. Ыджыд заслугаясысь коллективлы сетөма КПСС ЦК-лысь, СССР-са Министръяс Совет-лысь, ВЦСПС-лысь да ВЛКСМ ЦК-лысь Гөрд знамя.

Сулалө пыдісянджык видзөдлыны, мый сетис «Сыктывкарской» совхозлы позянулун кык воон содтыны фермаясын йөвсө 19 процент вылө, да быд сө гектар угоддьө вылө босьт-

ны 600 центнер йов. Мосьясыс и сідзи нин оз этша лысьтыны, а кольом воын ещө на быд мөслөн йөлыс шөркөдә содіс 26 килограмм вылө,— вося шөркөдә удойыс лои 3.705 килограмм — министерствоса совхозъяс пөвстын медся уна. Сяммисны тані лөсьөдны крепыд көрым база, кужоны босьтны быд гектар муыс медся ыджыд пөльза. Шуөма кө тайө пятилеткасө производволись эффективность кыпөдан пятилеткаөн, сідзкө збылысь тадзи и лоө. Совхозын став отделениеяс да бригадаяс вуджөдөма хозяйственной расчөт вылө. Бурмөдөма экономической удж. Уна вояс чөж нин совхоз уджалө рентабельнөя, өкмысөд пятилеткаын босьтөма 2,3 миллион шайт прибыль, а тайө пятилеткаса кык воөн прибылыс лоис нин 2 миллион 35 тысяча шайт. Рентабельностьыс содіс 40 процентөдз, став сикас продукциялөн доныс төдчымөн ичөтджык министерстволөн мукөд совхозъясин серти. Пыр содө удж производительность. 3.920 шайт — та мында дон кольом воын вөчис продукциясө видз-му производвоын быд уджалысь.

Тырмө сямлуныс, водзмөстчөмыс и дояркаяслөн — Раиса Петровна Боловиналөн, Тамара Петровна Смирновалөн, Александра Ефимовна Неверовалөн, и кукань видзысьяслөн — Александра Мироновна Поповалөн, Валентина Владимировна Елькиналөн, и картофель вөдитысь звеньевөйяслөн — Вячеслав Павлович Омелинлөн, Василий Николаевич Корычевлөн. Быдмисны производво са опытной командиръяс. Кызь во нин веськөдлө Кочпонса отделениеөн Михаил Алексеевич Сидоров. Овмөсын ветеранөн нин лои

главной зоотехник Лидия Ивановна Пийр. Водзмөстчысь специалист став вынсьыс пыртө производвоё наукалысь выльторъяс. Зөв бур организаторъясөн петкөдлісны асьнысө бригадиръяс: Валентина Григорьевна Оверина, Екатерина Андреевна Лыткина, Ольга Николаевна Лыткина.

Ыджыд воспитательной удж нуөдө совхозса партийной организация, көні 114 коммунист. На лыдысь унджыкыс уджалөны производво вылын.

И «Сыктывкарской» совхозлөн и уна мукөд овмөсьяслөн примерыс бура висьталө видз-му производво өдийө сөвмөдөм вылө зөв гырысь позянлунъяс йылысь. Вөчөма абу нин этша, чөжсис колана опыт. Но ылө на оз быдлаын кужөмөн пөльзуйтчыны сийө позянлунъяснас, кодөс восьтис Нечерноземье йылысь постановление. Уна совхозъясин на дзөн содө видз-му продукция, омөля пөльзуйтчөны муөн, кужтөг уджөдөны техника. Зөв на уна проблемаыс сиктса строителствоын.

Зиль кияс виччысьөны мелиоруйтөм муяс. И медсясө колө водзө и водзө нуөдны специализация да концентрация. Колө пасйыны, мый му вөдитысьяс да скөт видзысьяс, овмөсьясөн веськөдлысьяс да партийной организацияяс аддзөны тырмытөмторъяссө, критическөя анализуйтөны асьыныс практической воськовъяссө. Сиктса труженикъяс петісны зөв паськыд туй вылө, кодөс индөма куим пятилетка кежлө. Позьө повтөг шуны, мый Нечерноземьеса видз-му овмөс сөвмөдөм кузя партияөн вөчөм комплексной программа лоө чөстьөн пөртөма олөмө.



Г. Н. КУПРИЯНОВ,

Карелияса фронтлөн Военной советын
вөвлөм член, отставкаын генерал-майор

ВОЙВЫЛЫН ВОЙНАЛӨН БӨРЯ ЛУНЬЯСӨ...

1944 вося февральын Карельской фронтса войска лөсьөдчис наступайтан тышъяс кежлө. Сэки жө вежсис фронтса командующий — февраль 24 лунө фронтөн командуйтны кутис армияса генерал К. А. Мерецков. В. А. Фролов, кодэ командуйтис фронтөн кык во да джын, лөис сийөс вежысьөн.

Сийө жө луннас ми төдмалім, мый 1944 вося февраль 16 лунө Москваын вөвлөм финской посол, а бөрынджык Финской республикаса президент Ю. К. Паасикиви аддөдлөма Стокгольм карын (Швецияын) миянлысь посол А. М. Коллонтайөс да юалөма сылысь, кутшөм условиеяс вылын Советской правительство вермас заводитны сөрнитчөмьяс Финляндиякөд мир йылысь.

Некымын лун мысти А. М. Коллонтай бара адзылас г-н Паасикивиөс да висьталас, мый Советской правительство заводитас сөрнитчөмьяс мир йылысь сэк, кор Финляндияса правительство примитас да олөмө пөртас татшөм условиеяс:

1. Дзик пыр жө ордас йитөдъяс фашистской Германиякөд.

2. Интернируйтас Финляндия территория вылын немецкой войска, а сідз жө Финляндиялөн территориальной ваясын немецкой корабляс да сетас немецкой армияса салдатьясөс да офицерьясөс миянлы да миян союзникьяслы пленнойяс пыдди.

Такөд тшөтш вөлі шуөма, мый финской армия кө оз вермы разоружитны көкъямыс немецкой дивизия Финляндиялөн войвылысь, то ми сетам сылы военной отсөг немецьясөс разоружитөмын либө найөс финской му вылысь вөтлөмын.

3. Финской войскаөс вештыны госгралица визь сайө, кодөс лөсьөдөма 1940 вося март 12 лунся Московской договорөн.

4. Дзик пыр жө бөр сетны став военно-

пленнойясөс да Финляндияө став сикас уджъяс вылө нуөм став гражданской йөзөс.

Ми надейтчим, мый финской правительство примитас тайө условиеясөс да финской войскаөн оккупируйтөм территорияяс — Карелиялысь лунвыв да шөр районьяс — лөө мездөма тыштөг. Но надеяыс мөдис кусны. Та вөсна миян войска февраль помын нин заводитисны дасьтыны немецьяслы паныд ыджыд наступайтан операция Кандалакша сайын. Та могысь Кандалакшаө Свирь ю бокысь вөлі вуджөдөма некымын стрелкөвой дивизия да колана техника. Финляндияын жө тайө кадас мунисны чорыд венъяс сы йылысь, колө али оз ков примитны миянлысь условиеяс да мунны перемирие вылө. Финляндияса реакционной печать быд ногысь пөльтис миян страна динө лөглун, миянлысь условиеясөс шуис вывти чорыдөн, а та вөсна примитны позьтөмөн. Уна финской газетьяс горзисны сы йылысь, мый Советской Россиякөд сепаратной мир да Финляндиялөн войнаысь петөм — асланыс союзниклы измена, и шыөдчисны финской салдатьяслөн да офицерьяслөн «доблесть да честь» динө.

1944 вося март төлысь чөж финской печатнын да финской сеймын мунис некодлы ковтөм сөрни сы йылысь, колө али оз ков мирной договорөс кырымалөмыс. Дырөн сәссия Рюти — Таннер — Линкомес — Маннергеймлөн реакционной кликаыс вермис. Финской правительство эз примит миянлысь условиеяс да шуис водзө нуөдны войнасө. И тайө сувтис финской народлы уна лишной вир, уна сюрс морт олөм.

Тадзикөн фронтлөн Военной Советын да Карело-Финской Компартиялөн ЦК-ын лөи гөгөрвоана: финской войскаөс наөн окку-

пируйтõм муяс вылысь ковмас вõtлыны оружиеõн. Кандалакша сайын немецьяслы паныд тыш эз на заводитны, а войскасõ, кодõс вайлисны сэтчõ, ковмис Беломорск — Вологда пыр вуджõдны Лодейной поле дорõ, медым заводитны кось Свирь юлõн войвыв берегын сулалысь финской войскакõд. Тайõ жõ кадас финьяслы паныд наступайтны заводитисны лõсьõдчыны Ленинград войвылын, Карельской перешеекын. Тайõ операцияс заводитчис 1944 вося июнь 10 лунõ да участвуйтисны сәни Ленинградской фронтса 21 да 23 армияс, а сідз жõ Балтийской флот да Ладожской военной флотилия.

Июль 21 лунõ Карельской перешеекын мездõма Выборг кар, заводитчисны тышьяс Свирь у бокин. Финской войска водзасисны став вынсыныс да бõрынтьчисны надзõн, кõtь миян выныс вõли ыджыдджык. Советской войска воисны сийõ рубежõдз, кõни помасисны тышьяс 1939—40 воясын.

Карельской фронтлõн 32-õд армия заводитис наступайтны июнь 20 лунõ. Тани выньяс вõлины õткодõсь. Армияõн командуйтысь Советской Союза Герой генерал-лейтенант Ф. Д. Гореленко кужõмõн нудис тышõ куйм дивизия вынõн. Миян войска бура маневрируйтисны, жуглисны вына оборонаын бетонысь вõчõм дõtьяс да дзõtьяс, вõtлисны финьясõс асланыс границаланы.

32-õд армиялы тõдчана отсõг сетисны дас партизанской отряд, на лыдын и Тойво Антикайнен нима отряд, кõни унджык партизаныс вõлины Коми АССР-ысь — рочьяс и комияс.

1944 вося июньын, миян войскалõн наступайтны заводитчытõдз на, тайõ отрядсõ лои юкõма куйм пельõ да самолõtьясõн шыбитõма прõтивниклõн тылõ. Дас куйм мортõс И. С. Кирюшкин веськõдлõм улын вõли шыбитõма жуглыны прõтивниклысь туйяс да взрываютны посьяс, но регыд паныдасисны финьяслõн ротакõд. Пансис чорыд тыш. Тайõ тышас уси отрядса комиссар М. В. Широков, сылõн отсасысь В. Малафеев. М. В. Широков усõм бõрын отрядса комиссарõн лои И. С. Кирюшкин. Онi сийõ олõ да уджалõ инженерõн Ухта карын. В. Малафеев вõли коми комсомольской организациялõн быдтас, партизанавны мунтõдз уджалис Ухтаын ВЛКСМ райкомса секретарõн.

Антикайнен нима отрядса партизаньяс 1944 вося июньын, июльын да августын виисны враглысь эз õти сõ салдатõс, жугõдисны уна автомашинас боеприпасьясõн, взорвитисны посьяс да тайõн ёна отсалисны 32-õд армияса салдатьяслы.

Колõ тõдчõдны: 1944 воын гожея тышьясын участвуйтисны уна салдатьяс, кодьяс Карелияса фронт вылõ воисны Коми республикасысь. Найõ вõлины 176-õд, 313-õд,

289-õд да 29-õд дивизиясыны, Заполярной 14-õд армияын. Тайõ тышьясас вõлины и Коми АССР-ысь воим кõр видзысьяс, кодьяс аскõдныс вайõдõм кõрьяс вылын бой поле вылысь петкõдалисны раненõйясõс, наступайтысь войскалы кыскалисны боеприпасьяс. Кõр видзысьяс отсалисны Заполярной армияса 126-õд корпуслы Петсамо кар мездигõн, Войвыв Норвегиясысь оккупантыясõс вõtлигõн.

Июль 25 лунõ генерал-майор Н. А. Чернухалõн дивизия петис государственной граница динõ, а сәсся пырис Финляндияõ 12—15 километр.

Неуна лунвылынджык государственной граница динõ матыстчис и 313-õд дивизия полковник Н. Ф. Цыганков командуйтõм улын. Тайõ дивизиялõн полкьяс июнь 23 лунõ мездисны Медвежьегорск, вит лунмысти — Кондопога карьяс, а июнь 29 лунõ õти батальон пырис медводдзаяс лыдын Петрозаводск карõ.

Та бõрын Финляндияын весиг найõ, кодьяс сулалисны фашистской Германиякõд õтвылысь воуйтõм дор, кутисны гõгõрвоны: колõ корсьны войнасысь петан кутшõмкõ туй. Фашистской Германия нинõмõн нин отсавны оз вермы, ачыс сулалис военной поражение водзын.

Август 1 лунõ Финляндияса президент Рюти петис отставкаõ, куйм лунмысти финской сейм вынсыõдис республикаса президентõн маршал Маннергеймс. Государствõн юрнуõдан пост вылõ сувтигõн Маннергейм висьталис, мый Финляндиялы оз ков мунны Германия бõрся, мый сылы колõ торйõдны ассыс судьбасõ германской рейхлõн судьбаысь.

Август 8 лунõ лои котыртõма выль финской правительство, кодi кутис корсьны войнасысь петан туй.

1944 вося август 25 лунõ Берлиннн Финляндияса посоллы воис индõд висьтавы германской правительстволы, мый водзõ сәсся Финляндия оз лыдды асьсõ йитõмаõн сыõн водзвыв босьтõм обязательствояскõд. Тайõ жõ луннас Стокгольмын финской посланник сетис советской посол А. М. Коллонтайлы Финляндиясысь иностранной делõяс кузя выль министр г-н Энкельлысь шыõдчõм, кодын министр корис Советской правительствоõс примитны финской делегацияõс сёрнитчыны перемирис йылысь либõ вõчны мир.

Август 29 лунõ А. М. Коллонтай юõртис посланниклы, мый советской правительство примитас Финляндияса делегацияõс сõмын сәк, кор финляндской правительство водзвыв кõсийсыс пыр жõ висьтавы, мый Финляндия ордõ Германиякõд йитõдьяс да корас сылысь сентябрь 15 лунусь не сёрнджык петкõдны Финляндиясысь став немецкой войска. Германия

кө оз вöч тайöс, то немецкöй войскаöс лöб разоружитöма да найöс сетöма миянлы и миян союзникъяслы военнопленнöйяс пыдди.

Сентябрь 2 лунлы паныда войö финскöй правительство радио пыр висьталис, мый Финляндия примитис Советскöй правительстволысь условиеяссö Германиякöд йитöдъяс ородöм да, сентябрь 15 лунысь не сёрöнджык, Финляндияысь германскöй войска петкöдöм йылысь. Правительстволөн тайö шыöдчöмыскöд öттшöтш финскöй командование висьталис сентябрь 4 лунся 8 час асывсянь финскöй войскаяслөн сулалан став участкаын военнöй действиеяс дугöдöм йылысь, мöд ногөн кө — Реболысянь, көнi вöли налөн медся шуйгавывса 14-öд дивизия, Выборгса заливöдз.

Миян Верховнöй командование тшöктис миянлы дугöдны военнöй действиеяс став тайö участкас сентябрь 5 лунся 8 час асывсянь.

Сентябрь 8 лунö Москваö воис финскöй делегация сёрнитчыны перемирие кузя условиеяс йылысь. Делегацияын вöлины Министръяс Советысь председатель А. Хаксель, оборона кузя министр генерал Р. Валден, генерал-лейтенант О. Энкель, Генеральной штабса начальник А. Хейрикс. Сентябрь 16 лунöдз делегациянас юрнуöдис г-н Хаксель, но сэсся сийö висьмис, и Москваö воис иностраннöй делöяс кузя министр К. Энкель, кодöс вöли индöма делегацияөн юрнуöдысьö.

Ме участвуйтi тайö совещание кежлас лöсьöдчан уджын да вöли Москваын сёрнитчöмъяс дырйи. И. В. Сталин тшöктис А. А. Ждановлы да меным дасьтыны перемирие йылысь договорлы проект. И сы вылын ми уджалим Ленинградын. Сэсся ме, кызди Карело-Финскöй республикалөн народнöй овмöслы финскöй войскаөн вöчöм убыткаяс арталöм кузя да оккупантъясöн вöчöм злодеяниеяс тöдмалöм кузя комиссияс член, дасьтi лыдпасъяс вöчöм убыткаяслы, кодъясöс сэсся вöли сетöма сёрнитчöмъяс дырйиыс финскöй делегациялы да лойны подулөн репарацияяслысь сумма урчитигөн.

И. В. Сталин да А. А. Жданов юалисны менсьым, кызди ме видзöда главнöй финскöй военнöй преступникъясöс кыв кутöмö кыскöм вылö. Көнi судитны главнöй финскöй военнöй преступникъясöс — Хельсинкиын али Петрозаводскын?

Сентябрь 19 лунö вöли кырымалöма Финляндиякöд перемирие йылысь соглашение. Сы серти финскöй войскалы колис сентябрь 21 лунсянь заводитны бöрынтьчыны государственнöй граница визь сайö, кодöс вöли урчитöма 1940 вося договорын. Тöдчöдсис, мый октябрь 3 лунысь не сёрöнджык финскöй войскаөн босьтöм СССР-лөн став тер-

риторияыс должен лоны тырвыйö мездöма.

Перемирие йылысь условиеяссö олöмö пöртöмөн, финскöй войска миян территория вылысь бöрынтьчисны план серти. Найö весалисны сувтöдöм минаяс, вöчисны проходъяс проволочнöй заграждениеясын. Посъяс да связылөн линияяс миян войскалы сетсисны ньöти жугöдтöг. Сэни, көнi найöс вöли дасьтöма взорвитны, финскöй сапёръяс идралисны взрывчаткасö. Бöрынтьчысь финскöй войска да миян войскалөн частъяс костын быдлаын костыс вöли 15 километр. Финскöй войска быд лун бöрынтьчисны этша вылö 15 километр.

Быд сикас венъяс кузя сёрнитчöм могысь кыкнанладорыс торйöдисны офицеръясöс, кодъяс аддзысьлисны быд лун нейтральнöй му вылын. Финскöй войска вуджисны государственнöй граница некымын лун водзджык индöм срокысь. Финскöй правительство сiдз жö пöртис олöмö договорлысь мукöд пунктъяс, сы лыдын и асланыс странаса войвылысь немецкöй войскаöс вöтлöм кузя.

Договорсö кырымалигөн на финнъяс гө-гөрвоисны: немецкöй войска оз сетны асыыныс öружие да оз сетчыны пленö добровольнöя, найö кутасны водзсасыны, вöтлыны найöс ковмас тышөн — öружие вынөн. Тайö могсö олöмö пöртöм вылö финскöй командование торйöдис 3-öд армейскöй корпус, кодi война заводитчöмсяныс да 1944 вося мартöдз вöли немецкöй 20-öд горнöй армия кипод улын. Öнi финскöй салдатъяслы ковмис заводитны тыш асланыс вöвлöм союзникъяскöд.

Немецъяслөн 18-öд горнострелковöй корпус заводитис бöрынтьчыны Ухтинскöй направиениеысь сентябрь 7 лунö. Сентябрь 8 лунö ассыс рубежъяссö эновтис Лоухи районысь СС дивизия «Норд», кодi пырлис 181-öд корпусö. Финнъяслөн 3-öд корпус аслас территория кузя вöтчис бöрынтьчысь прöтивник бöрся. Неуна сёрöнджык 3-öд корпуслы отсöг вылö финнъяс вуджöдисны Финляндия лунвылысь 15-öд пехотнöй бригада да финскöй армияын дзик öти бронетанковöй дивизия полковник Р. Лагус командование улын, да ещö пограничникъяслысь отряд 1200 мортысь.

Татшöм ногөн, финскöй правительство да финскöй армиялөн командование чукöртисны бура ыджыд вын, нуöдисны немецкöй 18-öд горно-стрелковöй корпускöд вель чорыд тышъяс.

18-öд горно-стрелковöй корпусса командир тэрмасис öдйöджык воштöмъястöг петкöдны ассыс частъяссö Норвегиялөн граница дорö, а сэни, оккупируйтöм Норвегияын, чукöртны резерв 20-öд горнöй армиялы да ковмигөн сетны отсöг 19-öд горнострелковöй корпуслы, кодi кутис оборона

Мурманск сайын Западная Лица ю пӧлӧн 1941 вося июль 2 лунсянь.

Но финскӧй войска падмӧдӧсны немецкӧй да финскӧй войска костын мунӧсны вель чорыд бойяс, торъя нин Торниоын, кытчӧ чукӧр-мис 18-ӧд горно-стрелковӧй корпус ставнас.

Тӧдса, мый кыкнанладорсяныс вӧліныгырысь воштӧмъяс. Немецкӧй генерал Дитмар, кодӧ войн джынӧн чӧж война заводитчӧм бӧрын командуйтис 169-ӧд немецкӧй пехотнӧй дивизияӧн, бӧрынджык лои рейхлӧн радиокомментаторӧн да «Финская кампания» статьяын, кодӧс вуджӧдӧма роч кыв вылӧ да йӧзӧдӧма «Мировая война 1939—1945 гг.» книгаын (Москва, 1957 во), гижӧ:

«18-ӧд горно-стрелковӧй корпус сулаланӧнын немецкӧй да финнъяс костын вӧліны чорыд бойяс, торъя нин Торнио гӧгӧрын, кӧнӧ 3-ӧд финскӧй корпус кӧсйис содтыны ассьыс наступайтан ӧдсӧ немецкӧй войскалӧн восьса флангын. Танӧ пансисны чорыд бойяс, кодъяс помасисны сӧйӧн, мый 18-ӧд горно-стрелковӧй корпус пискӧдчис войвылӧ да чорыд тышъясӧн Муснино пыр пискӧдчис Норвегияӧ. Тайӧ вӧлі медбӧръя да медся мисьтӧм лист бок немецко-финскӧй дружба историяын».

Сӧки, 1944 вося сентябрь — октябрь тӧлысьясын, финскӧй войска жуглісны вынсӧ немецкӧй 20-ӧд горнӧй армиялысь, мыйӧн ӧна отсалісны Карельскӧй фронтса 14-ӧд армиялы Петсамо босьтӧм кузя операция нуӧдӧгӧн. Но немецкӧй да финскӧй войска костын тышъясыс эз помасыны и сы бӧрын, кызди ми пасьвартӧм Заполяръеын немецкӧй 19-ӧд горно-стрелковӧй да 36-ӧд армейскӧй корпусъяс, мездӧм Петсамо, Никель да Линохаамари, кодъяс 1944 вося сентябрь 19 лунся договор серти вуджисны миян страналы. И кор советскӧй войска мездӧсны некымын кар Войвыв Норвегиялысь, немецкӧй та коста босьтӧсны бур позицияс куим госуларстволӧн — Финляндиялӧн, Норвегиялӧн да Швециялӧн — границаяс дінын, и кутӧсны ас кияныс финскӧй мулысь юкӧн 1945 вося апрель 25 лунӧдз. Танӧ финскӧй войска нуӧдӧсны позиционнӧй война квайт тӧлысь чӧж. Та йылысь бара жӧ гижӧ немецкӧй генерал Дитмар аслас статьяын.

Финскӧй салдатъяслӧн, уна шӧр да гырысьджык командиръяслӧн немецкӧй дӧно лӧглун заводитис петкӧдчыны войналӧн первой тӧлысьясын. Та йылысь бура висьталісны пленӧ веськалӧм финскӧй салдатъяс да миян партизанъяслы сюрӧм уна пискӧмъяс. Война мунан восяӧ меным ковмывліс сӧрнитны уна финскӧй пленнӧй салдатъяскӧд да офицеръяскӧд. И колӧ вӧлі адзыны, немецкӧй дӧно кутшӧм лӧглунӧн ӧйылісны

синъясыс быд финнлӧн, кор сӧйӧ вочавидзілі миян юалӧм вылӧ.

1941 вося июльын на меным ковмис сӧрнитны ӧти пленнӧй финнакӧд, кодӧ служитӧма переводчицаӧн немецкӧй 163-ӧд пехотнӧй дивизияын. И кор сӧйӧ юаліс, мый ськӧд вӧчасны, ме шуи, мися мӧдӧдам ӧтлаын немецкӧй военнопленнӧйяслӧн лагерӧ, нывбабайд шуис: «Бурджык менӧ ӧнӧ жӧ лыйлӧй, но эн мӧдӧдӧй лагерӧ ӧтлаын тайӧ лӧк йӧзыскӧд!»

«Но и союзникъяс!» — думыштӧ ме сӧк, война заводитчигӧн на.

Финскӧй салдатъяслӧн пискӧмъяссыс пӧзӧ вӧлі сӧки лыддыны татшӧм кывъяс:

«Немецкӧй вӧчӧны миян му вылын мый кӧсйӧны да кызди кӧсйӧны. Проклятӧй немчура панис тайӧ чепухасӧ, кодъяс регыдӧн он мын».

Тадзи гижӧ финскӧй армияса капрал Лейонен салдат Хяркиненлы 1943 вося июнь 6 лунӧ.

Вӧліны и чорыдджык на кывъяс финскӧй салдатъяслӧн пискӧмъясын, но найӧс прӧстӧ оз позь танӧ вайӧдны. Меным зэв гӧгӧрвоана, мыйла финскӧй салдатъяс сэтшӧм лӧглунӧн тышкасисны немецкӧй паныд 1944 вося арын. Найӧ мустӧмтісны Гитлерлысь салдатъясӧс да кӧсйисны ӧдӧджык вӧтлыны найӧс асланыс му вылысь.

Документъясыс тыдалӧ: немецкӧй воштісны 1944 вося арын финнъяскӧд тышъясын 10—12 сюрс салдатӧс да офицерӧс, на пиысь 1305 пленнӧйӧн. Став пленнӧйяслӧ финскӧй командование сетис миянлы да миян союзникъяслы, кызди и вӧлі шуӧма 1944 вося сентябрь 4 лунӧ финскӧй правительстволӧн примитӧм условиясын.

Финскӧй войскалӧн немецкӧй тышъясыс заводитчисны сентябрь 5—6 лунъясӧ. Первой лунъясас немецкӧй послыдик тылӧвӧй частъяс да военнӧй учрежденияс луныв Финляндиялысь вӧлі разоружитӧма ӧдӧ, финнъяслӧн воштӧмъяс пӧшти эз вӧвны. Бӧрынджык, немецкӧй 18-ӧд горно-стрелковӧй корпускӧд тышъясын, финскӧй войска воштісны 3940 мортӧс.

Тайӧ лыдпасьясыс сетӧны подув шуны: финскӧй армия пуктіс жӧ ассьыс пай миян ӧтувъя делӧ — германскӧй фашизмӧс жугӧдӧмӧ.

Гӧгӧрвоана, мый Финляндиялӧн тайӧ военнӧй акциясыс ворсіс ыджыд тӧдчанлун ӧта-мӧдлы дӧверие да уважайтӧмлы подув лӧсӧдӧмын.

Маршал Маннергейм, кодӧ вежис 1944 вося август заводитчигӧн президент Рютиӧс, тайӧ пост вылас вӧлі кык во гӧгӧр. Рютиӧс, кызди главнӧй военнӧй преступникъяссыс ӧтиӧс да фашистскӧй Германиякӧд союз медся тӧдчана дорйысьӧс, судитис

Финляндиялөн Верховной суд уна воля кежлө тюрьмаө.

Маннергейм бөрын Финляндияса президентөн лои төдчана политической деятель, Москваын Финляндияса вөвлөм посол, миян странакод мир да дружба дор сулалысь Ю. К. Паасикиви. Сы дырйи 1948 воын вөлі кырымалөма миян странаяс костын дружба, сотрудничайтөм да өта-мөдлы отсөг сетөм йылысь договор. Ю. К. Паасикиви Финляндияса президентөн вөлі дас во гөгөр. Сы бөрын Финляндияса народ тайө пост вылас бөрыис өнія президент Урхо Калева Кекконенөс, Ю. К. Паасикивилысь визьсө водзө нуөдысьсөс. У. К. Кекконен водзө нуөдө миян странакод мир да дружба политика. Тайө политикаыс пырис ниц дипломатиялөн историяө, кызди Паасикиви — Кекконенлөн визь. Финляндиякод миян дружба водзө паськалө да ёнмө.

1977 вося майын У. К. Кекконен воліс миян странаө официальной дружеской визитөн. Сійө Москваын нуөдис сёрнитчөмьяс миян партияса да правительствоса веськөдлысьяскод водзө вылө уна воля кежлө тор-

говөй, экономической, научно-технической да культурной йитөдьяс паськодөм йылысь. Та кузя кырымалөма колана документьяс. Лои сідз жө кырымалөма документ финской фирмаясөн Советской Карелияын ыджыд Костомукшской горнообогатительной комбинат стрөйтөм йылысь.

1977 вося май 17 лунө У. К. Кекконен честь кузя приём вылын Л. И. Брежнев тади доньялис СССР да Финляндия костын волясьөмьяссө:

«Советской Союзын ыджыд уважениеөн видзөдөны Финляндия вылө, сылөн дружественной народ вылө. Ми вылө доньялам сійөс, мый шедөдөма отувья вынөн миян волясьөмьясын бөрья дас вояснас».

Ноябрын тыри 60 во Советской государстволы. 1977 вося декабрын тырис 60 во, кызди Финляндия, В. И. Ленинлөн кырымалөм декрет серти, лои ашөр государствоөн.

Көсйысьсө эскины, мый миян дружба Финляндияса народкод да сылөн Правительствокөд кутас крепаммыны, паськавны да джудждаммыны водзө.

МӖС ВӖРА ЙӖВ

ӖТИ ТОРЪЯ ТЕШ

ВорсӖны бадь куст дорын. Ылынджык быдмӖ анькытш сора зӖр. Шонди лун. Недыр мысти кустъяс сайсянь пидзӖсчаньӖн кыссьӖ-петӖ Проня.

ПРОНЯ (*видзӖдӖ гӖгӖр*). Некод абу... (*Кокниа лолыштӖ.*) Шы ни тӖв... Тани и шойчыштны позьӖ... СӖстӖм сынӖдӖн лолалыштны... (*НюжмасьӖ.*) И узыштны абу грек... Сы вылӖ и шойччан лунсӖ лӖсьӖдӖма... Ӗдва мынтӖдчи ныв-зоньсь. Быд воськолын паныдасьӖны да нюмъялиг чолӖмасьӖны: «ЧолӖм-здорово, дояр!» «Бур лун, дояр!» «МуӖдз копрася, дояр!» «КутшӖма нин олан, дояр?» «Эн на гӖтрась, дояр?» «КутшӖмджыка лысьтысян, дояр?». Тьпу!.. Лысьтысян... Надойяс... ЧӖртыс мед нӖнялас став мӖсьяссӖ!.. (*НюжӖдчӖ турун вылӖ да синсӖ тупкӖ.*) Ок и лӖсьыд жӖ эжа вылын куйлыны!.. Унмовсьны эськӖ Ӗни... А садьмыны механизаторӖн... Виль трактор вылын...

Кок чунь йылас воӖ Надя да пуксьӖ
Проня динӖ.

НАДЯ. Бур вӖтъяс, дояр!

ПРОНЯ. А? Мый? Надя?

НАДЯ. Кыдз аддзан...

ПРОНЯ. Мый тӖ ме бӖрся вӖтлысян?

НАДЯ. Варовитыштны кӖсья.

ПРОНЯ. Мый йылысь? И сӖдз ставыс гӖгӖрвоана. Корин эськӖ бюро вылӖ.

НАДЯ. Пырысь-пыр и бюро вылӖ. Менам, гашкӖ, гуся сӖрни.

ПРОНЯ. Гуся сӖрни мян оз арты, Наденька.

НАДЯ. МыйлакӖ?

ПРОНЯ. ТӖ мян секретарь. А секретарьяс...

НАДЯ (*мелиа*). Талун ме, Прокоша, абу секретарь, а прӖстӖ Наденька.

ПРОНЯ (*сералӖ*). Ог эскы.

НАДЯ. СӖрнитыштам мелиа-бура. (*НюмӖвтӖ.*) Кыдз шуласны, став сьӖлӖмсянь.

ПРОНЯ. ТӖ, Надюк, сьӖлӖмтӖм...

НАДЯ. Збыльысь? КӖн нӖ эськӖ менам сьӖлӖмӖй?

ПРОНЯ. ХолодильникӖ дзебӖмыд.

НАДЯ. ДивӖ тай...

ПРОНЯ. ДивӖ кӖтъ абу, а тайӖ збыль.

НАДЯ. КоркӖ и тӖнад сьӖлӖмыд, Пронюк, вулкан моз ыпъялис! А Ӗни друг йизис. Мыйла?

ПРОНЯ (*ышловзьӖ*). МӖсьяс кынтысны... (*Надя сералӖ.*) Серав, серав... Ӗни ме вылын ставӖн сералӖны. Ме, Надюк, сиктса шутӖ пӖри.

НАДЯ. ВывтӖджык кӖ лӖсьӖдлан ас йывсьыд-а? Меным кажитчӖ, бӖрря кадӖ тӖнад характерын тыдовтчис выльтор...

ПРОНЯ. О, тайӖ интереснӖ! ПозьӖ тӖдмавы — мый?

НАДЯ. ПыдӖсянджык кутӖн видзӖдны олӖм вылас.

ПРОНЯ. Бара на сералан?

НАДЯ. ЧестнӖй комсомольскӖй!

ПРОНЯ. И таысь тӖн любӖ?

НАДЯ. Дерт жö!

ПРОНЯ. Кыз секретарлы любö?

НАДЯ. Кыз секретарлы и кыз Надюкы...

ПРОНЯ (*паськыда нюмтёвтö*). Наденька, тэ бөр ловзёдін менö!

НАДЯ. А öнi уськöд тöд вылад, мый тэ шулiн школа помалан рытö?

ПРОНЯ. Унатор йылысь сёрни вöлi... Ставсö тöд вылын он кут.

НАДЯ. Верма казтыштны.

ПРОНЯ. Буртор кө — казтышт.

НАДЯ. Сэки тэ пöся шуин: «Во мысти тэ, Наденька, лоан менам гöтырөн!» Да ещö зэв тшапа содтiн: «Знатнöй доярлөн гöтырөн!»

ПРОНЯ. Тэ, Надюк, вывтi бур па-
метя.

НАДЯ. Ог норась. Воыс колис, а
ме эг на вунöд.

ПРОНЯ. Он жö öд виччысь?

НАДЯ. Виччыся, Пронюк...

ПРОНЯ. Эн дивит, Надюк... Эз
артмы меысь знатнöй дояр. Та вöс-
на и пола тэысь. Мöсьясыс менö
пыдди оз пуктыны...

НАДЯ. А, гашкö, мöдарö? Тэ на-
йöс...

ПРОНЯ. Тайö оз вермы лоны! Оз,
оз! Ме вöча ставсö, мый верма!

НАДЯ. Тыдалö, ещö на мыйкö
колö... Галя Цветковалөн да Наста
Репкиналөн мöсьясыс тэнад код-
öсь жö. И кöрымыс öткодь. А лысь-
тöны...

ПРОНЯ. Найö кызкö лöсялöны
мöсьясыскöд... Гөгөрвоöны öта-мöд-
нысö. Пемöсьяс нимкодьпырысь ню-
лöны нывъясöс.

НАДЯ. А тэнö?

ПРОНЯ. Люкалöны.

НАДЯ. Со аддзан. Сидзкö, мый-
кö оз на тырмы тэнад...

ПРОНЯ. Гашкö, и сидз. Но ме
быд ногыс нин видлi бурасыны
мöсьясыскöд. Весиг...

НАДЯ. Мый — «весиг?»

ПРОНЯ. Тайö гусятор... Кодкö кө
тöдмалас та йылысь — ме пышъя
совхозысь.

НАДЯ. Но менымтö позяс.

ПРОНЯ. Нывъясыдлөн кывйыс
вывтi кузь.

НАДЯ. И менам тшöтш?

ПРОНЯ. Тöдлытөг больгыштан...

НАДЯ. Пронюк!.. (*Кучкö морöс-
ас.*) Гуын моз олас нэм чöж!

ПРОНЯ (*шеныштö кинас*). А!
Мый лоас ло!..

НАДЯ. Но, но, эн нюжмась.

ПРОНЯ. Лэччылі ме тулыснас
карö мотоцикл ньöбны. Помнитан?

НАДЯ. Дерт жö.

ПРОНЯ. Но вот... Карö вои рыт-
нас нин... Магазинъяс пöдсаöсь...
Керны нинöм... Пыри гуляйтыштны
паркö... (*Нюммунö.*) Ых... Хы-хы!..

НАДЯ. Мый нö хыкайтан?

ПРОНЯ. Друг, понимайтан, пук-
сис орччөн пелькиник тушаа, гөгрöс
чужöма брюнетка. Краситчöма-ба-
ситчöма...

НАДЯ. Сидз, сидз!..

ПРОНЯ. Сöмын тэ, Надюк, эн
скöрав... (*Бара серöктiс.*) Зэв ва-
ров... Понимайтан...

НАДЯ. Понимайта, понимайта...

ПРОНЯ. Кыв бöрся кыв. Прамöя
сёрнитыштiм...

НАДЯ. Сэсся?

ПРОНЯ. Сэсся гуляйтыштiм.
Йöктан залö пыралiм да йöктыш-
тiм...

НАДЯ. Водзö, водзö!

ПРОНЯ. Зэв ёна пöсялiм да пе-
мыд пельöсö и саймовтчим...

НАДЯ. Саймовтчинныд?!

ПРОНЯ. Да... Лöсьыд скамья вы-
лö пуксим...

НАДЯ. Дон Жуан! (*Кост.*) Мый
ме вылö видзöдан? Вай водзö, во-
дзö висьтав. Но?! (*Проня чöв олö.*)
Но, пуксинныд лöсьыд скамья вы-
лö... А водзö мый?

ПРОНЯ. А водзö, Надь, кывйöй
оз бергöдчы... (*Нылыштö дульсö.*)
Друг сэтшöмтор лои!..

НАДЯ. Тырмас! (*Сувтö.*) Ставыс
гөгөрвоана. Тэкöд пукавнысö весиг
зывök!

ПРОНЯ. Пуксьы, Надя! Öнi нин
быть ковмас помöдз кывзыны. (*Сув-
тö пидзöс вылас.*) Ме тэнö кора!..

НАДЯ (*бөр пуксьö*). Ошйысь вай,
ошйысь, кыззи аслад гөгрöс чужö-
ма кралечкаыдкöд окасiн пемыд
пельöсад...

ПРОНЯ. Да эг окав ме сийöс. Пö-
сялöм бöрас кызкö друг сийö не-
тшыштiс юрсьыс мича сьöд юрсисö
да колис торк ёкмьль кодь юрсиа!

НАДЯ. Збыльысь?

ПРОНЯ. Сё ей бог!

НАДЯ. Вот тайо да! И збыльысь виччысьтөмтор!..

ПРОНЯ. А мича съод юрсисо шлапкис менам юр выло да вак-вакөн сероктис. Понимайтан?

НАДЯ. Кхм... Но, а тэсо, тэсо мый?

ПРОНЯ. Шойовоши...

НАДЯ. А сийо?

ПРОНЯ. Чуп окыштіс веськыда парйо.

НАДЯ. Со од, со од!.. А ещо шуан — эг по окась.

ПРОНЯ. Да од сийо мено окыштіс, а эг ме.

НАДЯ (*тупко пельяссө*). Шань! Ог вермы сэсса кывзыны!

ПРОНЯ. Но главнойыс водзын на...

НАДЯ. Мый но ещо либо? Мый?

ПРОНЯ. Окыштіс...

НАДЯ. Бара?!.

ПРОНЯ. Да эз. Отчид сомын. А окыштөм борас топодис мено морос бердас дай вашкодө: «Тэныд, Проня, зэв эна мунө татшөм причёска-ыс». (*Нюмдө.*) И друг!..

НАДЯ. Мый?

ПРОНЯ. И друг меным воис юрошонди кодь югыд мөвп: портчыны мича нывбабао!

НАДЯ. Вежөртө воштін али мый?

ПРОНЯ. Оти кывйон, босыті ме сылысь съод париксо се ветымын шайтысь.

НАДЯ. Се ветымынысь?!

ПРОНЯ. Но од кутшөм причёска-ыс!..

НАДЯ. А мотоцикльд но?

ПРОНЯ. Съолышти мотоцикл вылад. Парик дорө ньоби мича платтьо, туфли, чышьян...

НАДЯ. Сэсса пасьтасьлін али мый?

ПРОНЯ. А кызд жө!.. Гортө воом бөрын водза-водз асывнас вөччи, вежи покодкаос, гөлөсөс тшөтш да кайи скөтнөй дворө выльысь төд-масьны аслам серукьяскөд.

НАДЯ. А найо? Ой-ей!

ПРОНЯ. Отияс бужгыльтчисны, мөдьяс баксыны кутисны, а Аргентина нима мөс сэтшөма люкыштіс!

НАДЯ. Ой-ей да ой-ей!

ПРОНЯ. Кок йылысь уськодис

пось куйод выло да ещо и чужийис трасичаид!

НАДЯ. Адой, адой!

ПРОНЯ (*шого ышловзё*). Тадзи и помасис менам нывбабао портчы-лөмыд.

НАДЯ (*сералө*). О, енмөй, енмөй, кутшөм на тэ кокни мывкыда, Прокө!

ПРОНЯ. Абу, вөлөм, кокни дояр-авныд.

НАДЯ. А ме мый шулі? Доярлы колө аслыспөлөс характер... А тэнад сийо абу.

ПРОНЯ. Гашкө, и сідз... Мам менө ызийдліс ичөт дырйи.

НАДЯ. Мамыд од тэнад шөвк сьөлөма вөлі. Узис и оліс мөсьяс-нас.

ПРОНЯ. Збыль, збыль. И вайо-ма менө мөс картаын.

НАДЯ. Яслиын... Иисус Христос-ос моз...

ПРОНЯ. Иисус Христос йылысь — сөрөм. А ме збыльысь чужи скөтнөй дворын. Наста тьот мыськөма менө мөс вөра йөлөн да шуөма: лоан по тэ раб божий доярөн! Сэсянь быд лун вердөма менө мамө мөс вөра йөлөн, а рытъяснас мойд-лөма мөсьяс йылысь...

НАДЯ. Да, мөс вөра йөв тэ збыльысь радейтан. А асьнысө мөсьяссө?

ПРОНЯ. А кызд ещо колө найос радейтнысө? Ог жө кут окавны.

НАДЯ. Тэныд эськө сомын окасьны... Пемөсьясыд вежөраджыкөсь тэа-меа дорысь. Найө ставсө гөгөр-вооны. А тэ быд лысьтигөн видан найос лёк кывьясөн...

ПРОНЯ. Оз кывзысьны да.

НАДЯ. Мөс вөра йөвтө небось видчытөг дучкан.

ПРОНЯ. Дучкывлі коркө...

НАДЯ. А өні он али мый?

ПРОНЯ. Оні зывөк лои. (*Не-ыджыд кост бөрын.*) Ещо оти гусятор тэныд висьтала, Надюк: асла-ным мөслысь пөшти став лысьтөм йөвсө новла фермаө.

НАДЯ. Асьыныд новлан?

ПРОНЯ. Надойяс ичөтөсь. Яндзим. Со и новла...

НАДЯ. А гортсаид но?

ПРОНЯ. Бать броткө, чойяс пиньясьоны.

НАДЯ. Он тай веськыд туй кузя мун, дона пи!

ПРОНЯ (*дөзмьштөмөн*). Ачым төда... Прамөя мөвпышттөг вөзйы-си доярө, со мый. Ме абу дыш и вө-чи ставсө, мый верми. Эмось пра-мөй дояръяс. А меысь эз артмы.

НАДЯ (*ышловзис*). Ок, Прокө, Прокө, инасьтөм лов. Мый косьян водзө вөчны?

ПРОНЯ. Наперво гөтрася тэ вы-лө.

НАДЯ. А ог кө пет?

ПРОНЯ. Петан. А сэссия велөдчы-ны муна механизаторө.

НАДЯ. Велөдчөм бөрад и гөтра-сян.

ПРОНЯ. Ог.

НАДЯ. Мыйла эськө?

ПРОНЯ. Кузнеч Ёгор панъяс. Сийө важөн нин тэ бөрся вөтлысьө...

НАДЯ (*серөктө*). Йюк!

ПРОНЯ. Гижсям и муна... Ог вермы ме тэтөг. Гөгөрвоан? Ог вермы и пом!

НАДЯ (*нюмдө*). Господьөй-ен-мөй, и мыйла ме тэнө радейта? Эта-тшөмсө?

ПРОНЯ. Ог төд...

НАДЯ. И ме ог төд... (*Проня се-рөктө.*) Ещө өд и сералө! (*Пуктө юрсө Проня пельпом вылө.*) Пробка ныра сьөлөм косьтысьөй тэ менам.

ПРОНЯ. Да... Сьөкыд корсьны прамөй гөтырөс... Но ещө сьөкыд-джык аддзыны радейтана удж...

МИРОН ДЕД ПИСЬКОДИС ÖШИНЬ ✓

ВИСЬТ

Мыйыс сөмын эз и вөв Мирон дедлөн сараяс: сьөкыд изки, гыр, көні важөн нин нинөм эз тойны, путшкысян машина, ичө-тик пыж, кодос оз туй нин лэдзны ва вылө да көні көзяин видзө арын вотом пув, гөн тыра пестер, кытчө сийө тишөкыда дзеблывліс магазиньсы гусьөн вайөмтор, стен бердын сулаліс верстак, а сы вылын — гөтырыслөн приданной көлуй тыра сундук; сәні жө вөлі өшлөма кулөмьяс, бөталаяс. ветельяс, стен пөлөнын, верстак вылын жө, куйліс выль лызь гоз.

Но став тайө озырлуныс оз тыдав — сарайын вөлі дзурс пемыд. Со мый вөсна Мирон дед и мөвпышти сэтчө восьтыны өшинь. Гөтырыс эськө коркө нин шуліс:

— Миронө, вай сараяным югыд би нюжөдам, Чумаковсө корлам да.

Но Мирон дед югыд би вылад эз ышты, а вочавидзис гөтырыслы өти кинас мөд кисьыс чуньяссө чегьявлөмөн:

— Электрикы мынтысьны — раз, да и өти дозийөн Чумаковид оз прөймитчы. Выключатель, проводка, лампочка (ставыс колө) — два. Счөтчыкыд бара жө өдйөджык кутас бергавны — три. Ог, ог, югыд битөг прөймитчам. Ме со мый мөвпышти, Марпа, — өшинь писькөдам сараяным.

Өшинь кө и өшинь, мый Марпалы — мед югыд вөліс да эз ков тапьявны кималасөн. А көсяк пуяссө дедлөн вөлі водзвыв нин дасьтөма да сөмын сийө и вөлі уджыс, медым пилитны стенас розь да көсякавны.

Өти бур асылө чеччис Мирон дед да мөдөдчис зятьыс ордө бензопилала. Воис, а көзяиньыс буретш удж вылө нин пасьтасьөма. Водз сылы колө мунны, сизим часе жежлө.

— Чолөм, зять!

— Чолөм, чолөм! Мый нө сэтшөм водз талун ветлөдлан, кутшөм мог суис?

— Пилатө он али сетлы, гоз чеп да?

Петисны да мыччис зятьыс чуланьсы «Дружба» бензопила, а чепьяссө бөрйис медся чиресьөм пиньясаөс.

— Чепьястө бурджыкөс сет, мед көтьи пилитас. Тайө нө со мый — ур гыжъяс жодь нин пиньясыс.

— Бурсө ог сет. Важ стрөйбаад гынды-

сигөн верман и көрт тувийө шваркнитны. Пилитас тшук-тшук.

Со и горт дорас нин Мирон дед. Пуктис пиласө кильчө вылас да лэччис пывсян дорас, катөдіс сэтысь кузь кокъяса люгилеги скамья, мөздөдіс сарай стен бердас. Видзөдліс — чотө скамьяыс, да пуктис өти кок улас поткөдөм пес чурка. Дедлысь нөксөмсө аддзис суседыс, Шылыыд Миш, да чепөсийс ывлаө, дед дорө.

— Он-ө нин көсий, Мирон Иванович, запасной выход восьтыны... на случай пожара?

Дед, гашкө, эз кыв, а гашкө, эз көсий — нинөм эз вочавидз. На дорө жө сәсся жежис совхозса бригадир Дымов, киасис Мишкөд, а дедлы, коді ляпкөдчөмөн лүкйисис пилаас да вөлі бригадирлань заднас, эз мыччы кисө, мед не торкны мортөс уджалөмысь, а тапкөдыштис мыш кузяыс: чолөм пө и тәныд.

Бригадир бөрын матыстчис Симон Öльш, сәсся бара кодкө, да регыд нин Вань Мирон керка дорө чукөртчис, гашкө, сиктса джын мужичөйис. Кутисны юасыны өта-мөдыслысь, мый нө пө тані мунө, но некоді эз куж висьтавны, мыйла татчө өкмис та мында йөз.

А Мирон дед асьсө төдіс: разис карбюратор, пөлыштис кутшөмкө розьө, кытчөкө вөсени сутуга пом суйліс, бөр мөздөдіс карбюраторсө, эзлөдіс өтверткаөн да тракнитис стартер. Пилаыс «пр-р-р» лэдзөдліс, но эз босьт.

— Ловья эськө да...

— Ловьянас ловья да бензиныс, думайта, ва сора.

— Абу сыын делөыс, искраыс слаб, прөверитны колө. — Разисны свеча.

— Ноко, Öльш, пуктыв чуньтө каллянас, а ме надзөник дернита.

Шылыыд Миш дернитис да эз надзөник, а мый вынсьыс, быттө заводитигөн нин. Симон Öльш гатшмоз усис Мирон дедлы кок улас, сәсся сувтис да гачсыс лыасө пыркөдігмоз шуис:

— Искраыс пө слаб. Татшөм искрайд өшкөс вылө көкөн шыбитас.

Гыдзкө-мыйкө артельөн жө и ләптисны Мирон дедөс кузь кокъяса скамья вылас,

мыччисны сылы торгысь пиласё. Ёльош на эськё шуліс, вай пё ме пилита, но дед сылы вочавидзис:

— Ачым восьта. Кежан тіралысь кияснад пасйём визьясьеыс да кёсякъясёй пропадитасны.

Со и сатшкысис чептыс стенё, кутіс йирны сійёс да регыдён и пырөдчис сарай пытшкёсөдзыс.

«Сэся кокныдджык лоё — сёмын лэдз визь кузяыс», — мөвпаліс Мирон Иванович. Чептыслөн пиньясыс көть и бырөмаөсь нин, но выльён төчитлөма да вөліны лэчыдөсь. Ётилаё пилаыс друг джөмдыліс, но бара кутіс йирны керьясё важья өдөн. Пилипызкөд тшөтш мыйлакө кутісны лэбны гөн торьяс, рузум торьяс.

«Паклясё нетшкө, сійөн, тыдалө, и джөмдалө пилаыс», — чайтіс Мирон дед.

Со өти боксё лои лэдбөма, но чептыс ёна ныжмис да ковмис вежны.

— Куритчы! — горзісны увсянь.

Мирон дед өшөдіс кокьясё, пуксис скамья вылас, картуз гугнас чышкис плеш вывсьеыс войталысь ньылөмсө, видзөдліс вывсянь гөгөрбок. Нимкодь сылы талун вөліс, мый асылыс сэтшөм мича, шондіа, а медьясө нин сыысь, мый өдөбсис, медбөрын, сараяс өшинь восьтны. Нимкодь лоас и Марпаяслы, коді өні, дерт, чай пуктіс нин пузбөдны.

Улын сулалысь мужичөйяс баитісны өта-мөд костаныс, мукөдыс видзөдлывлісны часі вылө — абу-ө кад мунны уджавны.

Мөдар бокыс шедіс сьөкыдаджык. Чептыс тшөкыда кытчөкө сибдывліс, «пакляыс» кутіс локны унджык, чеп гөгөр ворсісны би киньяс. Медбөрья керйыс эджык ор, сэтчө пилаыс джагаліс дзикөдз.

«Но, тайёс сэся позьё нин черён сөтны», — думыштіс дед да мыччис кодлыкө доналөм пиласё. Ачыс лэччис жө, видзөдліс ылісянь, абу-ө кёсөя пилитөма да пырис сараяс, медым восьтыны өшинь местасө, чужьявны ортсө пилитөм чуркаясө.

Со и пырис мича асылөн югөрыс пемыд сарайё. Но пемдісны Мирон дедлөн синьясыс, кор аддзис сійё аслас киясөн вөчөмторсө. Верстак вылын куйлысь лызь гөз вөлі пилитөма шөри. Пилитөма, кытчөдз судзөма пилаыс, верстаксө. А кор аддзис гөтырыслысь шөри орөм сундуксө, тіравны кутіс быдсөн.

— Но и сё пакөсь, но и сё пакөсь, — баялөжсө гыжъялігмоз шуаліс вомгорулас дед.

Сарайё чепөсйис гөтырыс.

— Но и бур дела вөчөмыд, Миронушка, югыд лоөма өні. — Сэся матыстчис дедыс дөрө. — Мый нө тайё, Миронө? Лызьастө абу-ө шөри пилитөмыд? Верстаксө дай... а сундуксө нө мыйла? О-о-о! — вөлисти на лөк ногөн омлөвтис Марпа, кватитіс орөм лызьлысь нырладорсө да кыкысь лэдзліс дедыс мыш вылө. Ёвлаын сулалысь мужичөйяслы өшинь розь пырыс тыдаліс тайө концертис, да найө пондісны куснясьбөмөи серавны. Сиктын ылөдз кыліс Мирон гөтырлөн дедыс вылө зыксьөмыс. Сэся Марпа пыраліс горничаас сундук ключысла, восьтіс сундуксө, кутіс перьявны сэтысь шөвк, ситеч, сатин лестукьяс — нывдырся сарапаньясыслысь колясьясө.

— Тэ, эськө, ачыл, шөри пилитанторйыс да!.. И кызі тэнад сямыл эз тырмы водзвыв вештыны ставсө стен дорсьеыс? А өні мый? Со видзөдлы, видзөдлы буби синьяснад мый тэ вөчөмыд! Ни өти платтё дзонь абу кольбөма.

Сэся босьтіс верөсө шошаөдыс да люкөдіс нырнас, кыз сорсьөм каньёс, бонзьөм көлуйланьыс.

— Но ланьт, ланьт, — шуаліс Мирон дед, — мый лоөма — лоөма нин, мыжа, дерт, ме, но эн шогав бакшасьөм көлуй вөснаыл. Экономитны тай көсйылі, да... Сөвикө на абу сюрөма чеп улас да сәті бур, а өшиньыс лонс, лонс, мун чайтө пузбөд, шыдтө лөд, яйтө крөшит.



КЫК ЮКОНА БЫДМӨГ НИМЪЯС

Быдмөгъяслысь нимъяссө поэбь видлавны некымын боксянь: чужом-артмом серти, семантика боксянь, тэчасног серти да с. в. Исторической анализ вөчигон коми нимъяссө учёнйяс орччөдöны мукөд рөдвуж кывъяскөд да туялöны, кор найö чужломась: уральской, финно-угорской да общепермской кадъясö, либö сөрөнджык — бөръя нэмъясö (коми йöзлөн асшөр олігөн). Семантика боксянь видлалігөн төдмалöны мый вылö мыджсьылöмаось важ йöз быдмөгъяслы нимъяс сетігөн, мый босьтлөмаось төд вылас миян пöч-пöльяс найöс серпасалігөн. Тэчасногö видлалöмыс петгөдлө, мый быдмөг нимъяс пöвстын эмось кызди өтторъя кывъяс (пув, оз, чөд, льом, тöзь, йөн), сідзи и некымын кывйысь артмом терминъяс: **виж йөн** «осот полевой», **вир кутан турун** «тысячелистник», **чарөм пыр петан турун** «сон-трава» да с. в. Миян гижөдын сёрни кутас мунны кык юкона фитонимъяс йылысь (**фитоним** — **быдмөг ним**, артмөдöма кык греческой терминъяс: **пхытөн** «растение», **дныма** «имя»). Тайö кыв чукöрыслөн төдчанлуныс не сöмын сын, мый найö босьтöны ыджыд места ботанической терминология пытшкын, но и сын, мый татчө пырöны кык сикас нимъяс: кыв сочетание (синтагмаяс) да сложной кывъяс (комполитаяс). Öня коми кывлөн словарясын водзаясыс пырджык сетсьöны торйөн гижөмөн: **коз пу**, **куз турун**, **гөрд гоб**, **сьөд бадь** «чернотал», а бөръяясыс — öтлаын гижөмөн: **пипу**, **турипув**, **уртшак** да с. в. (Видеманлөн, Фокош-Фукслөн да Вихманлөн

словарясын татшөм сяма кывъясыс вайөдсьöны пыр өтмоса — дефис пыр: **сьөд-сэтөр**, **нюр-моль** «клюква», **сьöла-оз** «поляника»). Но мукөд дырйи овльвлө и сідзи, мый кутшөмкө быдмөглысь нимсö торъя гижөдъясö пыртöны оз öткодя, видзөд «Коми-русской словарь» (М., 1961): **лудік-турун** «вид папоротника, клоповник, багульник», **пö-лудь син** «василек синий», **сиртурун** «подмаренник мягкий», **ватшетшак** «водяная лилия»; «Коми зырянской диалектъяслөн сравнительной словарясы» (Сыктывкар, 1961) мыддым: **лудік турун**, **пöлудьсин**, **сир турун**, **ва тшетшак** да с. в. Таысь öтдор поэбь вайөдны и сэтшөм примеръяс, кор дзик öткодъ мыгöра фитонимъясöс уна ног пасйöма öти и сійö жö словарын. Сідз, «Коми-роча словарын» **шыранькытш** «мышинный горох» гөгөрвөөдсьö кызди сложной кыв, а **вөв йөн** «чертополох поникший» — кызди кыв сочетание нин.

Татшөм сяма кекла-сьöмъясыс паньдасьлöны оз гежöда, кöть эськө коми кывлөн грамматикаясын эмось правилöяс, кодъяс вылö мыджсьöмөн поэбь гөгөрвöны синтагма да комполита костын торъялөмсö: «...а) сложной кыв кө серпасалө öти (торйөдны поэбтөм) понятие да кутө выль вежөртас, коді торъялө юкөнъясыслөн вежөртас-сьыс, то сійöс колö гижны öтлаө, напр.: **паськөм** «одежда», **пась** «шуба», **көм** «обувь»; б) кыв сочетание кө оз пасйö өтторъя понятие, да сылөн кө вежөртас-ыс петö юкөнъясыслөн вежөртас-ыс, то сійö гижсьö торйөн, напр.: **мөс сюр** «коровий рог» поэбь вежны

мөслөн сюр «у коровы рог», — төдчөдöма коми кыв кузя ыджыд школаын велөдчан книгаын, коді петалис Сыктывкарын 1955 воö.

Ставсö тайöс төд вылө босьтөмөн ми юкам быдмөг ним-комполитаясöс куим пельö.

1. Первой чукөрö пырöны сэтшөм фитонимъяс, кодъяслөн юкөнъясыс бергалöны не сöмын сложной кывъяс пытшкын, а сідз жö паньдасьлöны тшөтш кыв сочетание пöвстын: **бортурун** «зверобой четырехгранный», орччөд **бор турун** «(любая) трава, растущая на меже»; **вижтурун** «матери-мачеха обыкновенная», **сирпинь** «хвощ полевой», орччөд **сир пинь** «зуб щуки» да с. в.

Вайөдөм нимъяс пиын унджыкыс лöоны метафораясөн, образной серпасалöны быдмөгъяссö: **көчвөн** «плаун булавовидный», **урбөж** «хвощ луговой», **көктонн** «хвощ полевой», **понкок** «манжетка горючковатая», **сизыюр** «клевер луговой», **ракасин** «вороний глаз», **турипув** «клюква», **ошлап** «лопух», **шыранькытш** «горошек мышинный», **бикыв** «щавель курчавый», **дөдьюр** «одуванчик», **чарлапинь** «тысячелистник обыкновенный» да с. в.

Ботанической терминологияө вуджөмыс чусмөдö татшөм нимъясыслысь пытшкөсса вежөртассö, но комполентъясыслөн асшөр кывъясөн паськыда ветлөдлөмыс оз на лэдз налы дзикөдз сөльнитчыны.

2. Мөд чукöрыс шымыртö сэтшөм нимъяс, кодъяслөн юкөнъясыс воöмаось öня коми сёрниö ёна вежсьöмөн:

а) сложной кывъяс, кодъ-

яслөн вежсьома первой юкёныс: **катшасин** «ромашка» (катша «сорока»+син «глаз»), **катшаблюд** «ромашка», **катшашляпа** «ромашка», **мырпом** «морошка» (**мыр** «пень»+**пом** «конец»), **воййыв** «кипрей» (**вой** «север, северный»+**йыв** «конец, вершина») да с. в.

б) сложной кывъяс, кодъяслөн вежсьома мёд юкёныс: **вёвкудз** «щавель конский», **кадмоль** «клюква», **нюрмоль** «клюква» (**нюр** «болото, болотный»+**моль** «косточка, пуговка, бусника»), **туримоль** «волчьи ягоды» да с. в.

в) сложной кывйяслөн вежсьома кыкнан юкёныс: **кёкаканы** «чемерица Лобеля» (**кёк** «кукушка»+**аканы** «кукла»), **ыжнёнь** «жимо-лость голубая» (**ыж** «овца»+**нёнь** «сосок, сосцы») да с. в.

Лыдьёдлём фитонимъяс петкёдлөны, мый налысь пытшкёсса вежёртассё öня коми йёз восьтöны зёв кокныда — паськыда тёдса кывъяскөд йитёмөн (**катша**, **мыр**, **вой**, **кёк** да с. в.), но збыль вылассё налөн компонентъясыс артмөмаёсь

зёв нин важөн и колананог гөгөрвоны найёс поэё сöмын научной этимология отсөгөн. Сидз, учёнойяс чайтём серти, важ йёз сетлөмаёсь **катшасин** ним дзоридзыслөн еджыд рём вöснаыс (орччөд **катшыс** «кличка черной собаки с белым пятном на лбу», **катшашыдöс** «крупка (снег)» да с. в., **мыр** юкөнсö (мырпом) коркө гөгөрволөмаёсь кызди «морошка» (орччөд финск. **муура** «морошка»), — **кудз** юкөн (вөв-кудз) — кызди «щавель (орччөд удмуртск. **кузыт турын** «щавель»), — **моль** юкөн (нюрмоль) — кызди «ягода» (орччөд марийск. **муды** «черника»), **вой-** юкөн (воййыв) — кызди «кипрей» (орччөд марийск. **вуйденгге** «кипрей») да с. в.

3. Бөръя, коймөд чукөрö пырöны сэтшөм нимъяс, кодъяслөн юкөнъяснас кызди ашөр кывъясөн сёрниын оз нин вöдитчыны:

а) фитонимъяс, кодъяслөн воддза юкёныс сложной кывъяс пытшысь öтдор сёся некөн оз паныдасылы: **чишыл** «бутень Прескотта», **тупьюр** «клевер», **коляоз** «северюха, мужской цвет хвойных деревьев», **тше-**

тшак «кувшинка», **заргум** «дудник», **зарчипсан** «дудник» да с. в.

Тайö группаяскөд тшöтш колö öтвывтны и дженьдаммөм воддза юкөна быдмөг нимъяс: **тутгум** «дудник» — **тутсан гум**, **пöдтурун** «белена» **пöдтан** **турун** да с. в.

б) гөгөрвотөм бөръя юкөна кывъяс лыдö вайöдам: **понпир** «вороника», **понбаз** «черный паслен; вороника»; **касьмар** «костяника» (кась «кошка») да с. в.

Кызд аддзам, уна сикас композитаясöс öта-мөдсыс типъяс вылö торйөдöмыс, а сидз жö налысь аслыспöлöслунсö тöдмалöмыс сетö позянлун гөгөрвоны, мый кык юкөна кывъяслөн пытшкёсса вежёртас быгалөмлы да на компонентъясылөн öтлаасьöмлы отсалöны: öти-кө, кыв сочетаниелөн терминологической лексикаö вуджөм да переносной смысл босьтөм; мөдкө, народной этимология отсөгөн быдмөг ним кодаркө джынйяслөн (либö весиг кыкнаняслөн) тöдчымөнъя вежсьөм; коймөд-кө, юкөнъясылөн ашөр кыв чукөрысь дзикөдз вылö петөм.

А. РАКИН.



Мыйла шуам Донты

Быд мортлы дум вылас усьлывлө татшөм сыма юалөм: мыйла сылысь сиктсö шуöны Леткаөн либö Паджгаён, мыйла юыслы сетөмаёсь Поин либö Кедва ним.

Татшөм мөвпъясыс оз весьшөрö волены мортлы юрас. Найö уськөдöны төд вылө йöзлысь историясö, висьталöны, мый мянөдз татчөс местаясын овлөмаёсь йёз, кодъяс сетлөмаёсь сиктъяслы, юяслы, туйяслы, тыяслы нимъяс, и тайö нимъясыс воөмаёсь мяня кадөдз.

Öткымын нимъяс, шуам, Сьöдты, Пожöмашор, гөгөрвоанабсь, но зёв уна коми сиктлысь да юлысь нимсö ми огö гөгөрвөй: найёс тэчлөмаёсь зёв важөн нин, вежёртасыс налөн мянөдз эз нин во. Эм сэтшөм

наука — топонимика, кодi велөдö места нимъяс. Тайö наукаыс дзескыда йитчöма историякөд, археологиякөд, этнографиякөд, фольклоркөд да кыв велөдөмкөд.

Сидзкө, топонимика отсалö тöдмавны важ йöзлысь олөмсö, висьтавны, кутшөм кывъя йёз сетлисны нимсö тайö юлы либö тылы, сиктлы либö карлы.

Коми муыввса топонимъяс уна во чöж нин чукөртö да пырөдчö налөн пытшкёсса вежёртасö тöдчана учёной, филологияса кандидат Адольф Иванович Туркин.

Сиктивкарын неважөн петис сылөн «Кöни тэ олан?» книга (130 лист бока, доныс 25 ур). Гижöма сийöс мича коми кывйөн, кокныда. Учёной зёв пыдисянь, важъя ис-

торической документъяс вылѣ подуласьѳмѳн, орчѳн олысь йѳз (ненец, хант, манси, карел, финн, эстонец) сѳрни вылѣ мыджсьѳмѳн, туялѣ коми места нимъяссѳ, пырѳдѳчѳ налы артмѳмас да вежѳртасас.

Автор зѳв уна тѳдмалѳма топонимъяс история йылысь да висътавлѳ на йылысь книга лист бокъясас сьѳлѳмсянь. И пырыс тыдалан коми нимъяссын аддзѳ сийѳ йѳз сѳрниньсь пырѳм кывъяс. Шуам, Разгорт нимын сийѳ оз кутчысь синмѳ шыбитчана коми рас кыв дѳнѳ, а торйѳдѳ «раз» юкѳн — сылы лѳсялѳ карел кывйысь «рази» — тыла, кѳдзѳм му. Дзоньнас топонимыс петкѳдлѳ: тыла вылѣ пуксьѳм сикт. Горт кывйыс войдѳр кутис «сикт» вежѳртас. Босьтѳй Вильгорт, Важгорт сиктъяс, Удмурт кывйын и ѳнѳ на гурт (горт) петкѳдлѳ сикт.

А. И. Туркин оз ышмы, оз фантазируют, кор оз тырмы колана мыджѳдыс, ассяныс оз содтав. Шуам, Дон, Донты нимъяс видлалѳн сийѳ гижѳ, мый тайѳ топонимъяс вермисны артмыны коми ДОН кывйысь, кодѳ лоѳ синонимѳн «сѳдз, сѳстѳм, югыд» прилагательнойсы.

Но автор оз кутчысь татшѳм кокныд мѳвпас: ѳти-кѳ, тыыс зѳв ыджыд, и сы дѳнын важысянь нин олѳмаѳсь йѳз, абу ѳти сюрс во, и тайѳ йѳзыс абу вѳлѳмаѳсь коми-яс, а найѳ тысѳ нимтѳмаѳсь жѳ; мѳд-кѳ, тыас ваыс абу сѳдз, а пемыдгѳрд, кызди пасйѳны специалистъяс. Автор чайтѳм серти, Донты ним пояз тыр-бура тѳдмавны археологъясѳн вѳчѳм удж бѳрын.

Книгалѳн быд глава заводитѳ эпиграфсянь. На пыдди босьтѳма коми гижысьяс кывбуръяссыс юкѳнъяс. Медводдза лист бокас нин паныдасям Ю. Васютов кывбуркѳд:

Ю дор сиктъяс, ты дор грездъяс —
Коми йѳзлѳн оланѳн.
Ветлан туйяс, быттьѳ везъяс,
ѳшлѳмаѳсь ставлы ним.

Тайѳ кывъяссыс мунѳны книгаыслы лейтмотив пыдди.

Книгаын оз сѳмын висътавсьы сы йылысь, кутшѳм ногѳн артмѳмаѳсь места нимъяс, но лыддысьысь син водзѳ сувтѳ сийѳ исторической кадколастыс, кор йѳз овмѳдлѳсны тайѳ сиктъяссѳ да грездъяссѳ да мый серти сѳтавлѳсны налы нимъяссѳ.

Книгаын любѳпырысь гижсьѳ, мый коми войтыр ыджыд пай пуктис и чужан муѳс дорйѳмын, и Сибирѳс тѳдмалѳмын да овмѳдѳмын. А. Туркин висъталѳ, мый уналаын Сибирѳ медводз овмѳдчалѳсны коми йѳз. Найѳс пыдди пуктѳмѳн сийѳ местаясѳ кутѳсны шуны Зыряновка, Зырянское, Зырянка нимъясѳн. И татшѳм коми сиктсѳ автор

лыддѳдлѳ вель унаѳс: Омскѳй да Томскѳй, Тюменскѳй да Свердловскѳй, Челябинскѳй да Курганскѳй областъяссыс, Алтайскѳй крайысь, Якутияысь да с. в.

Торйѳн нин сьѳлѳмсяныс автор тѳдчѳдѳ, мый «Свердловскѳй областъяс ѳти ЗЫРЯНКА сиктын чужис да быдмис повтѳм разведчик Н. И. Кузнецов, кодѳ бура сѳрнитис комиѳн».

Гижысь чуксалѳ видзны важ места нимъяс, ковтѳг найѳс не вежлавны, ѳд наын тыдовтѳчѳ и йѳзлѳн исторіяыс, нимъяс индѳны и мупытшса озырлунъяс вылѳ, и быдмѳгъяслѳн да пемѳсьяслѳн вѳдитчѳм вылѳ.

А. И. Туркин сьѳлѳмсянь радейтѳ чужан муѳс, сылы ставыс сѳнѳ дѳна: и места нимъяссыс, и вѳр-ваыс. Сийѳ чуксалѳ видзны вѳр-ваѳс, рѳдмѳдны пемѳс-пѳткаысѳ, мед гажаджык да мичаджык вѳлѳ мортлѳн оланѳныс. Ыджыд шоглунѳн сийѳ казътывлѳ вѳрса пемѳсьясѳс да пуясѳс, кодъяс миян кадѳдз эз-воны, найѳс горша да видзчысьтѳг лыйлѳм-бырѳдѳм вѳсна.

«Сук парматѳ писькѳдчѳны сѳдз ѳльяс да ичѳтик шоръяс, кодъяс ассыныс сѳстѳм васѳ нуѳны Печораѳ, Изъваѳ, Эжваѳ, Емваѳ. Юяс бокын сулалѳны пуяс, веж великанъяс, да кыскѳны ас дѳнаныс мортѳс мичлуннас да коланлуннас. Код тѳдас, кымын нѳм кутасны нѳшта найѳ сулавны да гажѳдны миянлысь вѳр-васѳ, мортлысь да пемѳсьяслысь олѳмсѳ. А вермас лоны сѳдз, мый локтан поколениелы колясны сѳмын налѳн мича нимъяссыс, кызди артмис тупу да оржи пуяскѳд» — гижѳ автор «Пулѳн нимыс сус» главаын.

Коми книга лѳдзысьяс зѳв сьѳлѳмсяныс уджалѳмаѳсь «Кѳнѳ тѳ олан?» лѳсьѳдѳгѳн. Книгаыс абу ыджыд, позьѳ сийѳс новлѳдлыны зептын, водзсѳ художник А. Мошев мичаа серпасалѳма, вѳчѳма любѳпырысь.

ѳткымын ѳшыбка эм кывъяссѳ гижѳмын, шуам: выльин — вылин пыдди (66 лист бок), бадьяин, бадйѳсь места — баддяин, баддѳсь пыдди (84 лист бок), сисьмытѳм — сисьмытѳм пыдди (88 лист бок), либѳ кыв вежѳртассѳ неправильнѳя гѳгѳрвоѳдѳмын, шуам: нярцо — еджыд нитш — нурывса гѳрд нитш пыдди да с. в. — оз чинтыны дѳнсѳ тайѳ зѳв колана книгаыслысь. Кыв шутѳг, «Кѳнѳ тѳ олан?» аддзас туй быд коми семьяѳ, окотапырысь тѳдмасысны асланыс олан места йылысь гижѳдѳн томъяс да олѳмаяс, велѳдчысьяс и уджалысьяс.

Колѳ сѳмын аттьѳавны А. И. Туркинѳс тайѳ книгаысыс да сины сылы водзѳ вылѳ лѳдзны «Кѳнѳ тѳ оланлысь?» мѳд юкѳн, кѳнѳ лоѳ гѳгѳрвоѳдѳма артманногсѳ да исторіясѳ мукѳд коми топонимъяслысь, кодъясѳс тайѳ книгаас абу на казътыштѳма.

Е. ИГУШЕВ,
филологияса кандидат.

ЛИТЕРАТУРНОЙ ХРОНИКА

Апрель 18 лунö Сыктывкарын вöли коми писательяслөн да литературной активлөн собрание, кодi видлалiс странаысь писательскойi организацияясса веськöдлысьяслөн да журнальясса главной редакторьяслөн совещаниельсь итогьяс да республикаса гижысьяслөн могьяс йылысь вопрос.

Докладсö вöчис Коми АССР-са писательяс Союзысь правлениеса председательöс вежысь Геннадий Юшков.

Собрание вылын сёрнитiсны Петр Шахов, Василий Леканов, Николай Щукин, Иван Изъюров.

Собрание рекомендуйтiс СССР-са писательяс Союзö виль членьясöс.

Собрание уджын участвуйтiс КПСС Коми обкомысь культура отделөн веськöдлысь А. В. Соколова.



Апрель 21 лунö тырис 60 арöс Степан Семенович Раевскийлы, СССР-са писательяслөн Союза членлы, Коми книжной издательствоса директорлы.

Юбилейкөд йитöдын да коми культура сөвмөдöмö ыджыд пай пунктöмысь С. С. Раевскийöс наградитöма КПСС Коми обкомлөн Почётной грамотаён.

Юбилярöс чествуйтан собрание вылын тайö ыджыд наградасö сетiс сылы КПСС обкомса секретарь А. Ф. Сюткин.

Тайö собрание вылын пöся сёрнитiсны юбиляр йылысь республикаса уна промышленной, научной, учебной заведениеясса, министерствоясса, редакцияясса представительяс. Вöли лыддьöма уна чолöмалана письмöяс да телеграммаяс.

Техн. редактор И. Оплеснин.

Адрес редакции: 167610 г. Сыктывкар, Дом печати, комн. 26.

Телефоны редакции: 2-47-52 (гл. редактор), 2-51-52 (отв. секретарь).

Сдано в набор 20/IV-1978 г. Подп. к печати 15/V-1978 г. Ц01905. Заказ № 2992. Печ. лист. 4. Приведенных печ. листов 5,6. Формат 70×108¹/₁₆. Тираж 6628 экз. Цена 20 коп.

г. Сыктывкар, Республиканская типография Управления по делам издательств, полиграфии и книжной торговли Совета Министров Коми АССР.



Усинскын бурөвй.

Снимайтис В. Яч м е н е в.



Том кыдзьяс.
Рисуйтис Л. Жакова.